

रवि शाक्य, इच्छे, यल

भूगु तिसा ज्वलं



लेखक

ईश्वरमान सिन्या

एम्. ए.

(नेपाली इतिहास, संस्कृति व पुरातत्व)

प्रकाशिका

श्रीमती सावित्री सिन्या

लगनखेल, ललितपुर - ५

फोन. ५३४६५९



मुद्रक : विशाखा अफसेट प्रेस
न:टोल, ललितपुर - २०
फोन: ५३४२७७

कम्प्यूटर सेटिङ्ग : होम डेस्कटप
वालिफल, ललितपुर-१६
फोन : ५३४९८२

प्रकाशन साल : विक्रम संवत् - २०५५
नेपाल संवत् - १९९८
इसबी संवत् - १९९८

प्रथम संस्करण : ५०० प्रति

मूल्य : १११/—

सर्वाधिकार लखकमा सुरक्षित

विषय-सूची

क्र.सं.	विषय	पृष्ठ
१.	तायो	१
२.	बुलिन	४
३.	नवरत्न व ध्वया महत्व	६
४.	यल कुमारी माजु - छगु अध्ययन	८
५.	तुकि	१३
६.	न्हातिका	१५
७.	पिउचा	१७
८.	न्यापु सिखः	१९
९.	तिलहरि	२१
१०.	कल्या	२३
११.	पुनायचा	२५
१२.	पर्यंति	२८
१३.	तायो तुकि	३१
१४.	बहःया सिखः	३५
१५.	सिन्चा	३७
१६.	चाः	४०
१७.	शिर बन्दी	४२
१९.	कर्ण कुण्डलि	४४

२०. हृदय फो	४६
२१ कण्ठ	४८
२२ वहःया दुदंगु कल्लि	५०
२३ वहःया रुद्रामाः	५२
२४ दुंग्री	५४
२५ लुँ सिन्हः	५६
२६ चन्द्रहार	५९
२७ अंगू	६३
२८ सुता	६६
२९ मेखला	६८
२९ पाउजु	७०
३० चुल्या	७२
३१ 'मोतासा' (सँतफली)	७५
३२ तुति वकि	७७
३३ सुराहिचा	७९
३४ गोगुल	८२
३५ लुँ स्वां	८४
३६ माकःसि	८६
३७ टिक	९०
३८ विजकनि	९२
३९ लुँ वहः व अन्य धातुया तिसात दयेकीगु	
नेवाः परम्परागत ज्याः	९४

थःगू धापू

जिगु पूर्व जीवन गोफय थे जुल । थःगु अनिवार्य शिक्षा स्नातक पार याय् न्ह्यः सरकारी सेवाय् प्रवेश याय्माःगु जिगु बाध्यता खः ।

जि भाषा बिद नं मखु साहित्यकार नं मखु केवल छम्ह नेपाली इतिहास संस्कृति व पुरातत्व बिषयया जि छम्ह बिद्यार्थी जक खः । छिकपिं सकलया न्ह्यःने “भीःगु तिसा ज्वलं” मौलिक चसु नेवाः समाजया तिसाया ताजितयगु छगु बिबरण संग्रह जक खः । थ्व सफू पाठक तयसं पठन पाठन याना गनं मगा मचाःगु दःसा सुभाष बिया दी धैगु आशा याना ।

थ्व च्वसुइ हनेबहःम्ह प्राज्ञ सत्यमोहन जोशी, पुरातत्व बिद मय्जु ऋद्धि प्रधान, प्राध्यापक डा. मुकुन्द अर्याल, बरिष्ठ कलाकार वत्स गोपाल वैद्य, सं. छत्र बहादुर कायस्थ, आंशिक प्रकाशक प्रेम कृष्ण ताम्राकार सकल यात थः थःगु क्षेत्रं बिया दिइगु मन्तव्य धापू, रेखाचित्रत भित्तुना व आर्थिक ग्वहालिया प्रति दुनुगलं निसें कृतज्ञता-ज्ञापन याना च्वना ।

ल्हासिखः पायो, रक्षामा, धङ्गला व बाला आदि तिसा तय्गु अनुसन्धान याना हे च्वना तिनि । थ्व च्वसुयागु पुफ स्वयेगु, चित्रत बिया ग्वहालि याना द्यूपि सकल हितैषित नं धन्यवादया पात्र खः ।

२०५५ साल, श्रावण २९ ।

कृष्णाष्टमी

ईश्वरमान सिन्या

लेखक

प्राक्कथन

नेपाः देया केन्द्रविन्दु अर्थात् राजधानि काठमाडौं खः । काठमाडौं उपत्यकाय् प्राचीन शहरत स्वंगू दु । थ्व स्वंगू शहर स्वनिगः या नामं प्रसिद्ध जुया च्वंगु दु । थ्व स्वनिगः नेपाः देया पर्यायवाची शब्द जुया च्वंगु दु । अथे जूगुलिं छुं दशक न्हयः तक्क नं नेपाः धैगु हे नेपाः उपत्यका धया वया च्वंगु खः । थ्व उपत्यका आ गुगु रूपय विकास जुया वयांच्वंगु खः, व सः वसः दँ न्ह्योनिसें जक जुगु मखु । थ्व अवस्थाय् थ्यनेत निद्वः निद्वःत्या दँ पुले धुंकूगु दु ।

थनया अनेकौ जातिमध्ये नेवाः जाति छगु पुलांगु जाति खः । कमसेकम लिच्छविकालनिसं थ्व जाति थन वसोवास याना वया च्वंगु धैगु प्रमाणित ज्वी धुंकूगु दु । अभ्र, ज्यापुतेत ला थनयापिं आदिम जाति धाइ । गुलिं गुलिं विद्वान तयसँ थुमित किराती तय नामं स्वागु दु । ज्यापु जाति नेवाः समाजया छंगू अभिन्न जाति खः ।

स्वनिगःया हावापानी व चा बुँज्याया लागि सापहे बाँला । उकिं थन कृषि उत्पादन आपालँ उन्नत जूगुलिं थनया जनजातितय्गु आर्थिक अवस्था आपालँ बाँला जुल । उकीसँ भारत व भोट नापभीगु व्यापार बाँलाक चलेजूगुलिं स्वनिगः यागु आर्थिक अवस्था आपालँ बाँलाना वन । गुकिंयाना थन सभ्यता व संस्कृति यागु नँ आपालँ बाँलाक उन्नति ज्वीफत ।

आर्थिक अवस्था सुदृढ मज्जीक सभ्यता यागु विकास वाँलाक ज्वाँफैमखु । स्वनिगःया भोट व भारत लिसे वाँलागु व्यापार सम्बन्ध दूगुलिं मल्लकालय् थनयागु सभ्यता शिखरय् थ्यंगु खः । व ईयात नेपाःया सांस्कृतिक इतिहासया स्वर्णिम युग धाइ । मध्यकालय् स्वनिगःलय नेवाः जाति यागु हे बसोबास आपालँ जूगु खनेदु । उवले यागु संस्कृति नेवाः तयगु देन खः।

सभ्यतायात तःजि किसिमं प्रभाव याना च्वनी । भाय व ज्ञां निसें भौतिक विकास, अले नयगु चिजं निसे भेष भाषा व तिसा ज्वलं व कला, वास्तुकला व वाद्य वादन विकासया पूर्वाधार खः ।

नेपाः देसय नेवाः तयगु विशिष्ट थाय दु । छुं दिन् न्हयः पिहाँ वःगु डा. देवेन्द्रराज उपाध्याययागु प्रतिवेदन कथं आतक्क नं फुक्क थनयापिं जनजाति मध्यय् नेवाः जाति सुसंस्कृतिं सम्पन्नपिं प्रमाणित याना तःगु दु ।

भाजु ईश्वरमान सिन्या यागु “भीगु तिसा ज्वलँ” सफुति तिसाया विषय च्वया दीगु साप हे समय सापेक्षिक ताया गनतक लगेजू भीगु मौलिक तिसायागु विषय थौं तक गुलि विस्कं माँ भायया सफूया हे रूपय सुनानं च्वःगु मदुनि । थ्व विषयलय वयकःयागु हे दकले न्हापाँयागु सफू खः । नेवाः संस्कृतिया प्रवर्द्धनयालागि छगू ग्यसुलाःगु पलाः खः धैगु भापिया च्वना । वयकःयागु थ्व प्रयासया लागि दुनुगलं निसें सुभाय विइ ।

थ्व सफू स्वया वलय् भीगु नेवाः समाज साहित्य, कला व संस्कृति या पक्षय गुलि तःमि धैगु स्वतः सिदु । च्वःमिया धापुकथं

नेवा तिसा ज्वलं या ताजि त ख्वीता निसें ख्वीन्याता लगभग
 किसिमया दतं मल्या । गुलिखे तिसातला नां मसिया तना वने धुंकल
 जुइ वा चलन चलितई मवयः धुंकल । वयकः नं मुंका न्ह्यव्वया दीगु
 स्वी खुता तिसा तयगु नां नं गुलि खे चलन चलितई मवे धुंकल वा
 आपासिनं मस्यू । गथे कि 'पर्यँति', 'हृदय फव, सुता, वुलिन, मोतासा
 आदि तिसा तः । साधारण मनूतयसं खनिगुला छेखेहे छवये, नां तक
 नं न्यँगु खै मखु थयँ ताया ।

थ्व सफुतिइ संक्षिप्त कथँ न्ह्यव्वया तःगु तिसात गुलिखेला
 व्यवहारय मवय धुंकल । खालि मन्दिरय् व अभिलेखय जक वर्णन
 याना तःगु दु । वयकःनं थुपिं तिसा त थःगु अध्ययन, अनुसन्धान व
 अन्वेषणया सिलसिलाय् पाठकवर्गतय्गु न्ह्यःने तया बाँलागु ज्या याना
 दीगुदु ।

आशा यानाः च्वमि भाजूं थःगु अनुसन्धानयात न्ह्याका मेमेगु
 पिहांमवःनिगु तिसा ज्वलं नं पाठक तयगु न्ह्यःने गुलिफत उलि याकनं
 तया विया दी धका वयकः यागु थ्व भिंगु ज्यायात दुनुगलं निसें
 भित्तुना दु ।

ऋद्धि प्रधान

महानिर्देशक

युवा संस्कृति तथा खेलकूद मन्त्रालय

पुरातत्व विभाग

०५५ । ४१ २७

भित्तुना !

पित्या लंकेत मनुखं नयेगु त्वनेगु याइथें समाःयायत तियेगू याइ । नयेगु यात नसा, त्वनेगु यात त्वंसा धाइथे तियेगु यात 'तिसा' धाइ । तिसा धइगु गुलिं सुयेगु, गुलिं क्खयायेगु, गुलिं, न्हयायगु ज्वलंत जुइ । थी थी तिसाया थःथःगु दर्शन व इतिहास दइ ।

भी पूर्वज पिनसं छयला वंगु थी थी तिसाया दर्शन व महत्व व इतिहास सिइकेगु, थुइकेगु उद्देश्यं छम्ह विद्वान भाजुं छगू सफू चवया पिथनेगु कुतः याना दीगु दु । थ्व सफूया नां “भीगु तिसा ज्वलं” खः । थ्व सफूया चवमि भाजु ईश्वरमान सिन्या खः । थ्वयकः पुरातत्त्व विभागय् तःदं मछि सेवा याना दीम्ह व्यक्तित्व खः ।

चवमि जुं थ्व सफुतिइ भी पूर्वज पिनसं छयला वंगु ३६ ताजि तिसाया खँ थम्हं सिउथें बयान याना दीगु दु । थौं या परिप्रेक्ष्य तिसाया खँला छखे हे नां तकं मसिइ धुंकूगु इलय थ्व सफूया थःगुहे महत्व दु । थुजोगु महत्वपूर्ण सफुतिं तिसाया विषय विस्तृत रूपं अध्ययन, अनुसन्धान याइपिन्त आपोलं प्रेरणा बिइ ।

चवमिया चवसा न्हयाना चवनेमाः, हाकनं मेगु सफू पिथने फयमाः, यक्व यक्व जिगु भित्तुना ! अस्तु ।

ने.सं. १११८ दिलागाः बृहस्पति वाः

मन्द हिति - ६, यल, नेपा ।

छत्र बहादुर कायस्थ

संपादक तथा प्रकाशक

“नेपाल संस्कृति” लय् पौ ।

तिब खँ

मानव जातिया सभ्यता व संस्कृतिया क्षेत्रया तिसायागु नं छगू अतिकं महत्वपूर्णगु बिशेष स्थान दुगु जुया च्वन । अले नेवाः जातियागु बिकास क्रमय् नं नेवाःत गुलि गुलि सुसभ्य (CIVILIZED) व सुसंस्कृत (CULTURED) जुजुं वल, इमिसं तिसायागु नं बिकासक्रम न्ह्याका यंकूगु जुल । इमिसं तिसायात शोभा, अलङ्कार व लक्षणया रुपय् थःपिनिगु शरीरस थी थी कथं छायेपीगुया ल्यू ल्यू , थःपिन्सं हना वया च्वंपि देवदेवीयात तक नं सश्रद्धा भक्ति भावं थी थी कथंया तिसां तीकेगु थितिरीति नं न्ह्यः ब्वयाहल, अझ इमिसं नखः चखः जात्रा बलय् थायेगु बाजा गाजा यात तकनं थी थी तिसां छायेपा यानाः ब्वज्या क्यनेगु परम्परा नं दयेकूगु जुल । थुकियागु हे छगू दसू यल देशय् (ललितपुरस) दँय दँसं नौ बाजा थानाः न्यकू प्वीगु जात्रा ज्वीबलय् न्यकू बाजायात थी थी रत्न व स्वाँफ्वःया तिसां फयांफको छायेपा याना हइगु , अथेहे स्वंगु दमोखियात नं महाकाली , भैरव व कुमारीया ख्वाःपातं प्वीकाः उकी किकिंपा, तीख, तायो, सिखःमाः आदि तिसां क्वखायेका हइगु भीसं थौं तकनं स्वया हे वयाच्चनागु जुल । थथे बाजा गाजा यात तकनं नं थी थी तिसां तिइका ब्वज्या याइगु जात्रा बिश्वय् हे गनं दै मखु थें च्वं । थुकि नं सीदु नेवाःतय्गु समाजय् तिसाया गुजोगु महत्व व बिशेषता दु धइगु ।

तिसायागु हे प्रसङ्गय् भीगु अतिकं लोकं ह्वाःगु 'राजामति' च्वंगु लोक म्येय् दुथ्याका तःगु तिसाया ताजिनं दसूया निम्ति थन न्ह्यथने बहःजू , गथे कि

तहि थकूया तायो दु , चीहि थकूया पायो दु
राजामति या विजकनि दु ।

विजकनि मदुम्ह कलाः जितः मयो बुबा

हया व्यु राजामति चा ।

थुकी तायो, पायो व बिजकनि नांगु स्वताः ताजि तिसा दुथ्याना च्वंगु दु । थुकिं नं उगु इलय् नेवाः समाजय् तिसायागु थुजोगु महत्व व बिशेषता धइगु सी दु । तिसा बिषयक थुजोगु खँ नेवाः समाजय् यक्वों ल्यें ल्यें पुया च्वंगु जुल ।

तर थौ भीगु नेवाः समाजय् नं इलं हःगु परिवर्तनं यानाः तथा आधुनिकीकरणं यानाः पुलां पुलांगु लक्षणगु अतिकं बाबांलाःगु तिसा गुलिं लोप जुजु वना च्वन, गुलिं बेचल्ली जुजु वना च्वन, गुलिं आर्थिक दृष्टिकोणं दयेकें हे मफैगु स्थितिनं वया च्वन । थथे जूबलय् भीगु नेवाः समाजय् गुजोगु गुजांगु तिसा दु , अले व तिसा गुजोगु भ्वजय् , पुजाय् , समारोह व उत्सवय् तीगु खः , उजोगु तिसाया आकृति रुप लक्षण गथे च्वं धइगुया तथ्याङ्क व बिबरण लगत (DOCUMENTATION) तक नं कायम जूगु खने मदु ।

थौ थुजोगु हे तथ्ययात वाः चायेका हनेबहम्हः पासा ईश्वर मान सिन्ध्या जु नेवाः जातिया तिसायात कया तँ दँ मछिया अध्ययन, अन्वेषण व अनुसन्धान यानाः थुगु अतिकं महत्वपूर्णगु “भीगु तिसा ज्वलं” नांगु सचित्रगु सफू च्वया द्यूगु जुल । जिं स्वयबलय् थुजोगु सफू भीगू माँ भाषाय् सुनानं पिकागु खने मदुनी थें च्वं ।

अले थुजोगु खोजपूर्ण सफू पिथनेगु ज्याय् जि नं थुकी थःम्हं फुगु चाःगु छुं भति ग्वाहालि यायेखन, थ्व जिगु लागी तःधंगु सौभाग्य धायेमाल । जिके पूर्ण बिश्वास दु , नेवाः तय्गु सामाजिक-सांस्कृतिक (SOCIO-CULTURAL) जीवनयागु अध्ययन व अन्वेषण याइपिं स्वदेशी वा बिदेशी बिद्वान व विदुषीपिनिगु निम्ति थ्व सफू अतिकं उपयोगी सिद्ध जुइ धइगु । नेवाः तय्गु लागी जा थुगु सफू स्वये मात्र हे जातिय् गौरव ब्वलना वइगु जिं ताया ।

अन्तय् जिगु धाय्गु थ्व हे दु कि हने बहम्ह पासा ईश्वरमान

सिन्या जुया च्वसां हानं नं मेमेगु खोजपूर्ण सफू पिदनी तिनि धइगु ।
वयकःयात आपलं आपलं सुभाय् ।

प्रेमकृष्ण ताम्राकार

१२ वडा चक्रबहील, नौ द्वं बालकुमारी स्थान
यल (ललितपुर)
ने.सं. १११८ गुँलागा श्री कृष्ण जन्माष्टमी ।



महत्तव्य

श्री ईश्वरमान सिन्या जिं म्हस्यूम्ह गाक्कं घनिष्टम पासा खः । वयकः नापं जिगु परिचय थ्यंमथ्यो स्वंगुदशक्क निसें दःसां अप्पो घनिष्टता वं सम्बन्ध दुगु नं भिन्त्यादं पुला वने धुंकल । पुरातत्त्व विभागय स्वंगु दशक ज्या याना वयकः नं नेपाया अप्पो थासय्, भारत जापान व श्रीलङ्काय नापं नेपाली संस्कृति व पुरातत्त्वयागु बाँलाक प्रचार प्रसार यायगुलि सफल जुया दिगु दु ।

नेपाया कलात्मक शहर ललितपुर लुं हिटि त्वाया उच्च श्रेष्ठ, शिक्षित व कुलिन वंशय जन्मय् जुया श्री इश्वर मानजी यात जिं स्यूसां निसे नेपाली संस्कृतिया विविध पक्षय रुचि तइम्ह खः व विषय न्हु न्हुगु अनुसन्धान या यां वयकः नं विभिन्न भाषाय न्यय्गु च्वसुत च्वया पाठक तयगु जिज्ञासु व अनुसन्धाता तयगु लागी प्रकाशयाना विइ धुंकुगु दु ।

जिपिं निम्ह सियागु नापलात कि खँ अप्च जुइ मखु नेपाली संस्कृतियागु विभिन्न पक्षय वयागु विकास व वर्तमान संस्कृति उकि लागु प्रभावयहे जक अपो खँ जुइ । वयकः यागु विद्वता, लिपि यागु यल नगर यागु ननि चुक गल्ली गल्ली दुगु मूर्तिरत वं शिलालेख तय्गु विषयला वयकः छम्ह विश्व कोष हे धासां ज्यू । अन्य सुनानं मस्युगु प्रकाशित मयानीगु मूर्तिकला त नं वयकः नं सम्बन्धित विशेषज्ञ तय् त क्यना ब्यूगु दु । सुनानं वयकः यात उकिया जस व्यूगु दु धाःसा सुनानं खुरुक्क थम्हं जक जस कागु नं दु । वयक नापं थ्व पत्तिकारं यल चापा गां आदि थाय्या विषय आपालं खँ स्यना कयागु खः । यल नगरया आपाल चित्रकला व मूर्तिकलात स्वय्गु सौभाग्य नं जिं वयकः या पाखें कयागु दु ।

न्हुगु छुं याय छुं सयके धैगु खँ ल्हाइपिन्त वय्कः नं ज्यू ज्यान बिया थः थम्हं लगेजुया क्यना विइगु स्यना विइगु व अले उकिहे उत्साहित याका विइगु ।

जिगु अनुरोधय त्रि.वि.केन्द्रीय संस्कृत विभाग पाखें स्नातकोत्तर

पार याय् धुंकूपि छात्र छात्रा तयत् नेपाली संस्कृति व अंग चित्र कला, प्याङगां यागु संस्कृति व डयां दयकेगु (आ लोप जुइगु अवस्थाय् थ्यंगु यात) थम्हं हे यंका किपा कायकय् ब्यूगु नं खः । ज्या याय्गु जस मकास्य वयकः नं “कर्मण्येवा ऽधि काराऽस्ते” यात धात्थें व्यवहारय् हया व्यूगु दु ।

प्रस्तुत ग्रन्थं “भीगु तिसा ज्वलं” वयकः यागु ताहागु ई यागु अध्ययन अनुसन्धानय् दत्तचित्त याइ पिन्सहे थजःगु ग्रन्थ प्रकाश याय्गु सक्षम जुई ।

न्त्यःब्वगु ग्रन्थय् नेवाः समाजय् प्रचलित व हालय तना वने धुंकुगु वा धार्मिक ज्याः खँय् जक प्रयोग ज्वीगु स्वीप्यता तिसा तय्गु ताजि तय्गु विस्तृत वर्णन प्राचिनता व उकिया विषय नेवाः समाजया धारणा नं खने दु । तायो वुलिन, न्हातिका, पय्ति, मो-तासा थय्जाःगु थौ मनुतयस् लोमंके धुंकुगु तिसातयगु परिचयनं नेपाली इतिहास संस्कृति व कला या विद्यार्थितयगु तधंगु खाचो तरे याःगु जक मखु भविष्यया पिढिं तयत् नं ज्ञान सुरक्षित याना ब्यूगु दु ।

रेखा चित्रयाना ग्रन्थय् सुने सुगन्ध जूं वंगु दु । थ्व ग्रन्थ यागु स्वागत सम्पूर्ण सम्बन्धित मनुतय्गु पाखें जूहे जुइ । थजाःगु ग्रन्थ प्रकाशित याना वयकः नं नेपा व नेपाली संस्कृति व जिज्ञासु तयत् तधंगु गुण लगेयाना ब्यूगु दु ।

वयकःयागु कलमं थजःगु न्हून्हुगु ग्रन्थ त प्याहा वय फय्मा नेपाली संस्कृतियागु श्री बृद्धि जूं जूं वनेमा परमेश्वरं वयकःयात थुके पाखें प्रेरणा ब्यू ब्यू वनेमा व वय्कःयात सफलता मिले जुजुवनेमा धइगु शुभकामना नापं थम्ह पासा यात धन्यवाद व वधाइ ब्यू ब्यू कलम थन हे दिके । अस्तु

२०५५ भाद्र, कृष्णाष्टमी

डा.मुकुन्द अर्याल

प्राध्यापक

त्रि. बि. बि., संस्कृति विभाग

छत्वाचा नुगः खँ

नेपाया पुरातत्व व संस्कृतियागु आपलं ज्ञान व अनुभव दुम्ह भाजु ईश्वर मान सिन्याजुं च्वया दयूगु अन्वेषणात्मक सचित्रगु सफू नेपाल भाषा संस्कृतिया धुकुतिइ छगु अमूल्यगु उपलब्धि जूगु जिं तायका । अथेला 'तिसा' धालकि (छगू अमूल्यगु) थ्व नाप न्ह्याम्ह नं परिचित । मचा निसें ज्याथा जिथी तकयानं तिसा नाप ला व लुसिया थें सम्बन्ध दया च्वनीगु, गथे कि मचा जंकू वलय चाःचा, ज्याः जंकू वलय पुनायचा सुइकीगु थिति रीति दु ।

अथेनं भीगु समाजय् न्हापा प्रचलनय् वये धुंकुगु व आ थौं तकनं प्रचलनय् वया च्वंगु तिसा या ताजि, कलात्मक आकृति, लक्षण, उपयोगिता व थ्वयात दयकीगु प्रविधि आदि विषयस भीके म्हो हे जक ज्ञान दु । थ्वहे तथ्ययात वाः चायेकाः भाजु ईश्वरमान सिन्याजुं थ्व विषयस तं दँ मछिया अध्ययन, अन्वेषण व अनुसन्धान याना च्वया दयूगु थुगू सफू भीसं स्वये खन, ब्वने दत, अले भीसं भीगु संस्कृतिया हे छगु प्रतीक जुया च्वंगु भीगु तिसायागु महत्व व विशेषता थ्वीके खन ।

थुगु सफू ब्वने वलय् भी पुर्खाजनपिन्सं भीगु समाजयात ब्वलंकाः सुसंस्कृत यायेत थी थी कथंया तिसायात गुकथं आविष्कार यानाः छयलेगु यात धइगुया ल्यु ल्यु, थुजोगु तिसा नाप स्वापू दुगु भीगु संस्कार, कर्मकाण्ड, देवपूजन, नखः चखः, भव्य उत्सव, व विश्वास आदिया रोचक प्रसंग व विवरण नं ब्वनेवलय् नेवाः जातिया छगु बिस्कंगु म्हसीका (IDENTITY) नं खने दैगु जुयाच्वन । खला नेवाःतय् संस्कृतिया छायापा जुया च्वंगु गुलिखे पुलांपुलांगु तिसा थौं लोप हे जुया वने धुंकुगु नं जुल अथवा गुलि प्रचलनय् मवेनं धुंकल, अथेनं थुगु सफूतिइ च्वंगु

विवरण व किपा ब्वने खनाः, स्वये खनाः तिसाया विधालय् भी गुलिखे तःमि धकाः भीत स्वतः गौरव जुया वइगु जुल ।

खतु तिसा धाये वं हे भीपि मध्ये आपासिया मनसं थ्वयात छाये पीगु समाः ज्वलंथें जक तायेका च्वनेफु, अले लोक व्यवहारय् धाइ नापं “नया प्राण, तिया शोभा”। तर तिसा विषयक थुगु सफू ब्वने वलय् तिसायाहे माध्यमं नेवाः तय्गु सामाजिक व आर्थिक संरचना, धार्मिक प्रवृत्ति, व सांस्कृतिक मान्यता व सार नं सीकेगु थ्वीकेगु आपालं हलं ज्वलं ल्यें ल्यें पुया च्वगुं भीसं खनी । अभ् थुगु सफूतिइ लिच्छविकालनिसें मल्लकाल तकया दुने ब्वलना च्वंगु तिसायागु विकास क्रम नं खने दया च्वनी । उकें तिसाजक ध्यानं मज्यू, तिसा कःघाना तःगु भीगु जातीय गौरवयागु इतिहास नं अतिकं महत्वपूर्ण जूगु दु ।

छता खँ भीगु समाजय् च्वमि भाजुं आपालं दुःख सियाः मेहनत यानाः अन्वेषणया ज्या न्ह्याका सफूया पाण्डुलिपि तयार याइ । तर थुजोगु सफू छापेयाना पिकाये मफया च्वनी, पिकयाबीपिं प्रकाशन संस्थात नं मदया च्वनी । तर तःधंगु सौभाग्यया खँ धाय माल, भाजु ईश्वरमान सिन्या जुं च्वया द्यूगु थुगु सफू छापे यायेत धाःसा यल (ललितपुर) थैना चक्रबहीलया छम्ह अतिकं श्रद्धावानम्ह भाषा व संस्कृति प्रेमी कल्याणमित्र दाता हनेवहम्ह भाजु प्रेम कृष्ण ताम्राकारजुं देव हे चूलाके हःगु जुल । वयकः ताम्राकारजु स्वयं छम्ह कला मर्मज्ञम्ह कलाकार खः । वयकलं थुगु सफू पिकायेत फुकथंया याना द्यूगु आर्थिक ग्वहालि व योगदान आपलं च्वछाये बहः जुल ।

अन्तय थुजोगु अतिकं उपयोगी सिद्ध जूगु सफू च्वया द्यूम्ह भाजु ईश्वरमान सिन्याजु यात आपलं आपा सुभाय् !

यल, बखुबाहाः

सत्यमोहन जोशी

ने.सं.१९९८ गुंलाथ्व ८

समर्पण



प्रातः स्मरणीय पूज्य माताश्री स्वर्गीय
रत्नप्यारी सिन्याया
चिर शान्तिया कामनायासे
वय्कःया चरणकमले श्व जिगु चिकिचाधंगु कृति
सभक्ति देछाया ।

२९ श्रावण २०५५
श्री कृष्णाष्टमी

- ईश्वरमान सिन्या

तायो

प्राचीन मध्यकाल निसं नेवाः जातिं हनावइच्चंगु छगू जात्रा यलया बुंगःद्यो अर्थात् लोकेश्वरया रथ जात्रा खः । बुंगःद्योथें यैय् सजीव कुमारी रथय् तयाः याइगु रथ जात्राया नां कुमारी जात्रा खः । बुंगःद्यो जात्रा लिच्छवि जुजु नरेन्द्रदेव व आचार्य बन्धुदत्त निम्ह जानाः न्ह्याका थकूगु खः ।

बुंगःद्यो व कुमारीद्योयात गःपतय् क्वखायेका तःगु लुँयागु थी थी तिसात मध्यय् छत्राजि तिसाया नां “तायो” खः । थ्व तिसा निम्ह द्योयात नं क्वमखाकुसे मगाःगु लुँयागु नौ नागया तिसाया दथ्वी च्वनिगु खः । थ्व “तायो” तिसा क्वखायेत जःखः विशेष याना भंगः स्वांया कलात्मक बुझा किया तःगु लुँयागु पातां स्वाना तइ । बुंगःद्योयात क्वखायेका तःगु “तायो”या जःखःया पाताय् गरुडया मूर्ति किया तःगु दु । कुमारीद्योयात क्वखायेका तःगु “तायो” या जःखःया पाताय् कलात्मक म्हय्खाया मूर्ति कियातःगु दु । बुंगःद्योया बाहां (बाहन) गरुड जूगुलिं बुंगःद्योयात समर्पण यानातःगु तायोया जःखः स्वानातःगु पाताय् कलात्मक गरुडया मूर्ति कियातःगु खः । थ्वथेंतुं कुमारीद्योया बाहां (बाहन) म्हय्खा जूगुलिं कुमारीयात देछायातःगु “तायो”या जःखः स्वानातःगु पाताय् कलात्मक म्हय्खाया मूर्ति किया तःगु खः ।

यलया जुजु श्री निवास मल्लया राज्यकालय् बुंगःद्योयात द्रुहल पिपातःगु धलोतयागु आरति थलस बुंगःद्योयात आरति बीबले ब्वनिगु आदित्य हृदय स्तोत्र यागु छपु श्लोक कियातःगु दु । व थथे खः-

“नमः सवित्रे जगदेक चक्षुषे
जगत्प्रसूतिं स्थिति नाश हेतवे
त्रयीमयाय त्रिगुणात्मक धारिणे
विरिञ्चि नारायण शंकरात्मने : ॥”

बुंगःद्योयात छायातःगु “तायो”या जःखःया पाताय् उत्कीर्ण गरुडया बुद्धं थ्व श्लोकयात प्रमाणित याःगु दु । “गरुड” श्री विष्णु भगवानया वाहन खः ।

मध्यकालय् लोकंहवापिं बुंगःद्यो, कुमारीदद्यो अथेहे तलेजु, मातृकागणपिन्त लुँयागु “तायो” छायेगु ज्या जुजु, रानी व राजपरिवार, गोष्ठी व श्रद्धालुजनपिसं यानावंगु खने दु । यें, यल, ख्वपया दीपंकर बुद्ध भगवानयात नं लुँयागु थी थी तिसाया नापं “तायो” व्वखायेका तःगु दु । द्योपिंत छाइगु तिसातय्गु नां थथे खने दु - १. तायो २. हृदयफो ३. कण्ठ ४. पँयति । लुँयागु ‘तायो’ तिसा द्योयात जक छाइगु मखु, मनुखं नं तियेगु याः धइगु खँ तस्सकं लोकंहवाःगु राजमति म्येस थथे उल्लेख जुयाच्चवंगु दु-

“तःधि थुकुंया तायो दु, चिधि थकुंया पायो दु

हाय बुबा राजमतिचा..... ।”

“तायो” तिसायात मल्ल जुजुपिसं नं तस्सकं सम्मान याःगु खँ मल्ल जुजुपिनिगु स्मारक (लुँयागु मूर्ति, धलौतयागु मूर्ति व लोहंयागु मूर्ति) पाखें सीदु । तायो तिसा तियातःगु मल्ल जुजु व रानीपिनिगु मूर्ति छुं छुं न्ह्योव्वये -

१. यें लाय्कू हनुमान ध्वाखा देगु तलेजु देगःया न्ह्योने जुजु प्रताप मल्ल व रानीयागु लुँयागु मूर्तिइ “तायो” तिसा व्वखायेका तःगु दु ।
२. पशुपति देगःया न्ह्योने जुजु प्रताप मल्ल व रानीपिनिगु मूर्तिइ नं “तायो” तिसा दु ।
३. गुहेश्वरी च्वंगु जुजु प्रताप मल्ल व रानीपिनिगु लुँयागु मूर्तिइ नं “तायो” तिसा दु ।
४. यल लाय्कूया न्ह्योने खम्बाय्च्वंगु जुजु योगनरेन्द्र व रानीपिनिगु लुँयागु मूर्तिइ नं “तायो” तिसा दु ।
५. चाँगु नारांद्योया न्ह्योने जुजु भूपालेन्द्र मल्ल व वया रानीपिनिगु धलौतयागु मूर्तिइ नं “तायो” तिसा दु ।

लिच्छविकालया छगू तिसाया नां “कण्ठ” खः । थ्व “कण्ठ”पाखें “तायो” तिसाया बिस्तार जूगु खःला धैथें च्वं । थ्व “तायो” तिसाया प्राचीनताया दसू “यलया स्वंगः दमोखिं” खः । “यलया स्वंगःदमोखिं” धइगु दँय्दँसं मतयाः कुन्हु नगर परिक्रमा याइगु न्यकुबाजा अर्थात नौबाजाया मूलगु बाजा स्वंगः खिं खः । थ्व स्वंगः खिंस क्रमसः काली, भैरव व महालक्ष्मीया खाः व्वयातइ । थ्व काली, भैरव व महालक्ष्मीयात तिइका तइगु तिसात मध्यय् मूलगु तिसा हे “तायो” खः । लुँयागु तिसा ‘तायो’ या बुढा प्यखें खुसिलिं लुइ, निखें च्वामुइ, ब्याः प्यंगू वला जुइ । थ्व “तायो” तिसा ग्वःलाःगु ल्याखं सिसाफल व षट्गुणं पारंगतम्ह लक्ष्मीया प्रतीक थें च्वं । थ्व तिसा क्वखायेत कलात्मक लुँयागु पातां स्वाना तइ । थ्व सिद्ध आयु लक्षणं सम्पन्नगु तिसा खः । उकें मखा इहि याइबले, बाहाः पिकाइबले, इहिपा जुइबले मिसामचायात न्यया जूसां तायो, हृदयफो, कण्ठ, पँय्ति नांया तिसां तिइका वयाच्चंगु गनं गनं खने दनि ।



बुलिन

नेपाःया पुलां जाति मध्यय् छगू नेवाः जाति नं खः । नेवाः जाति गुलि सभ्य, गुलि सम्पन्न धइगु खँ मल्ल कालय् नेवाः जाति नइगु नसा, पुनिगु वसः व तिइगु तिसां क्यं । मल्लकालय् नेवाः जातिं तिइगु तिसा लुँ, वहःयागु खः । मिसातय्सं तिइगु तिसात मध्यय् छयँनय् तिइगु नांदंगुं तिसात मध्यय् छताजि तिसा लुँयागु शिरबन्दी खः । छयँनय् तिइगु तिसा जूगुलिं थ्वयात शिरबन्दी धाःगु खः । थ्वथेंतुं मल्लकालय् छयँनय् तिइगु मेगु छताजि तिसा नं दु । थ्व तिसाया नां “बुलिन” खः । “बुलिन” नाम तिसा छगू कथं चितिकक च्वंगु लुँयागु कलात्मक उत्कृष्ट तिसा खः ।

मिसातय्सं तिइगु लुँयागु शिरबन्दी थें जाःगु “बुलिन” तिसा नं परम्परागत तिसात मध्यय् छगू खः । खानदान व उच्च परिवारं युग कथं ल्वयक लुँयागु तिसां तिइगु मूल्य मान्यता सामाजिक संस्कारं ब्वलनिगु खः ।

नेवाः जातिया मिसातय्सं छयँनय् तिइगु लुँयागु कलात्मक “बुलिन” धइगु तिसाया नां जिं ने. सं. १०८९ वि. सं. २०२५ सालरिखे न्यनागु खः । थ्वहे सालं पुरातत्व विभागं मित्र राष्ट्र मेक्सीकोया अनुरोध कथं नेवाः जातिया तिसा, वसःया चित्रत छायेपिया छ्वःगु खः । थथे छायेपिया छ्वःगु तिसात मध्यय् जितः तस्सकं प्रभाव लाकूगु तिसाया नां खः- “बुलिन” । उकें थ्व नेवाः जातिया मौलिक तिसा हे जुइमाः धइगु जिगु अनुमान खः । थुजोगु श्रृंगार कलाया बिचाः याःम्ह व तिसा निर्माण याःम्ह लुँकमि (कलाकार) निम्हं धन्यवादया पात्र खः धका भाःपिया । नेपाः दे धैगु प्यंगू वर्ण व स्वीखुता जातिया केब धाइ । थ्व स्वीखुता जाति मध्यय्

नेवाः जातिं छूयला वंगु व छूयला च्वंगु लुँ - वहःया तिसात ख्वीता
 निसें चय्ताति दु । थ्व जिं थःगु अन्वेषणं लुइकागु खः ।

सिद्धहस्त समाजसेवी बुहा- पाकापिं मुनाः मचातयंगु बौद्धिक
 स्तर ब्वलंकेत 'हँय् थकालि कि खँ थकालि' धका वाद-विवाद
 याकिइगु जितः आः तकं लुमनि । खँ श्रृष्टिया छगू ग्यसुलाःगु खाच
 पदार्थ खः धइगु खँ सकसिनं मसिउगु मखु । बागःखँ बान्की लुइकाः
 कलात्मक बुट्टा कियाः दयेकातःगु थ्व "बुलिन" तिसाया प्राचीनता खँ थें
 हे पुलां धायेगु पहःजक मखु मिसातयंगु न्ह्यपु नं मिजंतयंगु न्ह्यपुया
 बछि खः धका क्यनेगु कुतः धायेछिं । नेवाः भाय्या खँग्वः धुकू पुइका
 स्वयां "बुलिन" खँग्वः हे दुथ्याका तःगु मदु । उकें विद्वान कोषकारपित
 प्राचीन नेपालया लुँ, वहःया तिसातयंगु नां दुथ्याके माःगु खँ नं इनाप याना
 च्वना ।

थ्व "बुलिन" तिसां तिइबले मस्युपिसं शिरबन्दी हे धाइ । दथुइ
 सिन्चा, जःखः स्वंगः खँग्वः बान्की बुट्टा भतिचा ताहाःकथं बागःखँया
 आकृति पिज्वः अर्थात मसिनुगु लुँयागु सिखलाय् खँग्वः बुट्टाय् सिन्चाया जः
 खः अतिकं श्रृगार कलां जायाच्वंगु तिसा खः । थ्व "बुलिन" तिसां नेवाः
 जातिया ऐतिहासिक गौरव न्ह्यब्वया च्वंगु दु ।



नवरत्न व थ्वया महत्व

विश्वय् अनेक तत्वत लखलख दँ तक संयोग व वियोग जुजुं प्राकृतिक अनुकुलताया, वातावरण अनुकुलताया वातावरण पाखें परिष्कृत जूगु ठोस भागयात रत्न धाइ । रत्न धैगु गुंगू दु । थ्व गुंगू रत्नयात संस्कृत भाषं नवरत्न धाइ । नवरत्नया नां हिरा, मोति, पन्ना, माणिक, भिंपु, नीर, गोमेल, पुष्पराज व ल्हसुन खः । थुकी प्वाल्ल थीगु, तेजया अविनासीपन व स्थीरता दइ । थ्व नवरत्नया थःथःगु गुण दु । थ्वहे गुणं याना नवरत्न विश्वय् बहुमूल्य जूगु खः ।

थ्व नवरत्नया प्रयोग मनुखं गुबले निसें शुरु यात धैगु न्ह्यसःया लिसः बिये फुउगु मदुनि । विश्वय् दकोसिनं पुलांगु ग्रन्थया रूपय् मानय् यानातःगु आर्य ग्रन्थ ऋग्वेदया न्हापांगु मण्डलया प्रारम्भ अष्टकया न्हापांगु सुक्तया प्यंगू पावय् नवरत्नया नां न्ह्यथनातःगु दु । थ्वथेंतुं वैदिक धार्मिक ग्रन्थत अथर्ववेद, यजुर्वेद, उपनिषद्, रामायण, महाभारत, स्मृति आदि प्राचीन आर्य साहित्यय् नवरत्नया नां, गुण, उपयोग, मालेगु परीक्षण यायेगु अनेक विधिया बयान यानातःगु दु । ग्रह दोष व दिन दशा भिकेगुया लागी थी थी रत्न थुनाः अंगू दयेका न्ह्यायेगु खँ नं च्वयातःगु दु ।

थ्वया लिपा कौटिल्यया अर्थशास्त्रय् नं मनुखं व्यवसायीया रूपय् नवरत्नयात महत्व बिउगु खँ बयान यानातःगु दु । महाकवि कालिदासं नं कुमारसम्भवय् हिमालय रत्नया खानी धका बयान यानातःगु दु । खः नं खः भीगु नेपाः देया सम्पूर्ण उत्तरखण्ड रत्नया भूमि खः । अले भीगु देया सुदूर पूर्व उत्तर लागाय् लाःगु ताप्लेजुङ्ग जिल्लाया कुम्भकर्ण निसें पश्चिम दार्चुला ताक्लाकोट तकया सम्पूर्ण भूभागय् रत्नया रत्न लायातःगु दु धाइ । थुजाःगु विलुप्त अवस्थाय् लानाच्चंगु रत्नया खानीत म्हसीका रत्नत पिकाये फत धाःसा नेपाःदेया अर्थतन्त्रय् तःजिगु ह्यूपाः वइ अर्थात विकास जुइ । ज्योतिषशास्त्रय् नवरत्नयात जन्म निसें मसीतलें

स्वापू दुगु खँ च्वयातःगु दु । नवरत्नया जुजु हिरा खः । तस्सकं तस्सकं
अनमोलगु हिरा नं दु । हिरा मध्यय् कोहिनूर हिरा विश्वय् दकले नांजाःगु
ऐतिहासिक हिरा खः ।

शाक्यमुनि गौतम बुद्धया पितृ देश कपिलवस्तु, जन्मभूमि
लुम्बिनीया थःगु हे ऐतिहासिक महत्व व महिमा दु । जि न्हापा वि.सं.
२०२४ सालं निसें तःदँ तकक पुरातत्व विभागपाखें उत्खनन् व
अन्वेपण्या ज्याय् संलग्न जुया वनाबले बहुमूल्य नवरत्नत खनागु लुमंसे
वः । तिलौराकोटय् नं कार्नेलियनं, जास्पर, वान्देद स्टोन कृष्टल आदि
ऐतिहासिक तिसाय् प्रयोग जुयाच्चंगु खना । थुकिं नवरत्नया तःजिगु गुण
व महत्वं बहुमूल्यया रूप काःगु स्पष्ट सी दु । जुजुपिनिगु श्रीपेचय्
(राजमुकुटय्) व देव देवीया मुकुटय् हिरा थुनातइगु व थी थी तिसा
दयेका नवरत्न थुना देव देवीयात तिइकीगु व मनुखं नं तिया जुइगु चलनं
नवरत्नया गरिमा व महिमा न्हियान्हिथं च्वजाया वयाच्चंगु दु । थ्व हे
नवरत्नया तःजिगु विशेषता खः ।



यल कुमारी माजु छगू अध्ययन

अभिलेखया ल्याखं नेपालय् कुमारी द्यो मानेयायेगु चलन लिच्छवि जुजु मानदेव (प्रथम) या राज्यकाल निसैं न्ह्याना वयाच्चंगु खने दु । थ्वया न्ह्यो नं माने यायेगु चलन दयेफु । थ्व अनुसन्धानया विषय जुल । थौकन्हे स्वनिगलय् कुमारी द्योयात तःजिक हना वैच्चंगु दु । येय् ला जुजु जयप्रकाश मल्लं कुमारी द्योया रथ जात्रा दैयदैसं न्ह्याकेगु परम्परा हे दयेका थकल । थ्व जात्रा थौतक नं चले जुयाच्चंगु हे दु । यलय् बुंगद्योया न्हवं व रथजात्रा जुइबले कुमारीद्यो नं ब्वये हयेगु परम्परा दु । थ्वथेंतुं ख्वपय् नं राजकीय पर्वय् कुमारी द्यो ब्वये हइ । थथे यें, यल व ख्वपय् इलय्-ब्यलय् पतिं ब्वये हयेमाःपिं कुमारी द्यो कलाकारतय्सं दयेका तःपिं मूर्ति मखु । थुपिं म्वाःपिं कुमारी द्यो खः । म्वाःपिं कुमारी द्यो विशेष याना वज्राचार्य कुलया म्हचाय्मचा जुइ । थुमित कुमारी माजु नं धाः । थन चर्चा याये त्यनागु यल देशया कुमारी माजुया बारे खः ।

यलय् कुमारी माजु हखबाहाःया वज्राचार्यतय् म्हचाय्मचा जक जुइ । थुमित धुसः नं धाः । हखबाहाःया संस्कृत नां: लक्ष्मीकल्याण वर्म संस्कारित रत्नाकर महाविहार खः । थ्व बाहाःयात थौकन्हे हःबाहाः जक नं धाः । थौकन्हे कुमारी माजु जुया च्वंहम आजु धर्मरत्न वज्राचार्यया छय्मचा खः । थ्व मचा दत्या जक दुबले कुमारी द्यो जुया बिज्यागु खः । थौकन्हे कुमारी माजुया उमेर खुदै दत न्हूमह कुमारी द्यो ल्यइगुया विधि विधानया खँ आजु धर्मरत्न वज्राचार्य कनादी कथं न्हचब्वया च्वना ।

नेवाः जातिया दुने कुमारी द्योया तःधंगु भूमिका दु । नेवाःतसैं कुमारी द्योयात म्वाः द्यो नं धाः । मोहनिबले वा महानिपिं, खुन् मजुउनिपिं, इहि मयानिपिं म्ह्याय् मचातय् कुमारी पूजा याइगु चलन थौतक नं दनि । थथे कुमारी पूजा याइबले १ म्ह, ३ म्ह, ५ म्ह, ७ म्ह, निसैं १०८ म्ह तक तया नं विशेष रूपं पूजा याइपिं दु । थुकिइ

न्ह्याह्मसिया म्हचाय्मस्त जूसां जिउ । थुमित मोहनिया नवमी व दशमी
निन्हु जक पूजा याइ । मूलम्ह कुमारी घोया पूजा न्हिया न्हिथं जुइ । आ
ध्व मूलम्ह कुमारी घोया विधि विधान पाखे वने ।

कुमारी घो जुयाच्वंम्ह खुन जुल कि, थी मत्यः (रजस्वला) जुल कि
न्हूम्ह कुमारी घो ल्यइगु परम्परा दु । दकले न्हापां कुमारी घो याये मन
दुपिं हःबाहाःया गुरुजुपिसं थःम्हचाय्मस्त बाहालय् ब्वये हइ । थथे ब्वये
हःपिं मध्यय् यल तलेजुया पुरोहित, गुथि संस्थानया प्रतिनिधि व हखबाहाः
संघया प्रतिनिधि च्वना यल तलेजुइ यनाः स्वम्ह मचा जक ल्यइ । ध्व
स्वम्ह मचायात जुजु श्री ५ या वडागुरुजुया छेंय् ब्वना यनि । थुकिया
सूचं न्हापा हे वडागुरुजुयात सूचंया रूपय् ग्वय् तयेयनेमा । कुमारी घोया
लागी ल्यया हःपिं स्वम्ह मचायात वडागुरुजुया कलाः गुरुमां नं परीक्षण
यायेत बिज्याहुं धका लसकुस याना बिज्याइ । थुबले ग्याना म्हां धका
ख्वइपितं लित छ्वया हइ । अले गुरुमां लिसे वंपिं मचातय्त सर्वगुण
सम्पन्न खः मखु परीक्षण याना बिज्याइ । ध्व परीक्षणया मूखं शरीरया
सम्पूर्ण अंग ठिक जू-मजू, घनिगु, दनिगु, फयेतुइगु, च्वनिगु, नइगु लक्षण
व मुद्रा सम्बन्धी ज्ञान खः । थुलि खँया परीक्षण याना गुरुमां नं यलया
कुमारी घो ल्ययेगु ज्या क्वचायेका बिज्याइ । अले गुरुमां नं ल्यया
बिज्याम्ह मचायात सिन्हः तिकाः माःगु विधि याना बिदा बिइ । अले थःगु
छेंय् हया बिज्याहुं धका सम्मान तयाः हनेमाःगु जुल ।

थथे वडागुरुजुया थासं ल्यया हःम्ह न्हूम्ह कुमारी घोयात शुभ
दिनया साइत कयाः तलेजुया मूल पुजारी राजोपाध्यायया छेंय् आह्वान
पूजा जुइ । ध्व पूजाय् शास्त्रीय पद्धति कथं दशकर्म विधि जीवन्यास
पर्यन्त बिइगु खः । पूजा सिधलकि राजोपाध्याया छें निसें हःबाहाः तक
बाजागाजा तया जात्रा याना हयाः कुमारी घोछेंय् लसकुस याना दुकाइ ।
ध्व कुन्हु निसें अनिवार्य रूपं न्हि न्हि कुमारीमाजुयात समय ज्वलं तयाः
आरति याना पूजा यायेमाःगु जुल । थथे पूजा याइबले समाःयाना तिसा
तिइकेमाः । थथे तिइकिइगु तिसाया नां थथे खः-

- | | |
|--------------------------------|----------------------------------|
| १. लुँयागु कलात्मक तायो | २. अपराजिता लुँस्वांया कण्ठ |
| ३. वहःयागु तःपुगु कलात्मक सिखः | ४. वहःया कलात्मक नागमाः |
| ५. वहःया मोहःमाः | ६. वहःयागु लप्पाय् तिङ्गु कल्याः |
| ७. वहःयागु कलात्मक जन्त्र | ८. वहःयागु कलात्मक मौ (बाइ) |
| ९. वहःयागु प्याखं अंगू | १०. वहःयागु कलात्मक तुतिबकि |
| ११. वहःयागु मण्डमाला | १२. वहःयागु कलात्मक जवि । |
| १३. लुँयागु चाचा | १४. लुँयागु दृष्टि, सिन्हः आदि । |

नेपाल सम्बत १९९७ चैत्र शुल्क अष्टमि कुन्हु यलदेया आस्था व श्रद्धाया प्रतीक सजीव कुमारी माजुया विषये छुं खँ सीके माल धाःगुलिं छम्ह प्रोफेसर डा. मुकुन्द अर्याल व वय्कःया पासा क्रिस व दनपित कुमारी द्योया द्योछेंय् ब्वना यंकागु जुल । थुबले पूजा यायेत तिसां तिङ्किङ्गु व पूजा विधि नं स्वये खंगु जुल । तिसां तिङ्किङ्गु तिसा व शरीरया अंगया नां थथे खः ।

१. लुँया चाचा-जो न्हाय्पनय् तिङ्गु ।
२. वहःया नागमाः, मण्डमाः, सिखः गःपतय् क्वखाइगु ।
३. लुँया अपराजित स्वां, वहःया सिखलय् स्वानातःगु क्वखाइगु ।
४. कलात्मक वहःया कल्याः जः खः लप्पाय् न्ह्याइगु ।
५. कलात्मक वहःया मौ (बाइ) जःगु खःगु नाडिइ न्ह्याइगु ।
६. वहःया प्याखँ अंगू निपाल्हाःया चोला पतिं व अंगूपतिस न्ह्याइगु ।
७. वहःया कलात्मक तुकिबकि जःगु खःगु पालिइ न्ह्याइगु ।
८. वहःया कलात्मक जवि जँय् चिङ्गु ।
९. लुँयागु कलात्मक तायो छातिइ तिङ्गु ।
१०. वहःया कलात्मक जन्त्र गःपतय् क्वखाइगु ।
११. लुँयागु दृष्टि सिन्हः कपालय् तिङ्गु ।

थुपिं तिसात नेवाः जातिं छचला वयाच्चंगु शास्त्रीय लक्षणं युक्त मौलिक व दार्शनिक तिसा खः । थ्व तिसाया ऐतिहासिक, सांस्कृतिक मूल्य मान्यता तःजि । थ्व तिसाया गौरवमय प्रतिष्ठा, दैवी प्रभाव व आकर्षणया खँ ल्हानां मब्याः ।

श्व कुमारी द्योयात थी थी धर्म माने थाइपिं सकल नेवाःतय्सं श्रद्धा व भक्तिं माने याः । राजकीय सम्मान प्राप्तम्ह कुमारी माजुया प्रसाद जावलाजात्राबले श्री ५ महाराजाधिराज सरकारपाखे नं ग्रहण याना बिज्याइ । श्व कुमारी माजुयात पित हयेत बाजागाजा तथा द्योकुसां कुइका पूर्ण राजकीय सम्मान हयेमाः । धात्थें धायेगु खःसा श्व कुमारी माजु धार्मिक सहिष्णुताया प्रतीक खः ।

थथे कुमारी द्यो जुइ धुंकूम्ह म्हत्याय्मचा मेले बिया छ्वये भजिउ धाइ । बिया छ्वःसां भाःतया छ्वयँ न्ह्यइ धाइ । उकें कुमारी माजु जुयाः अवकाश प्राप्त जुलकिं भविष्यत् जीवन यापनया लागी अक्षय कोष दयेकाः लय् लय् भत्ता बियेगु व्यवस्था दयेकेमाःगु खने दु । श्व खँय् यल उपमहानगरपालिका पाखें बिचाः यायेमाः ।

विशेष याना श्व कुमारीयात यलं बुंगःद्योया न्हवं निसें जात्रा सिमधतले व बुंगं यलय् बिज्याचकिबले पित ब्वये हयेमाः । श्व कुमारी द्यो च्वना बिज्याइगु फलचायात कुमारी फलचा धाइ । थौकन्हे तःपुखू लिक्क च्वंगु कुमारी फलचायात कुमारीपाटी धका च्वयेगु याना हःगु दु । थथे च्वयेगु औचित्य मखु ।

कुमारी माजुयात नेवाः जातिं गुलि श्रद्धा भक्ति तः धयागु खँ नेवाःतय्सं थौं तक हनावैच्वंगु मूल्य मान्यता खः । प्रत्येक नेवाःतय्सं थःगु दशकर्म अर्थात मचा जंक्वः, बसुका, कय्तापुजा, इहि, ब्याहा (इहिपा), ज्याःजंकु, आदि ज्याखँय् कुलया परम्पराकथं पुरोहित, थकालि, थकालिनकिं नं माःगु ज्या क्वचायेके न्ह्यो कुमारी द्योया पूजा छ्वयेमाः । कुमारी द्योया प्रसाद ग्रहण यायेवं तिनि संस्कार कर्मया ज्या क्वचाइ । थथे कुमारी पूजा अष्टमातृका पीठय्, बाहाः बाहालस स्थापित कुमारी द्योया थाय् पूजा वनिपिं नं दु । श्व सजिव कुमारी द्योया थाय् थ्यंक वनेत थाक्या थथे याःगु धाइ ।

न्ह्यागु जूसां कुमारी माजु धार्मिक समन्वयया भूमिका निर्वाह
याना बिज्याना च्वंम्ह श्रद्धा भक्ति व आस्थाया द्योतक खः । थुकिं नेवाःत
धइपिं म्वाःद्योयात नं माने याइपिं सभ्य जाति खः धइगु खँ थुयेका बिउ ।



तुकि

नेपाः गाःया आदिवासी नेवाःत नेपाः देया छगू पुलांगु जाति खः । नेवाः जातिया मिस्तय्सं तिइगु लुँयागु तिसात मध्यय् छताजि तिसाया नां खः “तुकि” । थ्व तिसा नेवाः जाति दुने स्वंगूगु दशक न्ह्यो तक बाज्यः पुले धुंकूपिं स्यस्यःनी, मालनी, ज्यापुनी, उदायनी, कसाःनी, तमोनी, पुंनी, सायमिनी, कौनी, नौनी आदि जातं निपा न्हाय्पनय् नं भूवः भूवः लुँयागु “तुकि” अगतिं (न्हि न्हि) सुया जुइगु चलन दनिगु खः । “तुकि” तिसा निगु कथंया दु-सादा व बुद्धा किया तःगु । बांलागु व लोवनापुसे च्वंगु लुँयागु तिसात नध्यय् “तुकि” तिसा नेवाः समाजय् तस्सकं लोकें व्हागु खने दु ।

न्हापा “तुकि” तिसां तिया जुइपिं नेवाः समाजया प्रत्येक जहान परिवारय् बाज्यः बपिं मिस्त मध्यय् म्होनि सच्छिम्हय् स्वीप्यम्हया ल्याखं खने दु । थुकिं सीदु- “तुकि” तिसा धैगु परिवारया औकात वा आर्थिक सम्पन्नताया छगू दसि खः ।

“तुकि” तिसा ल्यासेपिं नेवाः मिस्तय्सं तिइगु तिसा मखु, बाज्यः बय्सस थ्यने धुंकूपिं मिस्तय्सं जक तिइगु थ्व छगू पुलांगु तिसाया नमूना खः । थ्व तिसां तिइगु चलन गुलि पुलां धैगु खँ अनुसन्धानया विषय तिनि । अथे नं पुलांगु किपाःत अध्ययन यायेबले भिंन्हय्गूगु शताब्दी रिखे निसें लुँयागु तुकि तिसां तिइगु चलन वये धुंकूगु खने दु । थ्व लजगाःया नं खँ खः । भिंन्हय्गूगु शताब्दी निसें भिंंगूगु शताब्दी तक नेपालय् लजगाः धैगु बन्दव्यापार, कृषि व जागीर खः । लजगाःया आम्दानी नखः चखः, गुथि, जात्रा आदि हना ल्यं दतकिं व धेबां लुँयागु तिसा दयेका तइगु उबलेया चलन खः । न्हापा आः थें धेबा बचत यांना तयेगु बैंक मदु । उकें लुँयागु तिसा दयेका तइगु खः । लुँयागु तिसाया बारे थी थी खँत्वा खँभाय् नं दु ।

१. नया प्राण, तिया शोभा ।

२. दैबले तिसा, मदैबले नसा ।

“तुकि” तिसा शुद्ध नेपाःया नैवाःतय्गु तःजिगु तिसा खः, मेमेगु जन जातितय्गु मखु । थ्व “तुकि” तिसाया प्रचार नेपाःदेया स्वनिगल्य् जक मखु, स्वनिगलं पिने गां गांमय् तकं थ्यंगु खने दु- मूलत नेवाः बस्तिइ ।

“तुकि” तिसा दयेकिइगु तरिका नं थीथी कथंया दु -

१. चाकः सिन्हः थे लुँयागु चक्काया दथुइ प्वाः तया दयेकिइगु तुकियात “सादा तुकि” धाइ ।
२. तायोथेंतुं निखेंसं चक्का लुइका तायो तुकि लुँया कलात्मक तुकि ने.सं. १२४ साल तक मिस्तेसं तियेगु याना तःगु खने दु । थ्वयात “तायो तुकि” धाइ ।
३. चाकः सिन्हः थे लुँयागु चक्काया सिथय् छ्वाखेरं गो गो बुट्टा थकया दयेका तःगु तुकियात “पलं तुकि” धाइ ।

“तुकि” तिसा विशेषत नेवाः मिस्त मध्यय् बाज्यः थ्यने धुंकूपिसं तिइगु छ्वाजि तिसा खः थे प्रौढया बय्सस थ्यने धुंकूपिं मिजंतय्तनं “तुकि” तिसां तिइकिइगु चलन दु । थ्व विशेषतः ल्याय्म्हया बय्सं पार याना प्रौढया बय्सस थ्यना काय्मस्त तामम्बाःपिं परिवारतय्सं प्रौढया बय्सस थ्यने धुंकूपिं मिजं मस्तय्गु सुस्वास्थ्य व दीर्घायुया कामना याना जवगु न्हाय्पंया चक्काय् छ्वा जक तुकि तिसां तिइकिइगु चलन दु । थ्व तिसायात “न्हातिका” धाइ । थुकिं मिजं मस्तय्गु दीर्घायु जुइ धैगु जन विश्वास दु ।

नेवाः संस्कार कथं मिजं वा मिस्तय्सं बय्सयात ल्वय्क तिइगु तिसा नं दु । न्ह्यागु हे तिसा जूसां उमेर पाक्व जुया वः लिसे थम्हं तिया तइगु तिसां मृत्यु पश्चात थःगु काज क्रिया यायेत आर्थिक रूपं ग्वहालि जुइगु भाःपिया सितिमिति थःगु तिसा म्हासे यायेगु स्वइमखु । थुकिया कारणः लुँयागु हे तिसा जूसां थ्व नगद खः धैगु अवधारणा खने दु ।



न्हातिका

नेवा: समाजय् मिजं मचातय्त तिइकिइगु लुँयागु छताजि तिसाया नां ख:- 'न्हाति' । थ्व तिसायात गुलिसिनं 'न्हातिका' धा:सा गुलिसिनं "न्हातिका:" नं धा: । नेवा: जाति बाहेक मेमेगु जातिया नं मिजं मचातय्त "न्हातिका" तिइकिइगु चलन दु । उमिसं न्हातिकायात "कुमाल" धाइगु ख: ।

"न्हातिका"—मिजं मचातय्गु ताआयु (दीर्घायु) या कामना यासे तिइकिइगु छताजि तिसाया नां ख: । थ्व न्हाय्पनय् सुइकिगु मुन्द्रचा: थें ज्या:गु तिसा ख: । मुन्द्रिचा जवगु खवगु न्हाय्पया क्वय् सुइकिइगु तिसा ख:। तर न्हातिका मिजं मचातय्गु जवगु न्हाय्पया क्वय् सुइकिइगु तिसा ख: । न्हापा न्हापा "न्हातिका" लुँयागु स्वहि जक चाहिका तइगु ख: । लिपा मिजंमचातय्त सुइकिइगु न्हातिचास भिंपु व मोति नं थुनेगु याना ह:गु धाइ । थ्व तिसाया स्वरूप थथे ख:- जवं खवय् स्वहि म्वये हिइका चौले लाक्क दथुइ भिंपु निखे निग: मोति थुना तइ ।

थ्व तिसां तिइकिइगुया न्हापांगु उद्देश्य -रोग, व्याधिं व भूतप्रेत पिशाचपाखें जुइगु संकष्ट पाखें संरक्षण यायेगु ख:सा, निगूगु उद्देश्य-ताआयु (दीर्घायु) व भविष्यया उज्वल तारा जुइसा: धैगु कामनाया प्रतीक ख: ।

नेवा: जातिं मचातय्त गबलें लुँया प्यूचा, गुबलें जंकुचा:चा, वह:या दुदंगु कल्लि, पय्तिं, सुता, तायो, तुकि आदि तिसां तिइकिइगु व न्ह्याकिइगु याना वइचंगु विधिया महत्वपूर्ण भूमिका दु । थ्वथेंतुं मिजं मचातय्त जक तिइकिइगु लुँयागु "न्हातिका" तिसाया नं त:जिगु महत्व दु ।

“न्हातिका” तिसा दको मिजं मचातय्त तिइके हे माः धइगु मदु । बहुसंख्याय् काय्मचात दुपिंत थ्व तिसां तिइके माः धैगु अनिवार्यता मदु । विशेषत थ्व तिसा काय्मचात दःसां नं गुलिं बुइसाथं सिइपिं, मचाबलय् हे सिइपिं मचातय् मां-बौपिसं ज्योतिषीतय्गु सल्लाह कथं थः काय्मचात म्वाकेगुया लागी साइतय् लुँयागु न्हातिका तिसां तिइकेगु याना वइच्चंगु खः । थ्व चलन स्वनिगलय् जक मखु पहाड, मदेश, तराई प्रदेश थ्यंक व्यापक रूपं प्रभाव लाःगु खने दु ।

वाल कल्याणया लागि महत्वपूर्ण तिसा जुया हे मेमेगु जाति नं अनुशरण याःगु जुइ धका अनुमान यायेछिं । नेवाः जातिं थें क्षेत्री, चौधरी, अहिर, बनियां व मेमेगु छु छु जन जातिं थः काय् मचातय्त “न्हातिका” अर्थात् “कुमाल” तिसां तिइकिइगु याना वइच्चंगु दु । थुकिया विस्तृत अनुसन्धान जुइमाःगु ताया । थुकिं थीथी जन जातिया सभ्यताया इतिहास निर्माण यायेत बः बिइ ।



पिउचा

भीगु समाजय् ४ गू वर्ण ३६ गू जाति दु धाइ । थ्व खँयात माने यायेगु मयायेगु मनूतय्गु विवेक विचारया खँ खः । भीगु समाजय् बूसां निसें सी धुंका तक नं थःथःगु संस्कार कथं कर्म-काण्ड यायेमाः । संस्कारया दुने यायेमाःगु कर्म काण्ड नं सभ्यताया छगू विशेषता खः । नेपाः देया थी थी जाति मध्यय् नेवाः जातियात नं सभ्य जाति धाइ ।

नेवाः जातिं हना वइच्वंगु कर्म-काण्ड मध्यय् भीगू मूल संस्कार दु । थ्व १० गू मूल संस्कार मध्यय् छगू “छैथि” खः । थ्वयात “छैथि” कर्म-काण्ड नं धाः । “छैथि” धैगु मचा बुइगु (जन्म जूगु) खुन्हु कुन्हु यायेमाःगु कर्म-काण्डयात धाइगु खः।

नेवाः समाजय् छैथि कुन्हु अर्थात मचा बूगु खुन्हु कुन्हु चित्रलेखा वयाः ह्याउमचाया कपालय् भाग्यरेखा कीया वनिगु खँ विश्वास याना वइच्वंगु दु । थ्व हे विश्वासं छैथि कुन्हु चच्छिं मत च्याका तयेमाः धका मत (पाल्चा मत) च्याका तइ ।

भीगु नेपाःदे धार्मिक भावनां विकसित जूगु राष्ट्र खः । थन धार्मिक सहिष्णुता दु । थन शिव (महाद्यो), विष्णु, बुद्ध, सूर्य, चन्द्रया मूर्तियात थःथःगु पहलं माने याना वयाच्वंगु दु ।

भीगु समाजय् नव धातुयात थी थी द्योया प्रतीक कथं नं माने याना वइच्वंगु दु । उदाहरण - “लुँ” यात विष्णु भगवानया प्रतीक, सिजःयात महाद्योया प्रतीक, “वहः” यात चन्द्रमाया प्रतीक आदि । उकें मखा छैथि कुन्हु खुन्हु दुम्ह “ह्याउमचा” यात विधिवत भिंचाम्ह ह्याउमचायात ‘चुल्याचा’ न्हचाकेगु धका लुँयागु ‘पिउचा’ न्हचाकीगु भीगु संस्कार धर्मया उदय लिसे विकसित जुउगु अनुमान यायेछिं । थ्व लुँयागु ‘पिउचा’ छैथि कुन्हु निनिम्हेसिनं विधिवत भिंचाम्ह ह्याउमचायात

नादिइ न्ह्याकीगु तिसा खः । थ्व संस्कार छखें निनि व भिंचाया दथुइ मैत्री भावना क्वातुकीगु खने दुसा, मेखें-विष्णुया अंश भाःपाः लुंयागु “पिउचा” न्ह्याकेगु याना वःगु खने दु । “पिउचा” न्ह्याकेत याइगु विधियात छैथि धाइ । छैथि कुन्हु याइगु विधिया संक्षिप्त थथे खः ।

मचा बृगु खुन्हु कुन्हु निनियात सःतके व्छइ । निनिम्हं मचायात छैथि यायेत वसः, वा, जाकि, किसलि ज्वना वइ । बहनि जुलकिं मचा तयातःगु कोथाय् छैथि यायेत बँ इली । अजिचां धर्म मण्डः च्वयाः वा, जाकि मण्डः, मण्डः पतिकं तइ । उकिया द्योने कलश, सुकुन्दा स्वाइ । मण्डः पतिकं मत च्याकेत पाल्चा (चिकं, इताः तयातःगु चायागु सलिं) स्वनि । निनिम्हेसित मण्डःया दथुइ फये तुकी । अजिं मचा निनिम्हेसित लः ल्हाइ । निनिम्हं मचा कयाः मुले तया चिकं बुइकी । चिकं बुइके सिधलकिं न्हुगु प्वाकलं, भोत (लं) फिकी । याये मांको पूजा याइ ।

सकसिनं दक्षिणा छायेके बी । अले सकसितं प्रसाद धका चाकुमहि, फलफूल आदि इना बी । पाल्चाय् मत च्याकी । चित्रलेखा वया भाग्यरेखा च्वया वनी धका मत स्याये मजिउ, चच्छिं च्याकेमाः धाइ । “छैथि” पूजाया ज्या क्वचायेकेत “ह्याउंमचा” निनिम्हेसिनं मचाया बौयात लःल्हाके बी । अजिं दक्षिणा काइ । ह्याउंमचा लःल्हाये सिधलकिं छैथिया ज्या क्वचाइ ।

थ्व छैथि बिधिं छु सी दु धाःसा- ह्याउमचायात षट्ज्योति लायेमाः धैगु कामना याइगु खने दु ।



न्यापु सिखः

लुँयागु तिसात मध्यय् छयँनय् तिइगु छताजि तिसाया नां खः “न्यापु सिखः” । नेवाः समाजय् थ्व न्यापु सिखः तिसा मिसा मस्त मेल अर्थात पयनं बिया व्छइबले जक तिइकीगु तिसा खः । उके थ्व तिसाया महत्व नं सुला च्वंगु खनेदु ।

जीव धैपिं पञ्च तत्वया प्रतीक खः । पञ्च तत्व धैगु लः, फय्, सर्गः, मि व पृथ्वी खः । उके मनुखया जीवन नं पञ्च तत्वय् आधारित खः । गथे कि पञ्चामृत, पञ्चसुत्र-का (पसूका), पञ्च रत्न आदि लक्षणया प्रतीक खः । उके सुं नं जीवात्माया जीवन थ्व पञ्च तत्वं (ब्वनी) सृजना जूगु दु । मानव मृत्यु लिपा नं थ्व हे पञ्च तत्वय् दुसुना वनिइ ।

थ्वहे खँ लुमंके बीत मिसा मस्तय् छयँनय् न्यापु सिखः तिसा तिइका बिया व्छयेगु याःगु खनेदु । थ्व भी पूर्वजपिनि दूरदर्शिता खः ।

नेवाः समाजया दुने विशेष याना सभ्य व तःजि परिवारय् जक लुँयागु न्यापु सिखः तिइका बिया व्छयेगु याना वैच्वंगु खः । न्हापा चीम्हि परिवारय् लुँ सियाः तःगु न्यापु सिखः न्यये कया तिइका व्छइगु नं चलन दु धैगु ज्याथ-जिथिपिनि म्हुतुं न्यनेदु ।

थ्व सिखःया नां “न्यापु सिखः” धाःसां गुलिगुलिं सिखःया कचा न्यापु जक मखु, च्यापु सिखः तया नं दयेका तःगु खनेदु । अष्ट-मातृकाया प्रतीकया रूपय् जव न्हसपन रिखे स्वपु, खव न्हसपन रिखे स्वपु व न्हयोने व लिउने छपु छपु याना च्यापु सिखः माः हना

तःगु नं दु । थुक्रियात बौद्धिक, वैदिक व सांस्कृतिक दृष्टिं अध्ययन
यायेबले न्याय, मिमांसा, सांख्य, योग, वेदान्त व वैशेषिक दर्शन युक्त
खनेदु ।

न्यायव सिखःपु दःसां न्यापु सिखः हे नां जुया चवंगु दु । न्यापु
सिखःया विस्तार पञ्च कुमारीया मान्यता सिर्जना जुउगु नं खयेफु ।

थ्व तिसा भी नेवाः संस्कारय् मिसा मस्त इहि यायेबले, बाहा
तयेबले व बिया छ्वयेबले नं छ्यला वया चवंगु सकल पाठकतय्गु
न्ह्योने दोहरे याये मालि मखु ।

“न्यापु सिखः” नेवाः समुदायस लोकं व्हागु तिसाया ताजि जुया
नं समाजया चवय न्ह्येब्वया कथं कुलिन शैव, बौद्ध संस्कार पद्धतिइ
ला व लुसिया थें सम्बन्ध खनाहे चवनागु खः ।



तिलहरि

“तिलहरि” धैगु गःपतय् क्वखाइगु कलात्मक लुँयागु छताजि तिसाया नां खः । थ्व तिसायात तिलहरि नं धाः । थ्व तिसा नेवाः समाजय् सधुवापिसं (अर्थात् भाःत दनिपिं मिस्तयसं) ह्याउँगु प्वत्या माःया दथुइ तया क्वखाइगु खः । थौकन्हे अप्पो धैथें मिस्तय् सारीया रंग अनुसारया प्वत्यामाःया दथुइ तिलहरि तया क्वखाइपिं नं दु । थ्व तिसा इहिपा याइम्ह मिजं पाखें (बिबहा) बियाहैम्ह मिसाया गःपतय् क्वखायकीगु माः खः । उकें थ्व तिसायात सौभाग्यया चिं नं धाः ।

“तिलहरि” तिसा गुबले निसें भीगु समाजय् प्रवलनय् वल धैगु खँया आतक्क अभिलेख लुया वःगु मदुनि । अथेनं थ्व तिसाया प्राचीनता नेवाः क्षेत्री, ब्रम्हु व शुद्र जाति थ्यंकया समाजय् विधिवत रूपं गुबले निसें इहिपा यायेगु व्यवस्था सिर्जना जुल-उबले निसें थ्व तिसाया आबिष्कार जुउगु खः धका धायेछिं ।

नेवाः समाजय् नेपाल सम्बत १०५० रिखे तक न्यागः वा न्हसगः गौ बाँलुइका त्याया दथुइ कँ बुट्टा लुइका स्वयेहे लोवनापुसे च्वंक दयेका तइगु खः । दकले न्हापां थ्व तिलहरि परि-कल्पना याना दयके ब्यूम्ह ग्राहक व कलाकार लुँकःमि भाजु निम्हेसितनं सुभाय् चेछायेगु औचित्य खना ।

तिलहरि नेपाल सम्बत १०९० रिखे निसें धाःसा तःधंगु व ताहाःगु कलात्मक तिलहरिया पलेसा म्हो जक लुँया बचाःधंगु जक दयेका गःपतय् क्वखाइगुलि गुलिसनं परम्परायागु ढाचां तियेगु चलन जुया च्वंगु खनेदु । थौ म्हिग चिकिचा धंगु गःपतय् सत्तिकक

क्वखाइगु तिलहरियात गुलिं क्षेत्रीतय्सं घटेसि धायेगु चलन वःगु खनेदु । थुकियात नेवाः समुदायय् थें ब्रम्हु, क्षत्री व वैश्य जाति घटेसि नं धायेगु स्वभाविक खः । न्हापा न्हापा नेवाःतय्सं थ्व तिलहरि तिसायात फँसिग्वः घाना तिसा नं धाइगु चलन ज्याथा-जिथितय्गु म्हुतुं न्यनेदु ।

तराइ प्रदेश पाखे तस्सकं लोकं ह्वागु तिसा 'मंगल सुत्र' खः । थ्व उमि ब्याहायाइम्ह मिजंनं ब्याहा याना हइम्ह मिसायात व इलय् मंगल सुत्रया रूपय् क्वखायेकीगु खः । थ्व तिलहरि बचाधंगु दयेका तःगु (घटेसि) तिसायात सौभाग्यया प्रतीकया रूपय् छ्यला च्वंगु खः । वर्तमान इलय् वया तिलहरि व नेवाः सामाजिक (सांस्कृतिक) संस्कारय् छगू क्वातुगु सम्बन्धं अपोसित इहिपाया प्रभाव बियावइ च्वंगु दु ।

नेवाः समाजय् (ब्याहा) इहिपा यायेगु पक्का यायेत ब्याहा याइम्ह मिजंया पाखें बिया हइम्ह मिसा मचायात ग्वय्बिये कुच्छयेगु चलन दु । थौंकन्हे ग्वय्बियेकु छ्वइबले भुइसिन्हः, ह्याउँ सिन्हः, ह्याउँ चुल्या, ह्याउँ सचिका, लुँसिन्हःया नापं तिलहरि तिसानं तया छोइगु चलन जुया वल ।

विधवापिसं तिलहरि तिसा क्वखाये मजिउ धका क्वखाइ मखु । छायाधाःसा तिलहरि लुँया कलात्मक तिसा सौभाग्यया तःजिगु प्रतीकताया रूपय् व्यापक कथं छ्यला वैच्वंगु खनेदु । खास याना तिलहरि तिसा सर्वप्रथम भाःतम्हं थःकलायात थःगु हे ल्हातिं क्वखायेका थकूगुलिं व सिना वन कि मिस्तय्सं पूर्व घटना लुमंका तिलहरि तिसा छता तिइगु त्याग याइगु चलन नं खनेदु ।



कल्या

नेवाः समाजय् मुक्कं नेवाः समुदाय मध्यय् स्यस्यः समूहया मिजं मस्तय् इहिपा न्यात कि सर्वप्रथम भमचा जुइम्हेसिगु छें न्हापा जूसा लाखाकु व्छयेमाः । लिपा लगभग स्वंगू दशक न्ह्यनिसें गुलिसिनं, गुलिसिनं अद्यापि शैव, वैष्णव, शाक्त व बौद्ध सम्प्रदायपिसं लाखाकु काल बिल याना च्वनतिनि । च्वय् न्ह्यब्वया कथं नेवाः समाजय् बिया छूवइपिन्सं सच्छिइ खुगू च्यागू प्रतिशत जक साविक विधि व्यवहार याना वया च्वंगु अनुमान यायेछिं ।

भी अप्पो धैथें नेवाः समुदायया जःपिनि म्हाय् मस्त काल बिल अर्थात इहिपाया अवसरय् मिजं पाखें विधिवत ग्वय्कु व्छइगु व्यापक चलन दु ।

नःलिम्ह भमचा जुइम्ह मिसायात मिजं पाखें गुरुजुपिं छम्ह नापं कल्या न्ह्याकेतः लुं वा वहःया कल्याकु छूवइ । थ्व छगू मिजं पाखें इहिपा क्वछीत भौमचा जुइम्ह मिसायात लुं चुल्यां न्ह्याकीगु प्रक्रिया विधिवत चलय् जुयाहे च्वंगु दु । भीगु संस्कारया ज्याभ्वः सम्पन्न याये न्ह्यो थःगु रिति थिति कथं कल्या धैगु तिसा लक्षणया कथं मिजं मिसाया इहिपा क्वछिइगु भूमिका दु धैगु खँ स्वतः छर्लङ्ग कयं ।

थ्व 'कल्या तिसा' स्यस्यः समुदायया म्हाचाय्मस्त पित बिया व्छया प्यन्हुया दुने खाःस्वःवनेबले बौम्हसिनं लःल्हाइगु न्हूगु वसः हिला वया पय्तुइ । अनं धौ सगं बिइ धुनेवं म्हाचाय्पाके कल्या तोका वहःया कलात्मक मौ (वाइ) तिसां न्हचाकी । अले लुंया अंगू न्हचाका

इष्टमित्र, थःथिति सकलसिनं दक्षिणा तया ख्वाःस्वइ । लिपा बौम्ह,
स्यापिं दाजुकिजां दां तया ख्वाःस्वयेगु चलन दु ।

सम्भवत नेवाः समुदायया प्राचीन युगं निसें कुलिन परिवारया
परस्परय् इहिपा न्याइगु अवसरय् मिजं पाखें क्वछीम्ह भौमचा जुइम्ह
मिसायात कल्यां न्हचाके व्छयेगु प्रथा गबले निसें प्रारम्भ जूगु खः
धैगु खँ अनुसन्धानया विषय जुयाच्वंगु दु ।



पुनायचा

मध्यकालं निसे स्वनिगः दुने नेवाः समाजय् प्रचलित थी थी लुँया तिसात मध्यय् छताजि तिसाया नां खः “पुनायचा” । थ्व महिमामय “पुनायचा” धैगु तिसा न्हापांला लुँयागु कलात्मक चा जक दयेकूगु खयेफु धैगु जिगु अनुमान खः । लिपा व तिसाय् मोति, माणिक व पन्ना पवः थुना दयेकेगु याःगु खनेदु । थ्व लुँयागु चाचायागु लक्षण सिद्ध आयु वृद्धि जुइगु खः । च्वय् न्ह्यब्वयागु तिसाया विषय थी थी शब्द कोषय् बियातःगु धापूत थथे खः।

१. सत्यमोहन जोशीजुयागु “बःचाधंगु नेवाःभाय्या खँग्वःघुकू” नां सफुतिइ-

पुनाय्चा (ना.) बुहा बुही जंकवबलय् न्हायपनय् सुइकीगु
पुन्हाय्चा लुँयाचा : ।

२. ठाकुरलाल मानन्धरजुं मुनादीगु-“नेवारी-इङ्गलीश डिक्शनरी” नांया सफुतिइ पुन्हायचाः-(सं) were okteer thire Jublee celebration ।

३. ईश्वरानन्दजुं सम्पादन यानादीगु-“नेवार- नेपाली-अंग्रेजी शब्द कोश” नांया सफुतिइ-

पुनाय् (सं):- ज्याःजंकर्व लिपा सुइगु मार्वन्निचाः ।

थुकिं सी दत,-ज्याथ-जिथि जंकुबले जक सुइकीगु लुँयागु छताजि तिसायात पुनाय्चा, पुन्हाय्चा, पुनाय् आदि धाइगु खः । उकें न्हापां ज्याथ-जिथि जंकुया खँनी सियेके माल ।

नेवाःतय् जंकु निगू कथंया दु -१. मचा जंकु । २.ज्याथ-जिथि जंकु । ज्याथ-जिथि जंकुयात थौकन्हे बुहा-बुही जंकु अर्थात भीमादि रथारोहण नं धाइ ।

१. मचा जंकुः निगू कथंया दु - क) म्हचामचा जंकु ।

ख) काय्मचा जंकु ।

क) म्हचामचा जंकु ५ न्याला क्यनकि याइ ।

ख) काय्मचा जंकु ६ खुला क्यनकि याइ ।

२. बुह्रा-बुह्री जंकु :- बुह्रा -बुह्री जंकवः न्याक्वः तक यायेमाःगु खँ “भीम रथारोहण यज्ञ बिधि” नांया थ्यासफुतिइ च्वया तःगु दु । थ्व थ्यासफू नेपाल सम्बत ८२४ चैत्र शुक्ल एकादशी कुन्हु जुजु योग नरेन्द्र मल्लया पर्यायस, चौतारा (प्रधान मन्त्री) बखुंबाहाःया कायस्थ आनन्दहरि भारोया बेलस च्वया तःगु खः । थ्व खँ डा. जनकलाल वैद्य व प्रेम बहादुर कसाःया सम्पादनय् नेपाल सम्बत ११११ स पिदंगु आशा सफू कुथिया वर्णनात्मक सफूया धलः या पृष्ठ २०० स छापे जुउगु दु ।

थ्व थ्यासफुतिइ न्हयथनातःगु कथं न्याक्वःतक याइगु बुह्रा-बुह्री जंकुया नां थथे न्हयब्वयातःगु खः ।

- १ भीमरथारोहण २. सहश्रचन्द्ररथारोहण ३. महारथारोहण
४. देवरथारोहण ५. महादेवरथारोहण ।

नेवाः समाजय् न्हय न्हस दँ, न्हयला, न्हसन्हु, व न्हसगु पला थ्यनकि दकले न्हापांगु ज्याथ-जिथि जंकु याइ । थ्व ज्याथ-जिथि जंकुयात भीमरथारोहण धाइ । थुबले न्हसपनस (न्हय्पनय) लुँयागु कलात्मक मौलिक छगू चाःचां सुइकी । थ्व चाःचाया नां पुनाय्-पुनाय्चा -पुन्हाय्चा खः । निक्वःगू जंकु याइबले निचाः पुनाय्चा दइ । स्वक्वःगु जंकु याइबले स्वचा पुनाय्चाः दइ । प्यक्वःगु जंकु याइबले भ्यातुइ धका न्हापायागु चाचा फुककं त्वया प्यंगः बहुमूल्य पु थुनातःगु पुनाय्चां सुइकीगु नं लोकं व्हाःगु चलन दु । थ्वथेतुं न्याक्वःगु जंकुबले न्यागः ग्यसु दुगु पु थुना तःगु पुनाय्चा तिइकी । थथे पुनाय्चा तिइकीगुया मूल उद्देश्य थथे खनेदु ।

१. देवत्वया तँगिनय् थ्यने धुंकूम्ह धका म्हसीकेगु ।

२. नवग्रह नं रक्षा यायेमा धैगु भावना व आस्था
३. सुस्वास्थ्य व दीर्घायु जुइमा धैगु कामना ।

थन थाय्लाक छता लुमंके बहःगु खँ दु व खः जिथि (बुही) जंकुया खँ । सधुवाम्ह मिसाया उमेर मगाःसां भाःतम्ह लिसेतुं ज्याथ जंकु जुइ । विधवाम्ह मिसा जुल धाःसा उमेर पुरा दतकि तिनि जिथि (बुही) नामं जंकु जुइ । थुबले न्हापां तियातःगु ब्याक्क तिसा त्वका पुनाय्चा नांया कलात्मक लुँयागु मौलिक तिसां तिइकी ।

निक्कःगु जंकु ८३ चय् स्वदँ ४प्यला व ४ प्यन्हु दतकि जुइ । स्वक्व जंकु ८८ चय् च्यादँ ८ च्यान्हु कुन्हु याइ । प्यक्वःगु ९० रवीदँ ९ गुला व ९ गुन्हु कुन्हु अले न्याक्कःगु जंकु १०० सछिदँ १० भिन्हु कुन्हु याइगु खः ।

थ्व 'पुनाय्चा' तिसा आदिवासी नेवाः समाजय् अति महिमामय, सम्मानगु मौलिक ऐतिहासिक तथा सांस्कृतिक मूल्य व महत्वं जाःगु लुँया तिसा खः ।

च्वय् न्ह्यब्वया थें नेपाःदेया आदिवासी तामांग उप जातिया मिजंत न्हय न्हस दँ क्यने साथं हे 'बीरबल' धैगु धातुया चाः सुइमाःगु परम्परा दु ।



पर्यंति

नेपाः गाः या स्वनिगः दुने मध्यकाल निसैं नेवाः जाती द्यो द्यो पिन्त अनेक लुँ वहः या तिसात छायेगु थिति रितित दोलंब्दः दँ निसैं चले जुया वया च्वंगु खनेदु । भीगु समाजय् व्यक्ति व परिवारया सांस्कृतिक संस्कारया ज्या सम्पन्न जुइबले मिजं व मिसातय् लुँ वहः या कलात्मक तिसां तिइकेगु पुलांगु मौलिक परम्परा दु । ऐतिहासिक तथ्यत लुमंका स्वयेबले द्यो पिन्त न्हापा तिसा छायेगु शुरु यात अथवा मनूतय्सं तिसां तिइगु न्हापा परम्परा दयेकूगु खः थ्व अनुसन्धान हे याये मानि थें च्वं ।

भिन्त्यागू शताब्दी पाखे भगवान बुद्धयात छुं भीगु मौलिक तिसात चढे याना तःगु अभिलेख थन न्ह्यो ब्वया च्वना ।

१. उन्नमः श्री श्री श्री अक्षोभ्याय “श्लोस्तु” सम्बत ६०७ यंराथ्वक पञ्चमि थ्व कुन्हू तमुगुरित्वर रत्नाकर महाविहालया शाक्य भिक्षु श्री रुपदेव
२. प्रमुषन शाक्ष भिक्षु श्री जय जय सिंह देव शाक्ष भिक्षु श्री पुणदेव रगणतववाहालया बज्राचार्य जिनदेव रगणमहागुरिया शाक्ष भिक्षु श्री देवमुनि रगण ।
३. वंता वहालया शाक्ष भिक्षु श्री जय सिंह थ्व पनि समुच्चयन ल्हूति महा सिद्ध गुहास सिवाजुताव, श्री श्री श्री आदि बुद्ध प्रितिण थ्व सुवर्ण ।
४. कंथि, पर्यति, हृदय फोल , दोहलपा जुरो । थुतिया पूर्णेन इहलोके सुख संपति परत्रव सुखावति प्राप्नुयात् ॥ थ्व कंथि सुनानं लोभ यातसा ।
५. पञ्चपातक लाक जुरो । लोभ मयातसा थ्व परमेश्वलया सुदृष्टि लाक जुरो । शुभमस्तु सर्व्वदाकारं । शुभ ।

चवयया अभिलेखया तथ्ययात थन संक्षिप्त रूपं ध्वाथुइकेगु स्वयाचवना । यें तमगुरी त्वालय रत्नाकर महाविहारया श्री रूपदेवया प्रमुखताय् चवये न्ह्य चवयागु स्वताजिया तिसात वैशाक (स्वांया) पुन्हि बेलस भगवान् अक्षोभ्य बुद्धया सेवास न्याम्हया समूचचय नं छायेगु यागु अनुमान याना चवना ।

मध्यकाल अर्थात भिन्न्यागु शताब्दीस शान्तिदूत अक्षोभ्य बुद्धयात गपते क्वखायेगु कथि, छातिइ क्वखाइगु नुगः चुइ दिइगु हृदय फो (जन्त्र) व न्हायपनय् तिइगु प्येकुं लागु पयति ध्वखँ न्ह्येथनागु स्वताजि तिसात धर्म चित्त उत्पति जुया भक्ति स्वरूप बुद्ध अक्षोभ्ययात छायावंगु घटना भी मनूतय्त त्याग यायेगु मार्ग दर्शन जुइफु ।

भी थाय् आदि युगं निसें स्वनिगः दुने ब्रम्हु, वर्मा (क्षेत्री) वैश्य व शुद्रतय्सं सनातन थिति रिति कथं थःगु हे पहलं नेवाः जाति, उपजातिया छेंस मचा जंक्व याइबले न्हायपनय् मार्वलि लुंया चाःचा सुइकेगु न्हापां निसें यागु सनातन संस्कार खः ।

अथे हे कुलिन जहान परिवारया मिजं मचातय् बुसँखा, कयतापूजा चुडाकर्म शैव, वैष्णव, साक्त व बौद्ध सम्प्रदायतय्सं थः मस्तय्त न्हायपनय् लुंया पयति तिसां तिइका वया च्वंगु न्यासः दँ व छगू दशक पुले धुंकल । भीसं समाजय् विशेष याना नेवाः समुदाय चुडा कर्म, कयतापूजा महान पर्वय् निगू स्वंगू दशक न्ह्यो तक्क जा लक्षण युक्तगु लुंयागु पयति तिइके बिया च्वंगु स्वयापिं नं भी हे खः ।

ध्व पयति लुंया कलात्मक प्यकुं लाःगु मिजं मस्तय् संस्कार पर्वय् जक तिइके माःगु परम्पराया दुने पक्का नं दार्शनिक भाव दुपिना च्वंगु मदै धका धाये थाकुउ । चोभाःया आदिनाथयात नं लुंया पयति तिसा तिइका तःगु अःपुक स्वः भायेफु । थय्क सोच बिचार याना स्वयेबले चवय न्ह्यचवयागु तिसा तिइकेगुयाः तात्पर्य इज्जत प्रतिष्ठायालागि प्रयोग वःगु अवश्य मखु ।

बरु पयति तिसा परम्परागत शुभ संस्कारय् तिइकीगु इलय् थः कुलया काय् मस्तय्त छँया ज्याथ -जिथि, गुरु व पुरोहितं वमचा यात कय्ता पूजाया अवसरे सुस्वास्थ्य, दीर्घायु व उत्तरोत्तर प्रगति याना कूल थामे याना नां तयेत सक्षम जुइमा धका आशिका बियेगु धाःगु खँ बुहापाका पाखें न्यनागु दु ।

भीगु समाजय् न्हापाया आजुपिन्सं क्यना थकूगु लँपु कथं लुँया पयति तिसां जन समूहसं छगू आकर्षक प्रभाव तोता थकूगु दयेमा धका भापिया च्वना ।

सम्भवतया प्रबुद्ध समाजसेवी अनुभवि वा आजु तँयापि कुलिन जःया भद्र मिजं (पुरुष) वा मिस्तय्सं पयति तिसाया सम्बन्धय् थथेनतुं कंथि व हृदय फो तिसा तय्गु दकले न्हापा मनुखं तिइगु यात बा देव देवीपिन्त नि छाया तिइकेगु यात सिइकेमाः । पयति तिसा शुभ संस्कार चुडा कर्म कय्ता पूजाबले तिइगु दार्शनिक परम्परायात म्वाका तयेनु ।

थ्व रचना सम्बन्धी आलोचना सुभाव बियादिइपिन्त लसकुस व सुभाय् देछायगु औचित्य खना ।



तायो तुकि

स्वनिगः दुने नेवाःतय्गु ख्वातुगु वस्ति यें, यल व ख्वप नगरसं कृषि व्यवसायसं जीवन हनेगु याना वया च्वंपि मनूत न्हस न्यागू निसें चयगु प्रतिशत दयेमा धइगु अनुमान याना । खयत जा जिं न्हचव्वयागु कृषक तय्गु संख्या बांलाक दुवाला स्वत धाःसा अपाय्स्क पाइमखु ताया ।

भीथाय् मध्यकालं निसें थौं मिहगः तकया आधुनिक युगसं ख्वप नगर व गां क्षेत्रस मेमेगु व्यवसायया तुलना यायेबले अपो स्थानीय जन संख्यासं आपा याना बुं ज्याय् हे व्यस्त जुया च्वंपि दु धयागु स्वतः सियेके फु ।

नेवाः समाजय् न्हापाया युगं निसें भिंंच्यागू- भिंंगुगू शताब्दी तकक नं स्वनिगःया यें, यल व ख्वपय् कृषि पेशाय् च्वंपि मिजंतय्सं लुंया तिसाया ताजि अतिभनं कम जक न्हिया न्हिथं लिइगु खनेदु । गथे कि शैशवसं न्हायंपनय् चाचा, पयति, न्हासिचा, प्रौढ बैससं ख्वप जिल्लासं नगर व अने अनेगु गां विकासया दथुइ नदे, व्वदे, थेमि, व चिधं थेमिया नगरपालिका लागाय् गां पातसं च्वना च्वंपि स्वतन्त्र बुंज्याय् व्यस्तपि मिजंतय्सं ईया कथं म्हो नं मध्यकाल निसें “तायो तुकि” लुंयागु पुरा कलात्मक मिस्तय् निपा न्हायंपनय् तिइगु याःसा मिजंतय् जःगु न्हाय्पं च्वकाय जक बाकुगु “तायो तुकि” सुइगु याः । थेमि, बुरे व नरेया बःचा धिकपि युवा उमेर प्रवेश जुइ त्यपि मिजनतसें न्हापाया परम्परा कथं ध्वम्प्वालय् पूजा याना नाग (ध्वम्प्वाखा) या नामं तायो तुकि छाना लानाकया ताआयु दयेमा धका गबलेनिसें न्हचव्वयागु तिसां तिइगु यात थ्व अन्वेषण अनुसन्धान याये बहः जू ।

खयत ला स्थानीय दाजु किजापिन्सं थ्व तिसां तिइत स्थानीय नियम परम्परा पालन याना जक तिइकेगु याना वयाच्वंगु न्यना । धातथें

ध्वा थुइका छाया तिइगु धका न्यना थुकिया दर्शन व अर्थ छु दुले सूपिन्सं कनेगु कष्ट याये मालिला वास्तवय् ठिमी, बुरे पाखे छैँखाय् थः जःया काय् मस्त दयानं मतपिं, दीर्घायु मजुउपिं वा सुं गुम्हसिया याकः काय जुल धाःसा मस्तय्गु उन्नति, सुस्वास्थ्य व दीर्घायु जुयेमाः धैगु स्वच्छ भाःपिया विश्वास कथं विधि पुरे याना 'तायो तुकि' तिइकिइगु चलनं ताकाल तक निरन्तरता काःगु खः ।

भीगु प्राचीन समाजय् मानव कल्याणया स्वच्छ भावं लःया अधिपति नागराजयात गन व पुलांगु कलात्मक लुँयागु परम्परागत 'तायो-तुकि' तिसां छाया पूजा आराधना याना रोग व्याधि व भूत प्रेत पिशाच पाखे मुक्त ज्वीगु विश्वासया अटल छाप लाना च्वंगु दु ताया अन समाजया भावि निर्माण कर्ता मस्तय् उन्नति, सुस्वास्थ्य व दीर्घायुया आशिका याना च्वय् न्हचव्वयागु तिसां तिइकिइगु खँ अःपुक सियेके खन ।

शहरी क्षेत्रय् थें गां रिखे स्थानीय विद्वानपिन्सं भी पुर्खां क्यना थकूगु मार्ग दर्शनयात दुनुगलं निसें पत्याःव विश्वास याना परम्पराया जातिय तिसा 'तायो तुकि' ज्यापुतय्सं तियेगु नं (ज्यापुं) थःगुहे मौलिक लक्षण व गौरवया खँ खः । थःजाःगु न्ह्याइपुगु जन कल्याण जुइगु चलनयात परन्तु म्वाका तःपि स्थानीय ज्यापु दाजु, कका आवापिन्त दुनुगलं निसें सुभाय देछायेगु सकलया सामुहिक कर्तव्य थें जिं सुभाव प्रस्तुत याना च्वना ।

मेगु छगू कलात्मक स्थानिय 'तायो तुकि' तिसा ताजिया विशेष च्वय न्हचव्वयागु सिबेनं ऐतिहासिकं व गहन खँ व तथ्यत दत धाःसा कुतःयाना माला तना बियादीत अन्वेषण अनुसन्धान यायेत जिं सामुहिक इनाप यायेगु बेश जुइ ताया । खय्त व ऐतिहासिक तिसा तिया नं बिभिन्न थासय् तरकारी बने ज्या वइपिं दाजुपिन्सं थःगु न्हाय्पनय् तायोतुकि तिया जूगु निगू निगूत्या दशक न्ह्यो तक जा भीसं खना च्वनागु नं खः । आ वया ख्वप जिल्लाया अनेगु गाँपातया दाजु किजा, कका धायेमाःपिके

आधुनिक युगया प्रभावं याना अपो मात्राय् 'तायो-तुकि' तियाजू मदया वन ।

वास्तवय् भी सकल नेवाःतय्सं सामाजिक परम्परा निसैं संस्कारय् मान्यता दूगु तिसा सदां सर्वदां न्हूगु पुस्तां साविक निरन्तरता बिये माल ।

भी समाजया ल्याय्म्ह ल्यासेतय्सं नं स्थानीय जःपिन्त हितसुख जुइगु जूसा पुलांगु मौलिक जातिय संस्कार छयला वनेगु वा मदिकेगु कुतः नं बहुजनया कल्याण जुइ ताया ।

थःथःगु जातिय लक्षण युक्तगु रिति धिति ऐतिहासिक परम्परायात म्वाकातयेःगु स्वत धाःसा भीगु जातिया गौरव बृद्धि जुयावं वनिगु स्पष्ट इंगित याइला धया थें भाःपिया च्वना ।

अन्तय् धायेगु हे खःसा च्वय न्ह्यच्चव्या थें पुलांगु परम्परागत लुंयागु कलात्मक मौलिक तिसा ताजि 'तायो तुकि' थें, यलया तुलनाय् ख्वपपाखें जीवन्त जुया च्वंगु खः । आ व नगर गां पातय् नं कृषक बाजः वंपि तोता ल्याय्म्हतय्सं पुलांगु लुंया भूयातुगु तिसां तिइगु म्हो याना हल ।

ठिमी, चिथेमी, नरे व बुरे धाःसा मिजंतय्सं तिइगु लोक संस्कृतिया थाय् काये धुंकूगु स्थानिय मिजंतय्सं तिइगु लुंया कलात्मक 'तायो तुकि' चिटिक्क च्वंगु खः । नेवाः जिल्लारिखे परापूर्व कालं न्हापा न्हापाया मिसा मिजंतय् सामाजिक प्रतिष्ठा दुगु व दार्शनिक तिसा मखइ धका गथे धायेगु ?

थ्व प्राचीन लुंयागु तिसा नं नेवाः संस्कृतिया ताजि अवश्य नं दुथ्फगु स्थानीय लोकं व्हागु जुयानं तायो तुकि मनुखं तियेगु याना जुल खइ धयागु खँ पटक्क नं संकोच यायेमाःगु जिं मखना । पुलांगु समाजय्

नसा तिसा व तँसाया गुलि मूल्य व मान्यता दु धयागु खँ अप्पोसिनं
सिउगु खँ नं खः । धाइ नापं थः थःगु गक्ष व औकात कथं मनुखं धेबा
दइबले निर्माण याकि अले मदइबले वहे सामग्री नसा जुइगु नं स्वभाविक
खँ खः ।

गुलिं ज्याथ-जिथिपिन्सं सिइबलेयात अडके जुल धाःसा तिसां नं
मजि मगाःगु सामाजिक गर्ज तरे यायेगु ज्याय् ग्वहालि जुइ धाइपिं नं
मदुगु मखु ।



वहःया सिखः

नृतत्वविदतयूगु धापू कथं नेपाःदेश स्वनिगःया आदिवासी नेवाः महिषपाल, गोपाल व गोमी पक्का नं नेपामि खः धैंगु गोपाल वंशावली हे क्वातुगु दसि खः । नेवाः समुदायया दुने थी थी जात व उपजातित दु । आपालं थी थी जात व उप जातित मध्यय् मल्लकालीन ताडपत्र, सिजःपौ व शिलापत्र कथं न्ह्यच्चवया तःगु छगू जात भावो नं खः । भावोयात मल्लकालं निसैं ज्यापु धाइ । ज्यापु जातया दुने कुमाः (प्रजापति) आय्वा, डंगोल, सुवाल, धंगु, महां व संगः आदिनं मल्लकालीन ऐतिहासिक अने अनेगु अभिलेखय् न्ह्यथना तःगु दु । थौंकन्हे युगकथं ज्यापु थर च्वये मन मदु-पिसं महर्जन, सिंह व डंगोल आदि च्वयेगु याना हःगु दु । थुमिगु मूल लजगाः (पेशा) ज्या, बुज्यायेगु, कुमाःतय् चाया-कलात्मक मौलिक प्रविधि थल बलत व उगु ईःया भाजं, कौं, दुबली, हासि, कुलिंचा, देवा, मकः, वंलाः, भेगः, धौभेगः, सलापा, सलि, दुगंसलि पालचा, सोमा 'घःचा' त्वादेवा आदि थल बलत दयेकेगु वा उत्पादन ज्या नं याना वै च्वंगु दु ।

भावो जात यापिं अपो कृषकतय् परम्परागत लजगाः अन्न फसल सयेकेगु, तरकारी पियेगु नापं नखः चखः बले बाद्य वादन व बाँय पुया जीवन न्ह्यइपुकेगु खः । उमि पुर्खाकथं संस्कारया ज्या भी छसिकथं मिजं मस्तय्त्त मचा जंकु, बुसखा, कयता पूजा याइसा मिसामचातय्त्त नं मचा जंकु, इहि, बाह्रातय्गु ज्या सम्पन्न याइ । उमेर जाया वयेवं मिजं व मिसा ल्याय्म्ह-ल्यासेतय् दथुइ इहिपा (शुभ बिबहा) सम्पन्न अनिवार्यकथं याना वै च्वंगु दु ।

मिजं मस्तय्त्त व मिसा मचात ल्याय्म्ह, ल्यासे जुलकि परम्परा कथं भमचा कोछिना मां अबुया निर्देशन कथं विधिवत थःगु हे मौलिक बाद्य वादन, बाँसुरी (वय्), धिमे, भुस्या थाना लोक म्येया न्ह्याइपूगु सः

श्वयेका मनोरञ्जन याना इहिपा (विवाहा) याइ । थथे इहिपा:याना स्वावलम्बी कथं आत्म गौरवया अनुभव याइ ।

मचा जंकु याइबले मचायात लूयागु मारबलि जंकु चाचां: सुइका वह:यागु ददंगु छस्याप् कल्लि न्हयाकिइगु चलन खनेदु । श्वथेंतुं मिसामचातय् इहिपा जइबले न्हायपनय सिजलय लं सियागु माक:मि सुइका, छातिइ वह:या कलात्मक (गिकली) सिखल क्वखायेका, तुती वह:या कलात्मक फुसुलुगु सिख्वा: बुइा दुगु कल्लि न्हयाका सरबल निथ्वायनं सँतफलि (मोतासा) तया कोचिक पाना समां याइ । श्वयात हे सौन्दर्य उपासना धाइ । थुपिं प्यताजि तिसा मध्य वह:या सिखलं हे मिसा मचाया सौभाग्ययात म्वाका तइ । श्व लक्षण युक्तगु वह:या सिखलं क्वखाये खनकि व मिसा मचाया जीवनय् उन्नति प्रगति, सुस्वास्थ्यया नापं दीर्घायु जुइ धैगु जनधारणा व्यापक दु । वह:या कलात्मक सिखलं क्वखायेगु खं नं दिप्पा मबिइगु चलन मल्लकालया प्रारम्भं निसें हे जूगु जुइमा धैगु बुइा पाकातय्गु धापू न्यनेदु । श्व वह:या सिख:यात गनं भिसिख: अर्थात सिकाली सिख:नं धा: । श्व सिकाली सिखलय् लिसंतये मजिउगु धैगु नं व्यापक धारणा दु ।

चवय न्हचब्वयापिं जातया समुदायस आर्यावलोकितेश्वरया साधना आराधना यायेया निमित्त सँलहु गुथि मदुगु त्वालय् भरसक चवने मज्यू धैगु कथन न्यने दु । यल, यें व ख्वप स्वनिगलस ब्याक्क धैथें इमि दाफा भजन सिनाज्या मे हाला, फागु बले व जँला सिवाय द्यो द्योपिनिगु स्मारके स्थल थ्यंक वना रहर यायेगुहे संगीत व भजन जीवन इमिगु समाजय् अभिन्न परम्परा जुइमा: थें ताया ।



सिन्चा

सिन्चा धैगु छयोंयागु सँ निखे छवयाः सीदयेकाः वःगु धवःयात धाइ । नेवाः संस्कृतिङ्ग सिन्चायात तःधंगु मूल्य व मान्यता बिया वया च्वंगु द ।

इहिपा जुइ धुकूपि मिस्तय छयोंनय सँया भलिङ्ग भइ सिन्हः वा ह्याउं सिन्हलं सिन्चाधवः तयेगुयात सिन्चाँ छायेकेगु धाइ । भुइसिन्हः गणेद्योया योगु सिन्हः खः । मिस्तय छयंनय भुइसिन्हः सिन्चा छाइगु मंगलया प्रतीक खः ।

तर गुभाजु, बरे (शाक्य), उराय, ज्यापु, सायमितय् अथे मखु, मजू, इमि देगु पूजाय् मिसा मचातय् सिन्चा तयेमाः । स्वया दिसँ 'बःचा-धंगु-नेवाः खँवः धुकू ' । सं. सत्यमोहन जोशी ।

सिन्चां फायेगु धैगु हे छयंनय च्वंगु सँयात निब्व थलाः धवः सीदयेकेगु ज्यायात धाइ ।

नेवाः समाजय् नं शैव, शाक्त व वैष्णव समुदाय दुने दिगु पूजा कुन्हु इमि दैय् छकः इहिपा जुइ धुकूपि मिस्तय्तला स्वतः सिन्चा, सिन्हः व कलात्मक लुँया सिन्चा तिसां तिङ्गु अधिकार प्राप्त जुइ ।

इहिपा मजुनिपिं इहि, बाह्रा तये धुकूपि मिस्तय्त नं दिगु पूजा कुन्हु भुइ सिन्हःया सिन्चा तयेगु नैसर्गिक अधिकार दु । मेमेगु संस्कार वा कूलया पूजा जुइबले कुमारी मस्तय्त सिन्चा तयेकेगु अनिवार्य मदु । नेवाः समाजया मिसातय् दिगु पूजा मोहनी व मेमेगु विशेष पर्वया पूजाबले विधिपूर्वक प्रतिष्ठा प्रसाद भाःपिया थकाली नकिनं सिन्चा धुछि भुयूसिन्हः तया बिङ्गु परम्परा दु ।

वर्तमान समाजय् स्यस्यः शैव, शाक्त व वैष्णव समुदायया म्हचाय् मस्तयत् लुंयागु कलात्मक तिसां तिइका नेपाल संस्कृतियात नं संरक्षण याना वैच्वंगु खने दु ।

नेवाः समाजया कूल परम्परा कथं इहिपा जुइगु शुभ इलय् भाःतम्हं कलाःम्हेसित सिन्चा फायेगु वा सिन्हः छायेका बीगु परम्परा नं दु । अनं निसें शुभ इहिपा जुइ धुकूम्ह मिसां मोहनी, दिगू पूजा आदि विशेष पूजाय् सिन्चा तयेगु अधिकार प्राप्त जुया च्वंगु नं दु ।

भी समाजय् थः थः कुलया सद्दे दाजु किजायात विधि व्यवहारय् स्याः न्यापिं जःपिनि काय्मचायात व म्हचाच् मचायात बिया छ्वयेगु इलय् पुतु ग्वय बिया विधिवत भूमिका निर्वाह याये हे माः । थ्व हे कारणं सिइ बुइबले यावत् कुल परम्परा थकालि व समूहया सल्लाहं पिता पुर्खाया नां तयेगु सामूहिक अभिभारा क्वबी माः । जःलय अनुशासन तजिलजि, मान मर्यादाय् क्वमिलु जुया निरन्तरता बिइत थकालिम्ह काय् विवेकशीलम्ह जुल धाःसा कूल थामय् यायेगु योगदान स्वतः याइ । अले वहे सपूतम्ह काय्मस्त व मेपिन्त अर्थात् भविष्यया कर्णधार मस्तयत् नं प्रेरणा जू वनि ।

मेगु खँ सुयानं छेंया काय्पिनिगु थयेनतुं चाहे बिया छ्वये धुकूम्ह वा मधुकूनिम्ह सकस्यां पनपक्ष मयासे समब्यवहार याना वने फःसा आनन्दं काल बिल यायेगु सक्षम ज्वी फै ।

थयकः स्वयेबले भीगु समाजय् चलेजुयावया च्वंगु गुलि नं लुं वहःया सहस्र तिसा तय्गु ताजिया ल्यूने सत्य, निष्ठा व आदर्शया दर्शनं सम्पन्न जुया च्वंगु पुर्खाया परम्परां हे कयेच्याना च्वंगु थें ताया ।

नेवाः समाजय् इहि जुइ धुकूपिं मिस्त शक्तिं सम्पन्न जुल धैगु मान्यता दु । थुकिं थ्व खँ सिइके फुकि इमिगु छ्यँनय् सिन्चा छाइबले

गबले तक्क भातःम्ह जीवित जुया चवनी उबले तक्क अटल सौभाग्य व
भाग्यमानिम्ह मिसा खः धैगु मान्यता दु ।

मिस्तय्गु जीवनय् सिन्चा व थः भातःपिं दतले सदा सौभाग्यवती
जुया चवने खनिगु हे तःधंगु सौभाग्यवतीया भागिदार नं खः धैगु प्रमाणित
जू । मिस्तय् लागी श्रीमान् अर्थात भाःत व ह्याउंसिन्हः न्ह्याबलें
उपभोग याये दैगु कारण हे सिन्चा नं छगू भाग्यया अभिन्न महिमामयया
प्रतीक नं खः धायेगु पायछि जू ।

नेवाःसमाजया परम्परा कथं विधवा जुलकि ह्याउँ वसतं तियेगु,
चुरा (चुल्यां) न्ह्यायेगु अधिकारं विमुख जुइगु स्वतः चलन दु ।

न्हापाया समाजय् नेवाःतय्गु शीरवन्दी तिसाया ताजि सिन्चायागु
प्रतीक थें ज्या कया वया च्वंगु खने दु । लिपा नेवाः समुहय् थःथःगु
क्षमता सुथं लाना आर्थिक उन्नति यायेगु सक्षम जुया वसेलिं सिन्चा
अलगहे तिसाया ताजि कथं लुंयागु कलात्मक तिसाया विकास जुया वःगु
खनेदु ।



चा

थ्व नेवा समाजया परम्परागत तःजिगु जःया परिपक्व भद्र मिजं तय्सं मध्यकालं निसैं गुथिगाना, नखः चखः व विशेष पर्वबलय् तिइगु तिसा खः । न्ह्यागु न्ह्याथे हे दःसां नं उच्च व सुक्ष्म कलात्मक तिसाया नां खः 'चा' ।

थ्व 'चा' तिसा थौंया परिस्थितिइ तस्सकं म्हो जक नेवाःतय्सं सुइगु याः । न्हापा 'चा' धैगु तिसाया रूप्य ज्या जंक्वबलय् तिइकिइगु पुनाय्चासिकं तःचाः । थुकी शोभा बढे जुइक भुमका क्वसं खाना बलाचा नं तया तःगु खनेदु । थ्व भुमकायात बलागु पताः निगूया दथ्वी लाका तःगु बृत्ताकारय् भिम्पु, स्तरीय मोति थुना तःगु दु । वहःया भुम्कय् चाकःछिं पन्ना व मोति थुना बांलाक दयेका तै तःगु खनेदु । लुंया निबला कलात्मक पताखय सिथय् म्हयखाया पा थें जोगु बुझां छायापिया तःगु खना । अले लुंया चाया घेरा पाँचं निसे सात सेन्टि मीटर दयेमा धैगु अनुमान यायेछिं ।

थ्व छगू कथं तःजिगु कलात्मक लुंया तिसाया ताजि काचाक्क छकलं निज्व स्वयेगु भीसं मनसाय याःसा नं उपलब्ध जुइ थाकुइला धै थें ताया । वास्तवय् च्वय् न्ह्यब्वयागु पुलांगु कलात्मक तिसा खः । मिस्तय् थें मिजंपि नेवाःतय्सं न्हापां तिइगु थ्व छगू बय् बय् प्रशंसा यायेबहगु सम्पदा खः ।

भीसं भीत धायेगु खँ जा मखु अय्सां नं थौं म्हिगः हे नं नेवाः समाजय् थुजोगु कला व संस्कृतिं सम्पन्नगु तिसाया ताजि सकलया न्ह्योने तये दैगु नं अहो भाग्य नापं गौरवया खँ जुइ ताया ।

थय्क स्वयबले जा यक्किन याना हे धायफु कि मेमेगु जाति उपजातिं भीसं थें लुँ वहःया अपो तिसाया ताजि छ्यला च्वंगु दयेंहे थाकुइला धै थें ताया ।

स्वनिगः दुने छ्यला वंगु थुगु 'चा' तिसायागु विशेषता मुक्कं लुँ वहलय्, पन्ना, मोति नापं थुना तःगु सम्पन्न परिवारं जक हे तिइगु जुइ धका धायेछिं ।

जिं स्वयेबले मल्लकालया अन्तिम ई पाखे थ्व तिसा जुजुया जःपिन्सं, भारदार व व्यापारीतयसं विशेष अवसरय् जक तिइगु तिसा थें च्वं ।

थ्व कलात्मक तिसा शताब्दीयां न्ह्यो बिचाःयाना दयेकेगु कोजिकुउम्हे ग्राहक व लुँकःमि निम्हसित नं भी सकलसिनं सामुहिक सुभाय् देछायेगु औचित्य जिं खना ।

वास्तवय् च्वय न्ह्यब्वयागु 'चा' तिसाया अर्थपूर्ण दार्शनिक भाव व उकियागु रोचक तथ्य पुरोहित नापं संस्कृति व कलाविद्वतयसं प्रस्तुत याना ब्यूसा जिउ ।

च्वय न्ह्यथनागु 'चा' या विवरणयात माल धाःसा सुभाब व आलोचना वये फु धैगु अनुमान याना । सकल कला संस्कृति प्रेमियसं थःयाके दुगु मौलिक तिसाया ताजि भीगु साहित्यया धुकुति बिया वनेगु सामुहिक कुतः याना दिसं ।



शिर बन्दी

लुंया तिसात मध्यय् छताजि कलात्मक तिसाया नां खः “शिरबन्दी” । ‘शिर’ संस्कृत भाषाया खँग्वः खः । थ्व खँग्वःया अर्थ छयँ खः । छयँनय् तिइगु तिसा जुया हे थ्व तिसायात शिरबन्दी धाःगु खः । थ्व शिरबन्दी तिसा नेवाः समाजय् मध्यकाल निसें छयला वै च्वंगु खने दु ।

थ्व नेवाः समाजय् मध्यकाल निसें सत्यं शिवं सुन्दरम्या प्रतीक स्वरूप व्यापक प्रचलित जुया वैच्वंगु तिसा खः । मानव जीवनय् दकले तःजिगु अंग छयँ खः । छयँनय् तिइगु तिसा जुया हे शिरबन्दी नां जुजुगु व दकले तःजिगु लुंया तिसाया ताजि रूपय् हनाबना तया वैच्वंगु नं दु ।

जीवया मूलगु अंग नं छयँ खः । छयँनय् तिइगु मेमेगु तिसाया सिबें थ्व शिरबन्दी तिसाया स्थान च्वय लाः । थुकी सत्यं, शिवं सुन्दरम् थथेहें तात्त्विक तर्क सत्य निष्ठा व प्रतिबद्धताया भावना नं सुला च्वंगु दु ।

भीगु समाजय् थ्व शिरबन्दी तिसा ततःधंगु नखःचखः जात्रा मेला व पारिवारिक (चुल्ही) भोछि भवय्ले मिसातय्सं तिया वइ ।

छयँनय् शिरबन्दी धैगु मिसातय्सं जक तिइगु प्रतिष्ठां सम्पन्नगु तिसा मध्यय् छगू खः । भी समुदायस मिसातय्सें थ्व कलां सम्पन्नगु तिसा विशेष भिंगु ज्याखँय् जक तिइगु याइ । भीगु जातिइ भिंगु ज्याखँ धैगु इहि, बाहा, मचा जंक्व, कयता पूजा, इहिपा, दिगु पूजा, ज्याः जंक्व व कुमारी पूजा मोहनि नखः आदि खः ।

थुकिं थ्व स्पष्ट जुजु कि छयँया थ्व तिसा सौभाग्यया तःजिगु चिं खः । उकें थ्व लोकं व्हागु तिसा सधुवा मिसापिन्सं जक तिइगु खः ।

शिरबन्दी लुँया तिसा मेमेगु क्षेत्री, ब्रम्हु व मतवाली समाजय् नं
न्हापा न्हापा निसें छयला वःगु तथ्य पुलु पालु खना हे च्वनागु दु । आ
वया थ्व मौलिक शिरबन्दी सामुहिक तिसाया रूपय् जन जीवनय् अतिभनं
योगु तिसाया ताजि मध्यय् छगू खः धायेगुली निगू मत दै मखु थें ताया ।



कर्ण कुण्डलि

नेपाः देया स्वनिगः दुने ये तङ्गालय् न्ह्यदँ च्यादँ ति न्हापा लुया वःगु शक सम्बत १०७ या जय वर्मायागु सौम्य मूर्तिया विषय् आपालँ खँ सियके फु । थ्व मूर्तिइ खने दगु अनेगु तिसातय् ताजि मध्यय् न्हायपनय् कर्ण कुण्डलि, छातिइ पदक (कण्ठी), नाडिइ चुल्या छायापियातःगु यइपुस्य व चिटिक्क च्वं ।

नेवाः समाजय् अतिभनं प्राचीन युग निसें शासक व भारदारतय्सं थी थी कथंया लुँयागु तिसां तिइगु परम्परा खनेदु । उगु ईया अनेगु तिसाया ताजि नं च्वय न्हच व्वयागु कर्ण कुण्डलि, कण्ठि व चुल्याय् आपा याना ढांचा व बुद्धा हुबहु छाप लाना च्वंगु बांलाक तुलना याये फु ।

बरु थनं सर्वप्रथम थ्व वस्तुया तिसा गुबलेनिसें दयेका तिल धैगु खँ अनुसन्धान व अध्ययनया विषय तिनि ।

न्हापा न्हापा मनुखं तिसायालागि छयःगु वस्तु हस्तिहाड खः ज्वीमाः धैगु खँ अनुमान दु । अनंलि रुद्राक्ष फल, उच्चस्तरया पत्थर पदार्थ धुंका तिनि बुलुहुं लुं, बहः धातुया तिसा दयेकूगु खनेदु ।

यल च्यासः त्वाःया लोहँ हिति गालय जः रिखे प्रस्तरया गज लक्ष्मीया मूर्ति प्रतिष्ठा याना तःगुलिं निद्रःदँ न्हापायागु प्राचीन सम्पदा स्वयेगु शौभाग्य भीत प्रात्र जूगु दु । थ्व पूर्व लिच्छविकालीन प्रस्तर सौम्य व उच्च कोटिया मूर्ति दर्शनीय खः । थुकी थी थी तिसाया नापं कुण्डली तिसां तिइका समाःयाना तःगु दु । थुकिं उगु इलय् कुण्डली तिसां तिइगु चलन दये धुंकूगु प्रमाणित याना बिउगु दु ।

पशुपति आर्यघाटय प्रस्तरया सौम्य विरुपाक्षया मूर्तिइ नं न्हायपनय् रुद्राक्ष गोया चितिक्क च्वंगु कुण्डली तिसां छायापिया तःगु दु । थ्व मूर्ति अनुमानित प्यंगू शताब्दी पाखेंयागु जुइमा धैगु विद्वान् बाङ्गदेलय धापू दु । यें राष्ट्रिय संग्रहालय छाउनी प्रदर्शित प्रस्तरया पद्म-हस्ता लक्ष्मीया न्हायपनय् छखे बहुमुल्य पत्थर स्वाल्लुसे खने दसा मे रिखे ज्वरा मज्जुगु तिसां तिइका तःगुयात नं कुण्डली हे धायेगु ल्वइ थें ताया ।

नेवाःतय् मचा जंकुं अन्न प्राशन याइबलय् छजो लुँयागु मारबली चाः व तुतिइ छुस्यापु कल्लि न्ह्याकेगु चलन दु । थ्व सभ्यताया विकास लिसें न्ह्याना च्वंगु खनेदु । भूमी समाजय बुह्रा जुलकि उमेरं ज्या जंकुः याइबलय् थ्यंक नं लुँया पुनायचां तिइकीइगु चलन दनि । थ्व मारबलीचाः वा पुनायचाः धाःसां छगू कथंया कर्ण कुण्डली हे खः ।

नेवाः वर्गया थें तामाङ्ग, गुरुंग, थकाली, थारु, धिमाल, क्षेत्री, ब्रम्हु तय् नं न्हायपनय् अन्य धातुया चाचा तिसा दयेका तीमागु गुलिसियां चलन दु । थ्वथेंतुं मगः, राइ, लिम्बुतय्सं नं सामाजिक संस्कारय् अनिवार्य रूपय् थी थी धातुया चाः तिसां तिइगु चलन खने दु ।

नेवाःजातिइथें मेमेगु जाति, उप जातिइ नं विशेषतः मतवालीतय् तिइगु, तिइकीगु थी थी तिसाया ताजि मध्यय् छताजि न्हायपनय् मिजं-तयसं नं तिइगु तिसाया नां खः कर्ण कुण्डली ।



हृदय फो

हृदयफो तिसाया ताजि छगू नेपाल संवत् ६०७ निसैं शाके मुनि बुद्धयात दँय् छकः वैशाक स्वांया पुन्हि खुन्हु नुगःपाय् छायापि केगु चलन यागु खनेदु । भिन्यागु शताब्दी रिखे घोया नामय् महा सिद्ध गुफा बालाजु थ्यंक गुथि न्यायेका बुद्धया छातिइ तिइके माःगु तथ्य अभिलेख पाखें स्पष्ट जुउ । न्यासः दँ न्हापा निसैं हे छगू शाक्य भिक्षु समुह नं दोहल पियातःगु तिसाय् दातातय्सं थःगु मौलिक कलात्मक शिप जन मानसया न्ह्योने न्ह्यचव्वया वंगु तथ्यं छर्लङ्गक्यो । वैशाक पुन्हिया शुभ पर्वय् भगवान बुद्धया हृदयलय् जन्त्र थें लचके जुइगु बहुमुल्य हिरा मोति पत्थर थुना चिटिकक च्वंक दयेका शिखःमाःया दथुइ प्यकुंलाःगु न्ह्याइपुक बांलाक दयेका तःगु छगू घोया तिसाया ताजि खः हृदय फो ।

मानव अङ्ग प्रत्यङ्गय् लुं वहःया कलापूर्ण तिसाय् पत्थर थुना दयेका चढे यायेगु चलन चल्ति हया सकलयात त्याग भाव क्यना अनेगु तिसाया ताजि हृदयफो, पयति व कण्ठि थःगु मौलिक भूमिका न्ह्य चव्वया वंगु खँ थौया पिंढीयात छगू मार्ग दर्शन धका धाःसानं पाइमखु ताया ।

भ्रीगु जाती उपजाती प्राचीन ई निसैं पूर्वजतय्सं मानव व घोपिनित तिसां तिइका कीर्ति तयेगु गुथि स्वना वंगु बांलागु योगदान भापीमाः ।

अन्य श्रद्धालु भक्त सज्जनवृन्दपिनिगु मतिइजा कलात्मक हृदयफो तिसा न्हापा न्यासः दँ न्ह्यो गाक्क च्वन्ह्यागु व प्रतिष्ठा दूगु तिसा जुइ धै थें मनय् वनिगु नं स्वभाविक हे खः । न्ह्यागु न्ह्याकथं मूल्याङ्कन यासां आपा दर्शकतय्त निकट भविष्य थ्यंक च्वय न्ह्यचव्व यागु तिसा महामानव बुद्धयात छागुया महिमा व महत्व पक्का हे दया च्वनेमा धैगु भाःपिया ।

शायद थुजोगु तिसा अन्यं चोपिन्त छायेगु याना वःगु मेमे थाय् नं
दयफु गुकियागु सत्य तथ्य प्रकाशय् हया पाठकतय्गु जिज्ञासायात ध्वा
थुइका दिइत पलाः न्ह्याका ग्वहालि याना ब्यूसा जिउ धका इनाप याना
चवना ।

मध्यकालया नेवाः जन जीवनय् चवय न्ह्यच्चव्यागु स्वंगू तिसा
तय्गु ताजि मध्यय् पयति व कण्ठि तिसात भी हे पुर्खापिन्स तिइगु याना
वःगु आभास खने मदुगु मखु ।

छायधाःसा व निगू तिसाया ताजिया दुने दार्शनिक भाव व लक्षणया
प्रभाव दइगुलिं नं मनुखं अनुकरण याना परम्पराया तिसातय्त्त संस्कार लुं
वहःया तिसां तिइके बिया थःगु संस्कृतियात निरन्तरता बिया चवंगु ज्वीमा
धैगु अनुमान अःपुक याये थाय् दु ।



कण्ठ

कण्ठ छगू ककु व कथु क्वसं तकया थासय लुं वहःया द्रल छि व
स्वसःत्या दँ न्ह्योनिसें मानवया म्हय् छयला वया च्वंगु तिसातयगु छगू
ताजि खः ।

थ्व ऐतिहासिक तथ्य लिच्छविकालय् चलन चलित दये धुंकूगु खँ
बांलाक स्पष्ट यायेफु ।

लिच्छविकालय् थ्व तिसा प्राचीन युग निसें भी देया पूर्व शासक-
या लाय्कु दुने प्रतिष्ठा पूर्णगु छगू तिसा खः । थ्व तिसाया ताजि
त्रंगाःत्वाःया लोहं हितिया शिलापत्रय् न्हे थना तःगु स्वंगू पदक केयूर व
नुपुर मध्ये छगू (पदक) कण्ठ दुथ्यागु खः ।

आ भीसं बिचाः यायेबले व महत्वपूर्ण कण्ठ तिसा लुं वा
वहःयागु कलात्मक ढङ्गं दयेका छयला वैच्वंगु जुइमाः धैगु अःपुक
अनुमान यायेगु छुं आपति मताया ।

न्ह्याम्हसिनं न्ह्यागुहे धाःसा नं कण्ठ छगू कलापूर्ण
शोभायमान्गु राजकीय तिसाया ताजि जुयानं सर्वसाधारण जनमानसं तिइ
थाकूगु खः । थौया भीगु समाजय् परम्परागत तिसा छयलेगु सकलया
सामूहिक कुतः जुइमाः थें ताया ।

भीगु नेवाः समाजय् मिज्या तुलनाय् मिसातय् यःगु तिसातयेगु
परिकारय् कण्ठ नं खः धैगु अःपुक हे न्ह्य व्वयेफुगु खँ खः धायेमाः ।

थय्कः तर्कसंगत कथं छलफल यायेबले नेवाः जातिं थ्व मौलिक
कण्ठ तिसा गबलेनिसें तिइगु यात थ्व खँया बांलाक कनेत प्रमाण मदय्कं
धाये हे थाकु ।

भीगु समाजय् मिजं मिसाया समूह मुना खल्हाबल्हा जुया च्वनिबले धाइ नापं नयां प्राण, तियाँ शोभा धैगु खँय् अपोसिया छगूहे मत खने दु ।

युग युगनिसें मिजंतय्तसिकं मिस्तय्त तिसा तिइ दत कि स्वभाविक हे कथं प्रशन्न मुद्रा व न्हचूव्वलं ज्या खँय् संरिक जू वनीगु अपो चलन खनेदु ।

भी नेवा: जातिइ थ्व कण्ठ तिसा सु मिसा सु मिजं निथ्वसिनं नं तियेगु या: धैगु खँ अभिलेख पाखें सी दु । न्हापानिसें 'पदक'यात थौकन्हे कण्ठया रूपय् छयला च्वंगु खने दु ।

“कण्ठ” छगू ककु व कथु क्वसं तकया थासय् तिइगु लुँ, वह:यागु तिसाया नां ख: । थ्व मानवया म्हय् छयला वयाच्वंगु आपालं ग्यसु दूगु व चितिकक च्वंगु तिसाया ताजि ख: । थ्व तिसा द्व:छि व स्वस: दँ न्हय:निसें तिया वयाच्वंगु दु धैगु खँ लिच्छविकालीन मानव मूर्तिया अध्ययन पाखें सी दु । थुकिं स्पष्ट जुइ कि थ्व तिसा लिच्छविकालय् तस्सकं लोकंवा:गु तिसा मध्यय् छताजि तिसा ख: । थ्व ल्याखं थ्व छगू ऐतिहासिक तिसा जुया बिउगु दु ।

लिच्छविकालय् थ्व तिसा जुजु, रानी, भारदार व जन समुदाय् नं छयला त:गु खने दु । उकें थ्व प्रतिष्ठापूर्णगु तिसा ख: । लिच्छविकालया प्रशिद्ध दक्षिणकोलिग्राम अंगा: त्वा:या छगू शिलापत्रय् स्वताजि तिसाया नां उल्लेख यानात:गु दु । थ्व स्वताजि तिसा मध्यय् छताजि तिसाया नां “कण्ठ” ख: ।



वहःया दुदंगु कल्लि

स्वनिगःदुने उपत्यकाया आदिवासी नेवाः समाजय् भिंखुगू संस्कारया दुने कम हे यासां छसिकथं दशकर्म यायेगु न्हापा न्हापा निसैं प्रचलित चलन खः । परम्पराकथं मचा जंक्व यायेबले लुँया दुदंगु वा फुस्कूलुगु चाचा छज्वो व वहःयागु दुदंगु छुस्यापु कल्लि छजु नं वसःनाप देछाया बीयेमाः ।

नेवाःसमाजय् प्राचीन पूर्वमध्यकालं निसैं शैशव व युवा उमेरय् शारीरिक सुसंगठनया लागी छचला वया च्वंगु वहः व धातुया दुदंगु कल्लि निताजि दु । अनंलि ल्यासेपिं मिसातय्सं वहःयागु सिंखाबुट्टा फुस्कूलु कल्लि छ्याला छ्याला सःवयेक नं न्ह्यायेगु याः ।

कल्लि न्याताजिया खने दु । नेवाःसंस्कारय् मचा जंक्व वा शुभ अन्न प्राशनय् काय् वा म्हचाय् मचां तिङ्गु, वहःया दुदंगु कल्लि	- १
मिसा मस्त मचा ल्यासेबलय् तिङ्गु कलात्मक धलोटया "	- १
" " वहःया त्यागु सादा " "	- १
" " वहःयागु कलात्मक बुट्टादुगु " "	- १
" " वहःयागु फुस्कूलु "सिंखाः" बुट्टा दुगु "	- १

मस्तयत् भूत, प्रेत, पिसाचं व रोग व्याधिं मुक्त जुङ्गु विश्वासं अभिभावकं गथाम्व नखःबले नं धातुयागु मसिनुगु कल्लि अल्प ईया लागी न्ह्याकिङ्गु चलन दु । अथे हे नेवाःयुवा व प्रौढ उमेर थ्यंक मिजं मिस्तय्सं व हे च्वय् न्ह्य व्वयागु नखः बलय नया अंगू दँयदँसं न्ह्यायेगु चलन दु ।

संस्कृति धयागु हे समाजय् नेवाः जातियात म्वाका तङ्गु,भीगु उद्देश्य पूरा याङ्गु छगू माध्यम खः । थःगु संस्कृतिया दुने सुपिला च्वंगु दार्शनिक गूढ तत्व सिङ्केगु कुतः यायेमा धैगु सामुहिक अभिरुची निर्भर जुङ्गु ।

नेवाः समाजय् प्राचीनकालनिसें मिजं, मिस्तय् स तिया वया च्वंगु सलंसः तिसाया ताजित दु । उकिइ मध्यय् मनुखं परंपराया आपालं ताजित अगतिं तिसां तियेगु याना वया च्वंगु दु ।

भीगु सभ्यताया शुरुं निसें न्हांय्पनय् लुंया चाचा तिइकिइगु व वहःया दुदंगु छुस्यापु मचा जंकु बले तुतिइ न्ह्याकिइगु अर्थ-पूर्ण तर्क नापं शारीरिक सुसंगठनय् त्यवा बिया वया च्वंगु अःपुक हे अनुमान याये फु ।

भीगु समाजय् मध्यकाल पाखे मिसामस्तय् त तुतिइ धलौट वा वहःया दुदंगु कल्लि उमेरयात ल्वय्क अगतिं नं न्ह्यकीगु खः ।

जिगु अन्वेषण कथं यल गाबाहा त्वाःया इन्द्रबहादुर वज्राचार्यया छेंय् थःम्हं स्वया वयागु असाधारण दुदंगु वहःया कल्लि नेवाः समुहयागु छगू अद्वितीय तिसा सत्यानिसः दै न्ह्यो गावकं प्रचलित दु मखा ज्वी ।

व कलात्मक वहःया कल्लिया चाः दश, एघार सेन्टीमीटर बृत्ताकार घेरा दु । चक्काया गोलय् सिंह, सल, म्हय्खा दथ्वी लाक्क हितिमंगः अले क्षेपुया आकृति पिज्वया उत्कृष्ट कलां जाःगु थना तःगु मौलिक वहःया तिसा च्वय न्ह्यब्वयाम्ह परिवारयाके आतक्क नं संग्रह याना तःगु दु । उकिं भी समुदाय नं थः थः पिनि रसपूर्ण जीवन दिन चर्या हनेत संस्कृति सम्पदा अन्वेषण व अनुसन्धान यायेगु जातिया गौरवया खँ भाःपिमाः । शायद उकिं हे मनूतय्गु जाति अनुसारया संस्कारगत जीवनय् तिसाया सम्बन्धं जन्म मृत्यु पर्यन्त स्वापू क्वातुया वैच्वंगु ज्वी फु ।



वहःया रुद्रामाः

नेवाः समाजय् न्हापाँनिसैं लुँ धातुयागु कण्ठ तायो, तिलरि तिसाया ताजि थें वहःया भिम्पु वा रुद्रामाः हना क्वखाइगु पुलांगु परम्परा खः । थ्व पुलांगु कलात्मक तिसाया थःगु हे प्रतिष्ठा दया च्वंगु न्यने दु ।

नेवाःसमुदायया गथेकि ज्यापुनीतय्सं वःहया कलात्मक भिंसिखः तिसा थेंतुं स्पस्येःनितय्सं वहःया कलात्मक पाताय् रुद्राया आकृति हया जः व खः रिखे च्वका लुइका प्वाःतया माय्काय् हना गपतय् क्वखाइगु खः । थ्व वहःया भिम्पु सिखःवा रुद्रामाः धका चिगोगु बसुपति थें निप्यंगः वा स्वीनिगः रुद्रा गो हना क्वखाइगु तिसा खः । थ्व तिसाया ताजि न्हापाँनिसैं सत्रौ वा अठाह्रौ शताब्दी तक्क जा मिस्तय्गु समुहलय् गाक्क लोक प्रिय थें न्यने दु ।

स्वनिगः दुने मध्यकालया न्ह्यो निसैं स्थिति व संहारया हर्ताकर्ता भगवानं श्री शिवः खः । थ्व तथ्ययात नेवाः तथा उपत्यका निसैं पहाड, तराइ व भित्री मधेश थ्यंक च्वपिं नेपाःभिं अपोसिनं मानेयाना वया च्वंगु दु ।

रुद्राक्ष धैगु पवित्र वस्तु हे आदिकालनिसैं पवित्र रुद्राक्ष सिमाय् सःगु अनेक गुण सम्पन्नगु फल प्राकृतिक वरदानं व्याप्त जुया सांस्कृतिक सम्पदा मूर्ति कलाय् क्वातुक्क थाय काये धुंकूगु खनेदु । उदाहरणया रूपय् आर्यघाटया पूर्वाभिमुख प्रस्तर मन्दिरय् दुने सौम्य विरूपाक्षाया मूर्तिइ रुद्राक्षगोःया कर्ण आभूषणय् छ्यला तःगु स्वये फु ।

सम्भवतया विद्वान् ग्रन्थकार एल. एस. वाँग्देलया अनुमान कथं तेश्रो चौठो शताब्दीयागु उच्चकोटियागु प्रस्तरया विरूपाक्ष मूर्ति भीगु राष्ट्रिय सांस्कृतिक सम्पदा नं खः ।

न्हापा न्हापाया नेपाःया समाजय् अपोयाना कुलिन परिवारया शैव धर्मप्रति अगाध आस्था दुपिसं पवित्रगु रुद्राक्ष ग्वः बुद्धा लसिवयेक वहःया भिम्पुसिखःमाः हना क्वखायेगु गाक्कं लोकं व्हागु चलन जुइफु ।

मानव समाजय् अढवैशया उमेरय् प्रवेश जुइ त्यन कि धर्म व दर्शन प्रति भुकावया फलस्वरूप न्हापा न्हापाया खानदान परिवारय् रुद्रा माःया भिम्पु लसि वःगु तिसां छायेपिया जुइगु नं छगू आत्मसन्तोष प्राप्त यायेगु माध्यम मज्जी धका गये धायेगु ? थ्व छगू अन्वेषण व अध्ययन मयासें अडकल याये छिं ।

न्ह्याम्हसिनं न्ह्यागु हे तर्क याःसानं वहःया रुद्राक्षया प्रतिविम्ब वहःया भिम्पुमाः दयेके बिया माःहनाः क्वखायेगु याना वंषि आदर्श भावया मिस्त नं धन्यवादया पात्रया रूपय् स्वयेगु औचित्य खना ।

रुद्राक्षमाः नं न्हापाया समाजय् प्रतिष्ठा दयकः तिया जुइगु तिसाया नां जाःगु छता तिसा जुइमाः धयागु अनुमान यायेछिं ताया ।

थ्व च्वसुइ विज्ञ पाठकतयसं बांलागु तथ्यपूर्ण तर्क प्रस्तुत याना दिइगु लागि संस्कृति, समाज शास्त्रविद् व कलाकार महानुभावपिन्तं इनाप याना च्वना । छुं आलोचना, सुभाष वइ, अले भी मां भाय्या धुकुतिइ फुगु योगदान याना वने फयेमा धैगु आशिका याना हे च्वनागु दु ।

बांलागु समाजया लागि स्पल्लागु साहित्य श्रृजना याना भिंगु लँपु क्यना जुइगु भी सकलया सामुहिक कुतलय् निर्भर जुइ ।



ढुंग्री

नेपाःदे प्यंगू वर्ण व स्वीखूगु जाति उप जातिइ जायाच्चंगु, पुलांगु सम्पदां नां दया च्वंगु मुलुक खः । थ्व देया पूर्व मेची निसें गन नेवाः ब्रम्हु, क्षेत्री, वैश्य यागु ढुंग्री मिस्तयसं न्हाय्पनय तिइगु तिइका वया च्वंगु लुँतिया वैच्चंगु दर्जनौ ताजित दु । उदाहरणया लागी शैशव कालय् दुदंगु वा फुस्कूलु मारवलि जँकु चाचा, माकुली चाचा, माकसि, तुकि, पलंतुकि, तायोतुकि, भो मुन्द्रि, कर्ण कुण्डलि, पुनायचा, यारलिङ, टप आदि ढुंग्री तिइगु मिस्तय्गु लोक ह्वागु तिसात मध्येया छगू खः ।

स्वनिगः, पहाड, तराइ व भित्री मधेस न्ह्याथाय् च्वंपि नेवाः अढ-बैशया मिस्तय् न्हाय्पं गाःलय् तिइगु तिसाया नां खः “ढुंग्री” । लुँयागु दाफो स्वांया आकारय् प्रत्येक खुगु वा वयाँ अपोगु हलय् मानिक, पन्ना, मोति व हिरा बहुमूल्य पत्थर थुना ढुंग्री तिसा तिया जूपिं २५/३० प्रतिशत अढवैश उमेरयापिं मिसात दैथें जिं अनुमान याना ।

पहाडि प्रदेशया अत्यधिक इहिपा जुइ धुंकूपि मिस्तय्सं लुँयागु जिस्वां आकार वा चारपाते आकृतिइ मानिक वा मेमेगु पुथुना ढुंग्री तिसां तिइपिं क्षेत्री, ब्राम्हण मिस्त व्यापक संख्याय् खने दनि । नेपाली भाषा भाषी मिस्तय्सं छपु लोक म्येय् “पशुपतिको थानमा सुनको ढुंग्री कानमा” धका मेला पर्वय् प्याखं हुंला जुइगु नं खना । थ्व न्ह्यागु हे नेपाःया जाति उप जातिया मिस्तय्गु छगू अतिरिक्तगु विशेष तिसाया ताजि धायेछिं ।

मिस्तय् जात म्हय् लुँया बय बय तिसां तिइ मन्त कि लः मदुगु पुखलिइ न्या थें महसूस यायेत लिफःमस्वः । थय्क शोच बिचाःयाना स्वयेबलय् लुँयागु ढुंग्री तिसा छगू प्यह्मसिया न्हयोने शोभा बृद्धि याना बिइगु छगू फर्मास यायेगु विशेष शौखिन तिसा हे जक खःला दैथें ताया ।

थ्व लुँयागु कलात्मक दुंग्री गुबले निसें समाजय् प्रचलित याये हःगु खः
यक्किन याना धायेहे थाकुउ ।

थ्व लुँया दुंग्री कलात्मक तिसाया ताजि मिस्तय् यःगु श्रृंगारया
छगू अभिवृद्धि खः । दार्शनिक सम्बृद्धि व लक्षण तिसाया दुने सुलाच्वंगु मदै
धका धाये थाकुइ ।

मध्यकालया युगं निसें नेवाःसमाजय् लुँयागु दुंग्री कलात्मक
मौलिक तिसात मध्यय् छगू आकर्षक चिटिक्क च्वंगु ताजि खः । थ्व
तिसां समाजय् अढबैसयापि मिस्तय् प्रतिष्ठा वृद्धि यायेगुलिइ भूमिका
पक्काहे क्वातुइका यंकूगु आभास खने दु । परम्परागत लुँ धातुया
कलात्मक दुंग्री तिसा समाजय् तिइकेगु शुरु निसें आतकनं मिस्तय्सं
तोतूगु शायदे हे जक स्वये खनि । दुंग्री तिसायागु आकर्षण आतकनं
निरन्तरता दया हे च्वंगु खनेदु ।



लुं सिन्हः

स्वनिगः निसें दे व्यापि नेवाः समुदाय प्राचीन युगं निसें नियम व संयमय् च्वना दिन हना वया च्वपिं खः । भी शैव, शाक्त, वैष्णव, व बौद्ध धर्मावलम्बि नित्य कर्म यायेबलय सिन्हः द्यो वा थःपिन्त छ्यला वया च्वनापिं नं खः । भीगु भिंखुगू संस्कार कर्म यायेगु इलय् क्वय् न्हय-ब्वया कथंया सिन्हःत-बालःक छ्यला वया च्वंगु खने दु ।

पुण्डरिक विभूतिः	सिन्ह
राम तिलक म्हासु	"
हयाँउ-रक्त चण्डन	"
श्रीखण्डया-तुयुगु	"
भुयु	"
धौ	"
मोहनी	"
लुं	"

भीगु सभ्यताया शुरु निसें समाजय् गुरु पुरोहिततयगु सहलह कथं गृहस्थीया गुह्यतायो निम्ती पूजाकोथाय दुपिं द्योपिन्त स्वां सिन्हः, छ्यला पूजा याइ । अपो शैव बौद्ध परिवारया मिस्तय् परम्परा निसें स्थान गणेशया थाय् नित्य पूजा यायेत नं भुइसिन्हः, म्हासू व ह्याउँसिन्हः तिका पूजा याइगु स्वनिगः दुने व्यापक चलन खने दु । नेवाः समुदायया थी थी नखःचखः जन्म दि, गुथि, श्राद्ध, स्थानीय जात्रा न्याइगु इलय् थःपिनि आस्था कथं नित्यपूजा नापं बुंगःद्यो चकवाद्यो व त्वायबाहाः द्योया थाय् नुगः वछु खुत्वाःया मुख्य नुगःभुज्या माने याइ ।

च्वय न्हयः ब्वयागु अनेगु सिन्हःतयगु पूजा पर्व व संस्कार कर्मया ज्या झवलय् परम्परा निसे छ्यला तःगु कथं ऋषि महर्षितयसं बिभू व म्हासुसिन्हः थाय् व द्यो अनुसार तिइका वया च्वंगु न्यनेदु ।

न्हापा लिपा नेवाःसमुदाय्या परम्परा कथं बजारय् उपलब्ध जू बलय् स्वंगू प्यंगू दशक न्ह्यो शैव, वैष्णव परंपरा कथं रक्त चन्दन व श्रीखण्ड चला सिन्हः तया न्ह्यकं याइगु चलन व्यापक जुया वंगु न्यना । थ थःगु कूलया परम्परा कथं अनेक धर्मया अनुयायीतयसं थःगु श्रद्धा व भक्ति भावं स्थान गणेश व नाप च्वपिं महाकाल, भिन्दो, कृष्ण द्यो, नारायण व उमामहेश्वर आदि देवस्थलय् पूजा याइबलय् नं हयाउंगु म्हासूगु व भुइसिन्हः आदि छ्यला वया च्वंग खनेदु ।

भी छेखाय् परिवारय् सुयां जन्मदिं वल धासा स्वां, सिन्हः, अविर, धौ सगं व खें सगं बी न्ह्यो ह्याउं सिन्हः, अक्षता व धौ सिन्हः तिइके बिया सुस्वास्थ्य, दीर्घायु व उत्तरोत्तर उन्नतिया लागि थकालिं आशीर्वाद बिइगु चलन दु ।

मोहनी बलय् दिगु पूजा बलय् थः थःगु सम्प्रदाय कथं धौ ह्याउं सिन्हःल्वाकज्यागु सगुन ह्याउंगु सिन्हः व मोहनी सिन्हः तिइकेगु नापं स्वां, क्वखा बिइगु चलन दु ।

नेवाःसमुदाय् मिजंया लागी भमचा कोछित सर्वप्रथम लाखा मद्दि छयेगु काल बिल याइगु खः । आ थ्व चलन गाक्कं म्हो जक चलय् जू धाःगु न्यना ।

मेगु मज्जि मगागु परम्परा मध्यय् नं लिम्ह भमचित पुतुग्वय, महि, शिसाफल, मसला, श्रृंगार-सामग्री ज्वलं, नापं भव्यगु वसःछजुया साथय् तिलहरि, वहःया बत्ताय ह्याउं सिन्हः लिस्सें लुं सिन्हः छपता नं तया छयेगु चलन दु । थ्व व्यापक नेवाः वस्तिइ कुलिन नेवाःतय् लक्षण व अटल शौभाग्य लायेमा धका ग्वय छयेगु अनिवार्य चलन निरन्तर न्ह्याना च्वंगु दु ।

मूलतः नेवाः बस्तिइ मोहनी बलय कुमारी व आगमय पूजा दिक्षा विधिं पूजा याय्माःपिं कुलिन परिवारय वहःया दृष्टि नं छायेमाः धाःगु न्यने दु ।

अथे हे स्वंति नखःबलय कार्तिक औसि खुनु लक्ष्मीद्यो पूजा याइबलय गक्ष अनुसार मृत्तिका, प्रस्तर, धातुयागु वहःयागु लक्ष्मी द्यो पूजा याइगु अत्यधिक थासय थ्व परम्परा न्हचाका हे च्वगु न्यने दु । नापं भ्वंयागु च्वया तःगु लक्ष्मी द्यो न्याना हयेबलय छापय याना दयेका तःगु दृष्टि नं कया हया तिइकेगु व्यापक नियमित चलन चलय जुया हे च्वंगु स्वये दनि ।

नेवाः समाजय सिन्हः धायेगु ज्वलन्त प्रमाण ने. सं. १३२ या गँचाननि त्यागः यागु ब्राम्हि अभिलेखय सिन्हःमू ज्वला न्हायकं संस्कृतिया गति विधिइ नवौंशदि पाखे सभ्य मानवतय दथ्वी यक्व न्हचो निसें चलय मज्जीकं उथाय जक सिन्हः छय्लेगु याःगु खै मखु धका अपुक अनुमान यायेफु ।



चन्द्रहार

नेवाःसमाजय् प्राचीन परम्परां निसें लुँया भि सिखः तायो, तिखः कण्ठ व हृदयफो आदि कलात्मक तिसातय्गु असंख्य ताजि मध्यय् उत्कृष्ट पहःयागु छगू चन्द्रहार खः । थ्व मिस्तय् लोकं व्हागु सांस्कृतिक व प्राकृतिकतां सम्पन्नगु तिसा खः । थ्व ताजि सम्पन्न शैव, शाक्त नेवाःपरिवारया जःपिन्सं सांस्कृतिक शुभ पर्वया उपलक्षय् तिङ्गु मिस्तय् तस्सकं हे यःगु लुँया तिसाय् तःजिगु चन्द्रहार खः धायेफु ।

नेवाःसमुदाय् अनेगु संस्कार पर्वय् सम्पन्न परिवारया म्हयाय् मस्तय् तक्यहेपिं, भौ मस्तय् पिल्लिपिनि ज्वरां उथें च्वंक सहस्र टुक्रा चक्का स्वाना चन्द्रमा थें रश्मि दैगु भाःपिया तःजिगु सप्ताह, सत्य-नारायण व्रत, नवाह व्रत पर्वय्, इहिपा, मचा जंक्व, कय्ता पूजा, ज्याथा जिथि बुद्धा जंकु थःछें हे भव्य न्याइ बलय् मिस्तय् तिङ्गु वजनदार व तेजोवद्धं सम्पन्नता बिङ्गु तिसाया विशेष ताजि दुने कलात्मक भव्य चन्द्रहार नं अग्रपंक्तिई लाः धायेफु । शब्दकोष कथं लुँया चन्द्रमा बाँ लूगु तिसा छता पुलांगु लोकं व्हागु तिसा खः । चन्द्रहार गुबलय् निसें छ्यल धैगु खँ अनुसन्धान मयासे धाये थाकुइ ।

थ्व तिसा पूर्णचन्द्रया आकृति लुँया चक्का चक्कात हना जः व खः पाखे स्वपु निसें, न्यापु, न्हयपु व गुपु ज्व-लाका हना ल्यूने पाखे च्वय् स्वाइगुलि स्वकू लाःगु पाताया निकु व लुँया कलात्मक लापाचा छज्व तया दयेकेगु गाक्क पुलांगु चलन खः । परम्पराया चन्द्रहार कलात्मक तिसा दयेकेया लागी न्यातोलां निसें भित्तोला, भिंप्प्यतोला निसें स्वीन्यातोला लुँ लगय् याना भव्य तिसा दयकूपिन दु । थ्व इज्जत व प्रतिष्ठा दइगु कलात्मक विशिष्ट तिसा चन्द्रहारयागु ताजि कथं ठिक्कगु वजनं निसें स्वी न्यातोला तक्क ग्यँसु लाक्क दयेका तःगुलि भ्यातुङ्गु स्वभाविक हे खः । थजःगु मौलिक कलापूर्ण चन्द्रहार तिसाया ताजि नेवाः कुलिन व खानदान परिवारय् छ्यला वै च्वंगु अपोसिनं बांलाक हे स्यू ।

सम्पन्न नेवाःपरिवारया बहु संख्या मिस्तयसं अति यःगु जुया हे सक्षम आर्थिक सम्पन्नपिं बःचाधिकःपि ल्यासेपिं, अधबैस्यं मिस्तयजक अतिभनं यःगु भद्रमिस्त गुम्हसिया अनुकूल व नां दंपिं खलःतय् म्हाय् मस्त व भौ मस्तय् पिंहिपिंत तिइके बिइगु मेमेगु तिसा थें चन्द्रहार ताजिया इज्जत व प्रतिष्ठा नं उलिहे च्वन्ह्यागु खनेदु । थ्व तिसाया ल्यू नं दार्शनिकता व लक्षणया भाव गाक्क हे दु थें महसुस यायेफु ।

थजाःगु भव्यगु परम्परायागु तिसा मध्यम वर्ग व सर्वसाधारण परिवारया मिस्तयसं तिइगु व दयेके बिइगु इमिगु क्षमतां पिने धाःसा नं पाइमखु थें ताया । मेगु मुख्य तथ्यला चिम्हिगु परिवारं तः धंगु छाति हे अपो धन राशी लगय् याकाः परम्परागत चन्द्रहार तिसा दयेके पाखे मन यायेगु सिबय नं मयायेगु हे तःधंगु बुद्धिमानि खनेदु । खय्त जा गन इच्छा अन उपाय धाये थें अनुकरण यायेगु व स्थगित यायेगु थः थः शोच विचारय् निर्भर जुइ । मेगु खँ सुरक्षित यायेगु सक्षमपिन्सं न्ह्यागु परम्पराया गाछि कलात्मक तिसा दयेकेगु व संचय यायेगुलि निगू मत दै मखु ।

थ्व तिसा गाक्क आकर्षक चितिकक च्वंगु जुया नं नलिम्ह ल्यासेत , अधबैसया नेवाःमिस्त फुक्कसित लोगुलिं हे प्राचीन युगं निसें नेवाः समाजय् चन्द्रहार तिसाया ताजि मिस्तय् तस्सकं यःगु तिसा मध्यय् छता खः । थ्व तिसा नेवाःमिस्तयसं बाहेक मेगु नेपाः या जाति उप जातिइ तिइगु मयाः ।

धात्थें धायेगु हे खःसा सुयानं परिवारय् “लिस्वःन्ह्य स्वः थःगु ख्वाः थम्हं स्वः” या थःगुहे विशेषता, हैसियत व क्षमतां मबिइकं रहर व करं मनं तुना थें समस्या समाधान जुइगु बिकल्प खने हे मदु । न्ह्यागु नं थःथःगु मेपिनि जातिइथें नेवाः समाजया परम्परागत इज्जत प्रतिष्ठा दइगु बांलागु वजनदार लुँया परम्परायागु यःगु ढाँचाया तिसाया ताजि अनुकूल व कथं हनिगु लंपु ज्वना दयेका तिइकेगु व तियेगु ध्वाथुइका दिसं । माःगुलि ठिक हे जू गथे कि इहिपा न्याइबलय लुँया कलात्मक

भिसिखः सिंखा चुल्या व अंगू साधारणतया म्हाय् मस्तय्त ज्वरे याना बिइगु मनासिब खनेदु । थःगु औगात व क्षमता पिनेगु तिसा न्यया ज्याखँ यायेगु सिबय् न्ह्य मल्हुइगू सल्लाह देछाया चवना । म्हाय् मन्ह्यंगु पीर म्वाक नं कया मज्वीगु बुद्धिमानी खना ।

अथे हे थौं म्हिगःया युगया प्रभावकथं लुँयागु भ्यातुक तिसातयगु परम्पराया तिसा ताजि दयेका तिया जुइगु नं छखें अपो जोखिम मोले याना जुइमाःगु नं जुया वल । परिस्थिति व युग कथं न्हापाथें शिक्षित ल्यायम्ह व ल्यासेतय्सं इलय् शिक्षा आर्जन याना दिप्लोमा व डिग्री कायेगु नं जीवन भरया गाककं ग्यसु लाःगु अतुलनिय तिसा खः धैगु पक्षय् आकर्षित जुइपिं युवापिन्त जिगु शुभाय् दु ।

खयत जा चवय न्ह्यःब्वयागु परम्परागत लुँया चन्द्रहार तिसाया ताजिं शोभा व सौन्दर्य परिपूर्णता बिया वया च्वंगु मौलिकतायात म्वाका तयेमाःगु नं भीगु सामुहिक दायित्व व कर्तव्य नं मखु धाये थाकु ।

उकिं थजःगु ऐतिहासिक व सांस्कृतिक तिसाया ताजियात अप्पो लुँ ग्यसु मग्यंक ठिक्क जक गुतोला निसें भिन्यातोला तया जक यःगु मौलिक कलात्मक चन्द्रहार दयेकेगु चलन छयलेगु वेश जुइला ! अजःगु अद्वितीय चवय न्ह्य ब्वयागु तिसा दयेका भिंगु भिंगु ज्या खँय् जक पुलु-पालु जक चलनय् छयला पुलांगु ढांचाया चन्द्रहार आतक्क नं मिस्तय दयेकेगुलि निरन्तरता बिया वया च्वंगु फाट्फुट् खने हे दु । थ्व सिलसिलाय वयकःपिन्त नं भीगु परम्परागत लक्षणगु तिसा दयेका तिइगु इच्छा व रुचि म्वाका तयादीपिं नं सुभायया पात्रत हे धायेमाः ।

“लुँ”यागु साधारण चक्का बुत्ता जुयानं चन्द्रहारं तिइबलय् तेजोवद्ध लाइगु, पूर्णचन्द्रमा थें दन्न जः दैगु जुया हे थ्व ताजिइ तिइपिन्त सौन्दर्य प्रतिष्ठा व अतल शौभाग्य दइगुलिं हे थ्व तिसाया प्रभाव नेवाः समूदायलय् आतक्क नं उलिहे क्वातुगु स्वापू दया च्वंगु दु ।

थःत पुलांगु चन्द्रहार यःपिं कुलिन खान्दान जःया मिस्तय् मदयकं
मगागु ग्यसु लुँ लगे याना जूसानं पूखां क्यना वंगु कलात्मक व मौलिक
चन्द्रहार दय्के बिया तिया जुया दीपिन्त सुभाय् देछाय् माःगु खना थ्व
तिसाय भिंगु लक्षण, दर्शनं युक्त व शौभाग्यया चिनारीया रूप्य भूमिका
दुगु चन्द्रहार नं भी नेवाःसमुदायया अद्वितीय च्वन्ह्यागु पुलांगु सांस्कृतिक
सम्पदा खः । थ्व तःजिगु सम्पदायात म्वाका तयेत योगदान बिया थःत्व
म्वाका धैर्य, अनुशासन, शौभाग्य, सुशीलताया भद्र संस्कार व परम्परा
दिगो याना तयेफयेमा धैगु दुनुगलं निसें आशा व भलसा याना च्वना ।
नापं थ्व बःचा धंगु च्वसुलय् विद्वत्त वर्ग पाखें आवश्यक सुभावया अपेक्षा
याना च्वनागु जुल ।



अंगू

भीगु समाजय् मानव विकासया नाप नापं थीथी:जन जातितय्सं अनेगु लुं, वहः, सिजः, नं व सिलेवरयागु तिसाया ताजि अंगू नं छगू संस्कार कर्मयाइबले छचला वै च्वंगु दु । परापूर्व युगय् मनुखं सभ्यताया शुरु निसैं थःथःपिन्सं अन्य धातुं दयेका तःगु अंगू संस्कार कर्म याइबले लुं, वहः व नंयागु अंगू मिसा मिजं नं न्ह्यायेगु यायां बुलुहुं बुरखा, कयता पूजा छन्हु न्ह्यः मस्तय् पाजुं भिंचाया छयनय् आंगस तैगु प्वाय्सं चिका वनेगु चलन यात । थयक बिचाःयाना स्वयेबले समाजय् नेवाःतय्सं अनेगु संस्कार, कर्म याइबले थथितियागु सम्बन्धया स्वापू शुरु यातकि जीवन भर हे क्वातुका तःगु यक्को खनेदु ।

शैशव कालय् हचाउँ मचाया छैथि खुन्हु निनिं भिन्चायात लुंया पिउचां न्ह्याकुसां निसैं तस्सकं सःतिगु क्वातुगु व्यले जुइगु संस्कार कर्म गथे कि मिजंमस्तय् कयता पूजा छन्हु न्ह्यो पाजुं आंगसय् अंगू चिना वनि,कन्हे खुन्हु अंगू दुगु भाग ल्यैका नौनं सं खाइ । थ्व खानदान नेवाःतय्सं आतक नं याना वैच्वंगु चलन खने दु ।

थय्क बांलाक वाला स्वयेबले नेवाःतय् स्याःन्यागु थःथिति कर्म काण्ड याइबले याये माःगु चलन न्हचव्वना याइम्हं व याकीम्ह सिया दथ्वी पाजु भिन्चाया सम्बन्ध साप हे ग्यसु लाःगु व स्नेह व ममतां जाःगु दु धका बांलाक कयना तःगु दु । थुके दुने दार्शनिक भावया परम्पराया स्वापू व अर्थ नं दयेमाः ।

भी घाँय् घाँय्चा आजु पुर्खापिन्सैं थःगु जीवनय् परस्परय् भिनेमा, सुस्वास्थ्य व दीर्घायुया मनसायनं कर्म व संस्कारया ज्याखँय् अन्य धातुया अंगू दयेका न्ह्याना वया च्वंगु न्ह्याइपुगु खँ खः ।

आ तक्क मिसा मिजं नं न्ह्याना वैच्वंगु अन्य धातुया अंगूतय्गु नां थन न्हचब्बयेगु उपयुक्त जुइ ताया । थयेक स्वयेबले तता मछि अंगूतय्गु नां फरक फरक जुया वंगुयानं छुं नं छुं मूल्य व मान्यता पक्का हे दुला धैथे च्वं । थजःगु बारे संःस्पिन्सं सामुहिक कल्याणया लागी तथ्यत प्रकाशन यानादिसँ धका हने बहपिं विद्वानतय्त इनाप दु ।

लुँ, बहः, सिजः व नया जीवन्त अंगूतय्गु नां थुपिं खः ।

- १) लुँया सादा अंगू
- २) " हिना अंगू
- ३) " अकवरी अंगू
- ४) " फोथुना अंगू
- ५) " नवरत्न अंगू
- ६) " नां अंकित अंगू
- ७) वहःया सादा अंगू
- ८) " प्याखं अंगू
- ९) " अजा अंगू
- १०) " लःपा अंगू
- ११) " पञ्चरत्न अंगू
- १२) " हिना अंगू
- १३) लुँ, वहःबा नया नां किया तःगु अंगू
- १४) सिजःया अंगू
- १५) जेड व दन्तया अंगू
- १६) कय न्याया छयंगुया अंगू (अलःकै दुपिन्सं न्ह्यायेगु चलन)
- १७) गथां मुगः चह्नेबले न्ह्याइगु नया अंगू ।

मानव समुदाय सभ्यताया प्रारम्भ निसे प्रस्तर हस्तिहाड व लुँ, बहः अनेगु कलात्मक अंगू मिसा मिजंतय्सं न्ह्यायेगु याना वै च्वंगु दु ।

नेवाःव अन्य क्षेत्री, ब्रम्हु, बैश्य तथा शुद्रंतय्सं नं अंगू न्ह्यायेगु याना वया च्वंगु खने दु ।

नेवाः समाजय् म्हचाय् मस्त बिया व्छइबले जिजाभाजु जुइम्ह
स्वयम्बर यायेया लागी वइबले स्वाँमाः क्वाखायेका गच्छे अनुसारया लुँ वा
स्वासाया हिरा थुना तःगु अंगू न्ह्याका स्वागत याइ ।

म्हयाय मस्त पयनं बिया व्छया प्यन्हु दु खुन्हु ख्वा स्वःवनी बलय्
बौम्हसिनं कल्या त्वका बाइ न्हयाकेया नापं लुँया अंगू नं उपहार बियेगु
पुलांगु परम्परा खः ।

नेवाःतय् ततःधंगु पूजा आज्ञा व्रत याइगु इलय् लुँ वहःया अंगू
पुरोहितयात धोति दान बिइबलय धातुया अंगू नं नापं बिइगु चलन दु ।

जःलय् सुं दिवंगत जुइगु इलय् काजक्रियाय् लुँ वहःया अंगू नं
दान यायेमा । अंगू व मानवया सम्बन्ध गाक्कं क्वातुगु आभास खने
दु ।



सुता

सुता “वःचा धंगु नेवाःखंगवः धुकू” शब्द कोषया धापूकथं गःपतय् क्वखायेगु धातुया छ्तातिसा, बौद्ध मार्गीतय् चुडाकर्म (बरे छुइवल्य) व मिसामस्त इहि याइवल्य संस्कार नापं स्वापू दुगु तिसा खः । नेवाः समाजय् थ्व तिसाया कलात्मक व दार्शनिक भावं गबले निसें संस्कारया ज्या इवल्य छ्यलेगु याःगु तथ्य अन्वेषण व अनुसन्धान मयासे धाये थाकुइ । थ्व तर्क संगत खः धायेगुलिइ निगु मत मदय्फु । सःस्युपिं सम्पदाविद, नृतत्वविद व समाजया ज्याथा पुरोहित वज्राचार्यतय्सं अर्थ छ्याना तःगु दयेफु । ‘सुता’ धायेवं वं तिसाया तिजि माय्काय् हःन गःपतय् क्वखाइगु धातु यागु कलात्मक लक्षणगु नापं उत्तरोत्तर उन्नति, सुस्वास्थ्य व दीर्घायु याइगु कथ्य नं उकी सुला च्वंगु दयेमाः धैगु अनुमान याये बहजू ।

‘सुता’ मुक्कं नेवाःसमाजया बौद्ध धर्मावलम्बी मिजं मिस्तय्सं सामुहिक रूपं परम्परा निसें तिया वैच्वंगु संस्कार पूर्ण तिसाया ताजि खः।

चवय न्ह्यव्वया कथं ‘सुता’ सम्भवतया वहः,लुंया चिट्ठिक च्वंक लोकंवाइ कथं कलाकार व ग्राहकया संयुक्त शोच विचारं ‘सुता’ तिसा मनूतय्सं गछे अनुसार दयेका तिइगु याना परम्परा स्वाकूगु ज्वीमाः ।

सुता तिसाया ताजि शैशव मस्तय्गु निगूगु संस्कार चुडाकर्मय् छचला व्यूथेनतुं मेखे बौद्ध धर्मावलम्बी मिसामस्तय् इहिपा जुइगु धाःसा स्वंगूगु संस्कारया दुने लाःगु खने दु । थ्व छाया थथे जुगा च्वंगुया लिसः पुरोहित वज्राचार्य, विशेषज्ञतय्सं अर्थ छ्याना तर्क यायेगु ज्या जुल धाःसा व बांलाःगु ज्याज्वी ।

वास्तवय धायेगु खःसा ‘सुता’ लुं वा वहःयागु ऐतिहासिक, सांस्कृतिक, कलात्मक, दार्शनिक, आकर्षण व अर्थपूर्ण परम्पराया नेवाः

तिसाया हे ताजि खः धायेगुया दुने गर्व नं दु । छाया धाःसां थ्व 'सुता' धैगु
धातुया मौलिक तिसाय् सकल नेवाःतय्गु सम्पदा नं खः । थजागु
च्वन्ह्यागु संस्कारया तिसाया ताजि म्वाका तयेगुलिइ बौद्ध मार्गी
नेवाःतय्गु निस्वार्थ देन हे दु धायेमाः ।



मेखला

नेवाः समाजय् परम्परा निसें वहः वा अन्य धातुया अनेगु स्वाँ, भंगः थीथी प्याखंया पात्रतयसं नं जबि तिङ्गु याइ । थजःगु तिसाया ताजि भीगु देशय् मायादेवीया गुँगूगु शताब्दीया मूर्तिया जँय् तिङ्का तःगु राष्ट्रिय संग्रहालयस अवलोकन याना दीसा दर्शकतय्त स्पष्ट जुइ । थःजःगु हे हुबहुःयागु सालगु (वहःया) पाताय् बुझा कथं कतां कियाः मखमलया पेटी तथा उकि नं क्वय् भल्लर पन्ना, वांगु पू तथा द्यो प्याखनय् पात्रतय्त तिङ्कीगु 'मेखला' खः । मेखलायात जबीन धाइगु आपालं चलन न्यने दु । नेवाः समाजया चलन न्हापां द्योपिन्त छयाया अलेतिनि मनूनं तिसा तिङ्गु चलन याःगु जुइमा धैगु जिगु अनुमान खः ।

खय्त जा सर्वसाधारण दर्शकतय्त ध्वाथुइके बीगु मेगु नां जँबी वा पेटी तिसा धायेगु उपयुक्त जुइला धैथें ताया । भीगु देशय् दर्शक वृन्दतयसं थजःगु मौलिक तिसातय्गु ताजि सिङ्के खनिगु नं छगू इच्छा, रुचि व पारखया ज्ञान बढे यायेगु शौभाग्य हे धायेफु ।

भीगु समाजय् मिज (पुरुष) वा मिसातय्सं गन इच्छा वइ अन उपाय नं दइ धाइथें कुतः जुइ । अले मनंतुना थासय् वन धायेवं अपूर्व प्राचीन ढलोट सिजःया द्योपिन्के बहलय् लुँ सिया बांलाका तइ । थ्व द्योया जँय् च्वनीगु मेखला वा जबी तिसा आपांसिनं स्वयेसातं हे अनुमान यायेछिं थें ताया । स्वय्त जा कुशल कलाकारतय्सं अपायागु लोहं, ढलोट वा सिजलं हे द्यो दयेका तःगु जुल धाःसा स्वयेबले जुरुक्क दना वइम्ह थें च्वनी ।

मेखला तिसाया ताजि यल, प्राचीन नगरया स्वसः व खवीदँ न्हचोयागु कात्तिक प्याखं व कुमारी, अष्ट मातृकाद्योया देवगण कलाकारपिन्सं कलात्मकगुजयें जबि तिसां तिङ्गु चलन कायम हे तिनि ।

खय्त जा मेखला तिसाया अने अनेगु चितिकक च्वंगु स्वये हे
न्ह्याइपुसे च्वंगु कलाकारतय्गु उच्च प्रतिभा मध्यकालं निसे उत्तर
प्राचीनकालयागु प्रस्तर मूर्तिंत थासं थासय् स्वये इच्छा याना भाइपिन्त
अःपुक हे अवलोकन याकेफु । न्ह्यागु न्ह्याथे हे जूसां भीग् देया
जनतां विशिष्ट संस्कार व उत्सव याइबेलस मिसातय्सं मेखलायात
पेटीया रूपय् छुयलेगु चलनया निरन्तरता दहे दनि ।

स्वनिगःदुने लायकूया न्हयोने लुं सियातःगु स्व.प्रताप मल्ल, योग
नरेन्द्र मल्ल व भूपतिन्द्र मल्लया सालिकय् नं जबि थें धातुया पेटि
चिकातःगु खनेदु ।



पाउजु

नेपाः गालय् स्वनिगः दुने लगभग द्वः छि व स्वसः त्या दँ न्ह्यो निसें राजपरिवारय् थ्व कलात्मक पाउजु तिसा मिस्तय्सं न्ह्याइगु खँ यें जंगा हितिया शिलालेखं स्पष्ट निर्देशित याना च्वंगु खनेदु ।

खयतजां थ्व तिसा भिस्वसः त्या दँ पाखे राजपरिवार बाहेक सर्व-साधारण लिच्छविकालया अन्तिम शासनय् तक्कनं कुलिन राजकीय खान्दानया जहान (महिला) मिसातय्सं जक तिइगु एकाधिकार जुया च्वंगु खनेदु ।

जंगाः ल्वहितियागु भीमार्जुनदेव जिष्णुगुप्तया छगू शिलापत्रय् पदक केयूर व नूपुर स्वता तिसा राजपरिवारयात तोता मेमेगु तिसाया ताजि दुनियाया नागरिकतय्त तिसा तियेगु अधिकार पावेजुगु खँ स्पष्ट धया तःगु खनेदु । संस्कृत नांया पदकयात कंठि गपतय्, केयूर धैगु लप्पाय् ल्हाः फोया च्वय व नूपुर धैगु पाउजु पालिफोया तिसाया ताजित खः । थ्व शिलापत्रे उत्किर्ण यानातःगु उगु स्वंगु तिसात पदक, केयूर व नूपुर महिमामय धाय् बहःजु । अन्य लुं वहया कलात्मक मौलिक तिसा तय्गु न्हयोने थुपिं स्वता तिसातय्गु प्रामाणिक इतिहासं भीत छुर्लङ्ग क्यना च्वंगु सत्य व तथ्यगु खँ माने यायेगुलिइं निगू मत ज्वी मखु थें ताया । थौं तकनं पाउजु तिसां ऐतिहासिक सांस्कृतिक छापयात जीवन्त वियेगु ज्याय् अत्यधिक नेवाः तय्सं तियाजुगु बाँलागु हे खँ खः ।

भी नेवाः संस्कृतिइ परम्परा निसें भीगु जातीय संस्कारत नापं पाउजु नं छगू कलात्मक मौलिक वहःया तिसाया ताजि समाजय् मिसा मस्त इहि यायेबले, बाह्रा तयेबले व शुभ विवहा (इहिपा) बले तिथिकिगु तिसात मध्ये मजिमगागु छगू शोभायमान तिसा नं खः । खयत जा न्हापा थ्व तिसा वहःयागु दयेकिइगु, लिपा जुया वःलिसे भारदारतय्संथें साधारण

नागरिकतय्सं नं मिसा मस्त बिया व्छैबले व तिसां तिइका व्छेगु नं
याना हल ।

आ थौया सन्दर्भय् थ्व पाउजु वह,लुँयागु दयेका मेमेगु क्षत्रि व
वैश्य ब्रम्हु वर्गतयसं नं साविक निसें छेला वैच्वंगु खँ नं तुलना याये
बहजू । न्ह्यागु न्ह्याथे हे जूसा नं नेवाःवर्गतयसं थ्व पाउजु तिसाया
ताजि भीगु संस्कारया ज्याखँय दलंदः दँ न्ह्यो निसें परम्पराकथं प्रमुख
तिसाया ताजि नाप लुँ वा वहःया पाउजु न्ह्यानावया च्वंगु खँ पुष्ट्याइ
याःथें ताया ।



चुल्या

नेपाल देशया १४गू अंचल व ७५गू जिल्लाया थासं थासय् प्यंगू वर्ण व स्वीखुता जातया मनूतय् बसोबास दु ।

बुद्धया वंश पश्चिम नेपाल कपिलवस्तु व रुम्मिनदेहि ग्रामे भन्दै निद्वःत्या दँ न्ह्यो निसें जनजीवन हना वैचवंगु थाय् खः ।

चवय न्हचव्वयागु कपिलवस्तु नगर व प्राचीन लुम्बिनी गांमय् गाक्कं पुलांगु वस्तिस् मिस्तयसं जनावरया क्वय् वा बुगु मृन्मय् पाखें “चुल्या” तिसा दयेका ल्हातिइ न्ह्यायेगु याना वयाचवंगु खने दु ।

तराइ पाखे उत्खनन स्थलय् अनेगु आन्टिम्बिटीत मध्यय् किसिया दन्तयागु पदार्थ मिजं वा मिस्तयसं कलात्मक चुल्या न्ह्यायेगु याः धैगु खँ अध्ययन व मनन यायेबले ध्वाधुइक कने फुगु तथ्य थें ताया ।

मृन्मय वा जनावरतय्गु बहुमूल्य क्वय्, दन्त वा स्वर्ण धातु छु पदार्थ पाखे चुल्या तिसा न्हापां दयेका न्ह्यायेगु याना वःगु खँ अनुसन्धानया विषय खः ।

वर्तमान नेपाःदेया राजधानी यें टंगालया इर्द गिर्दय् लोहँयागु १०७ शक सं.या जयवर्माया अभिलेख दूगु मूर्ति लुया वःगु छगू महत्वपूर्ण घटना खः । व शालिकय् मिजतयसं नं छातिइ पदक क्वखायेका चुल्याय् चुरी न्ह्याका तःगु दर्शनीय दसि थें ताया । थ्व सारंकृतिक सम्पदां राजकीय शासक वा न्हापा मन्त्री, शामन्ततय्सं छातिइ, ल्हातिइ, न्हाय्पनय्, ल्हाः फोलय् बहुमूल्य बस्तुत वा लुँ, वहःया तिसां तिइगु चलन दु धैगु तथ्य प्रकाशय् वल धाये माः ।

स्वनिगः दुने यें प्रतापमल्ल, ख्वपय् भुपतिन्द्र मल्ल व यलय् योगनरेन्द्र मल्लया स्वर्ण मलम्वा शालिकय् नं तिसाया ताजिं छायेपिया तःगु स्वया दिइत इनाप याना ।

ने.सं. ७५० या छगू थ्यासफुतिइ लक्ष्मीनर्सिंह मल्ल स्वयम्भूइ पूजा मैन छत्र छाया आयोजकं निम्तो यागुली सम्मिलित जुया बिज्यात । थ्व अवसरय् जुजुं गुरुयात पदक लःल्हायेगु चलन उगु इलय् मदु । बरु पूजा आयोजकया गुरु भराडयात कदर याना जुजुं परिगा छपु व लुँचुल्या बिया सम्मान याःगु महत्वपूर्ण पलाः धायेमाः । थ्व तथ्य मेडियभल कोलोफोन्स एण्ड इन्स्क्रिपसन अफ नेपाल धैगु ग्रन्थय् उल्लेख जुया च्वंगु दु ।

थौया स्वनिगः दुने नेवाःसमाजय् तःजिगु सामाजिक ज्याखँय् मिस्तय् अप्पो याना लुँया फुस्कलु व दुदंगु चुल्या न्ह्यायेगु आपालं चलन निरन्तरता हे खने दु । चुल्या तिसाया नं तताजि नां खने दु । कल्या, चुल्या, मौ, पञ्चरंगि चुल्या, व पतचिंगु तुसिपु बुत्ता तथा बांवांलाःगु प्रचलित नां लुँचुरी मिसातय् लोकप्रिय तिसा जुया च्वंगु दु ।

खय्तजा थौकन्हे नेवाः समाजय् परम्पराया तथ्य व दार्शनिकताया छाप लुँ, वहःया तिसाया ताजि कोथिक स्वइपिन्सं आपालं थुइके थाक्या वःगु खनेदु ।

लुँ चुल्याया महिमा, गरिमा व प्रतिष्ठा मिस्तय्त गाक्कं प्रभाव लाना वै च्वंगु खने दु । गुलिं गुलिसिनं साविक तालं गुलिसिनं युग अनुसार शौभाग्यया प्रतीक कथं लुँ चुल्या न्ह्याइ । थुकिइ दुनेया वास्तविकता वाला अनुसन्धान याना तथ्य प्रस्तुत यायेगु सामुहिक कर्तव्य हे थें ताया चुल्या तिसाया ताजि प्राचीन युग निसें च्वय जिं न्ह्यब्वया कथं हस्तिहाड, क्वंय्, मृन्मय, लुँ, वहः, सिजः, ली व नँया पदार्थ दयेका अनेक उद्देश्यं न्ह्याना वया च्वंगु खँ भी सकलसिनं सिया च्वंगु तथ्य खः ।

धात्थे धाये माल धाःसा बर्तमानयुगय् अन्य पदार्थया चुल्या सिबय्
नं “लुँ चुल्या” अत्यधिक मिस्तय् लोकं व्हागु तिसाया ताजि खः धायेमाः ।

भीगु संस्कृति कथं ‘लुँचुल्या’ तिसाय् ताजि न्हापा न्हापाया युगय्
मिजंतय्सं तिङ्गु याना वै च्वंगु खँ अभिलेखय् उत्कीर्ण जुया वैच्वंगु थासं
थासय् खनेदु ।

वास्तवय् थौं मिहगः जा लुँ, स्वासाया दुदंगु व फुस्कलुगु कलात्मक
चुल्या मचा ल्यासे व अधवैसं निसें ज्याथिपिन्त तक नं अतिभनं यःगु
तिसाया ताजि मध्यय् छता खः धायेगु औचित्य खना ।



‘मोतासा’ (सँतफली)

नेवाःसमाजय् संस्कार कार्य याइबले लुँ वा वहःया अने अनेगु तिसाया ताजि मस्तयत् तिइके माःगु यक्वं चलन व परम्परा दु । परापूर्व निसें नेवाःसमाजय् दँय् दँसं मुख्यगु स्थानीय जात्रा, मोहनि व स्वन्ति नखःचखः बले नं सरबतय् वहःयागु कलात्मक मोतासा (सँतफली) धायेगु चलन खने दु ।

थ्व वहःया चिट्ठक च्वंगु कलात्मक बुत्तां जाःगु सँतफली तयाः समा याइबले मिस्तय् मन हे थहाँ वइगु व सन्तोष नं महशुस याना ह्याउँक वा हाकुक् सचिका तया सरबत थुइबले शोभा अपो बढे जुइ । अले मिस्तय् सरबतजोले मानो छुं फल थें घाना श्रृंगार यानागु भाःपिइगु खनेदु ।

अथे जा नेवाःजातिया मिस्त थःगु पुखां छ्यला वगु तिसाया ताजिं छायेपिइबले गुलि लुदनि, न्ह्याइपु ताइ । मेमेगु वहःया तिसा तिइबले गथे समझ जुइगु खः व मिस्तय्सं हे स्यू । थ्व च्वय न्ह्यच्चब्यागु वहःया सतफली तया समाः याइबले, उपयोग याइबले शौभाग्ययां तिसाया ज्वलं धका नं परिपक्वपिं बुद्धिपिनि खँ ल्हाइगु ताये दु । भीगु समाजय् थुजागु मौलिक तिसा इहिपा, बाह्रा तइबले व इहि याइबले नं प्रयोग याना वःगु खनेदु । न्हापा मध्यकालया समाजय् न्हापा लिपा वहः वा लुँया तिसां अगतिं तियेगु चलन उस्त मदु । परम्परा निसें भीगु जुन जीवनमिस्तय् थासय् मिस्तय्गु हे किसिमं विशेषता व मान्यता दैच्वंगु खँ आपासिनं स्यू ।

भीथाय् न्हिया न्हिथंया जीवनय् नयां प्राण तियां शोभा धैगु हे तिसा वसः छगू मज्जि मगागु मनूया श्रृंगारया सामग्री नं खः । थथे गुलिं गुलिं मनूतय् धापू कथं दैबले तिसा मदै बले नसा’ धायेगु चलन नं व्यापक खने दु । मेगु दृष्टिं बिचाः यायेबले वहः वा लुँ हे छाये थमजुइमा

गुलि ग्यसु लाक तिसा दयेका तइ, उलिहे आपतकालय् गरज तरे
याकिम्हनं तिसा हे खः । छायकि मनूतय्के नगद स्वथना तयेगु व लु,
वहःया जगेडा तिसा पचिंक दयका तयेफत धाःसा थःत मालिबले जिन्सी
नगद याये माल धाःसा अःपुक यायेफु ।

भी नेवाःमिस्तय्सं थौतक नं वहःया कलात्मक मौलिक शताब्दीयौ
पुलांगु तिसाया ताजिं तिया जातीय गौरवयात निरन्तरता बिया भापिं
सकल मिस्त धन्यवादया पात्र धायेमाः । मुख्य खँ भीसं भीगुत्व कायम
यानातयेगु सकसिनं नं कुतः यायेगु सामुहिक कर्तव्य खः ।



तुति बकि

नेवाःसमाजय् अपोसिनं सिउ स्वनिगः न्हापा न्हापा निसें मन्दिर वा छेंया छें जाःगु दे खः । परापूर्वकालनिसें उपत्यका दुनेया आदिवासी महिषपाल, गोपाल व गोमी जाति कुलिन सभ्य परिवार खः । समाजय् शैव,वैष्णव शाक्ततय् म्हयाय्मस्त उमेर थ्यनावल कि पय्न्ह ल्हाःवइगु स्वभाविक खँ खः ।

स्यस्योतय् इहिपाया लागी म्हयाय् बीत कोछिइ धुन कि परम्परा कथं बाजां थाका जन्ति वया भमचा काः वया विधिवत थाय्भू नका ग्वय् बी सिधयसाथं पित बिइगु इलय् दतले बाजुम्हसिनं भमचा पितबिइ न्ह्यो थःगु छेंय् हयेतः वहः वा ढलौटयागु कलात्मक तुति बकि न्ह्याकेगु अनिवार्यगु चलन न्ह्याना वै च्वंगु दु । तुति बकि वहः,ली व ढलौटयागु दयेकीगु खः । तुति बकि न्ह्याकीगुया अर्थ लक्ष्मीद्यो भाःपिइगु खः ।

खयत जा थ्व तुति बकिं तिसाया ताजि परापूर्वकालनिसें शैव, वैष्णव, शाक्त व बौद्ध द्योपिनि तुतिइ तिका तैगु आपासिनं सिया वै च्वंगु खः । थ्व दर्शनीय वहः वा धातुयागु तिसां निपा तुतियागु नं शोभा बढे याना तःगु खनेदु ।

छःथरि स्यस्योतय्सं गबले निसे छांय् छु प्रभाव व परम्परां भमचा काःवनी बले न्हूम्ह थः भौमचायात तुति बकि थिति कथं न्ह्याकेगु गुबले निसें छेला वःगु खः ? अन्वेषण व अनुसन्धान मयासे धाय हे थाकुइ । थ्व तिसां तिइपिनि नं सौम्य द्योयागु शीप व गुण दयेमाः धाइ ।

थय्क थ्व कथ्य शोच विचार यायेबले न्हापां निसें मिस्तय् इहिपा जुइबले न्हूम्ह भमचा धका कतःया छें दुत यंकि बलय् विधिवत गृहस्थीया बन्धनय् लाइगु स्वतः स्पष्ट क्यो । तुति बकि छगू कथं

अपरिचित परिवारया अनुशासन घेराय् च्वना जीवन हँ वने मालिगुया प्रतीक खः ।

चवय न्ह्यथना कथं समाजया न्ह्योने आवंनिसें जिमिगु कुलया परम्परा विधिवत तजि लजिइ च्वना जीवन हना सुख दुःख समभावं व्हं वयेमाल न्हि धैगु संकेत ब्यूगु भाःपी माः ।

मेगु छखा छेंया म्हयाय् मचा जिमिथाय् लसकुस याना मूलुखां निसे ताःचाः क्वय्ना सँ प्याका, थः छें नं खाः स्वके ब्वना निकट भविष्यय् द्यौ पूजाय दुकाये धुनेवं आगमय् नं दुकाये धुनकि भन सःतिम्ह जःया स्याम्ह सदस्यय् परिणत जू वने माःगु दु । थजःगु धिति रिति परापूवं निसें चले जुया वयाच्वंगु स्वतः स्पष्टगु तथ्य खः ।

नेवाः समाजय् परम्पराय् संस्कारया ज्या खँय् लुं वहःया तिसाया ताजि आदर्श व कारण नापं बांलाक दुवाला स्वयेगु चिन्तन मनन यायेमाल धैगु जिगु विशेष सुभाव व सल्लाह प्वंका च्वना ।

भी आजुपिन्सं बिया थकूगु उत्तरोत्तर उन्नति, सुस्वास्थ्य व दीर्घायु, सन्तान दरसन्तानतय्त उपलब्ध जुया वै च्वंगु परम्परायात कघाना म्वाका तयेगु भीगु सामुहिक कर्तव्य नं खः ।

थयक स्वये बलय् सभ्य समाजय् प्रचलित परम्परायागु सनातन संस्कारगत मौलिक तिसातय्गु ताजियागु गहन मूल्य मान्यताया आदर्श स्यूपिन्सं मस्यूपिन्त कना थःगु दर्शनया गरिमा सर्वसाधारण पाठकयात आकर्षण बी फै तिनि धैगु खँय् जि विश्वस्त जुइमाः धैगु पक्षय् दु । छिकपिनिगु सुभाव व आलोचनायात स्वागत दु ।



सुराहिचा

स्वनिगः दुनेया आदिवासि नेवाःतय्गु संस्कार दुने अगतिं तिइगु व लुँ वहःया कलात्मक परम्पराया तिसातय्गु ताजिइ 'सुराहिचा' तिसा थःगु थासय् दु । भीगु कलात्मक लुँ वहःया तिसातय्गु ताजि आपा आपालं दुगु खने दु । खयत जा सभ्य समाजया जातीय सांस्कृतिक सामग्रीतय् दथ्वी कलात्मक 'सुराहिचा'या नं मौलिक ताजिया थःगु हे अलग भूमिका दु । परम्परानिसें लुँयागु कलात्मक 'सुराहिचा' मिसा-मिजंतय्सं तिइगु सामूहिक तिसा खः ।

पुलांगु समाजय् वैश्य व कृषक समूहया भारो व भावोपिन्सं मिजंतय् थःगु वस्तय्, अले मिस्तय् सपलय् व म्हय् 'सुराहिचा' तिइगु चलन दु । आतक नं नगर क्षेत्रय् व गाँ विकास त मध्यय् यल बृंग, तःखोना व चिखोनाया कृषक मिस्तय्सं नख, चखः व स्थानीय जात्राया उपलक्ष्यस पाहाँ वनिबले कलात्मक लुँयागु 'सुराहिचा' मौलिक तिसां तिइगु चलन खने दनी ।

न्हापाया समाजय् ज्याथ- जिथि, ल्याय्म्ह ल्यासे व मस्त लज्यां, मछालिगु थुइकेफुगु अनुशासन खः । गन छेंय् थकालिपिन्त अदव व सद्व्यवहार दइ, अन छुं हे गतिविधिइ बांमलागु आँच वैमखु । प्राचीन युगया समाजय् सद्व्यवहार, विश्वासय् प्रतिवद्धता पुरेयाना जीवन हनेगु हे सही मानवताया भूमिकाय् तेवा बियेगु खः ।

न्हापा न्हापायागु समाजय् न्ह्यागु क्षेत्रय् नँ भिंगु किसिमं कालबील यायेगु, इमान व वचन पुरा यायेगु, पूर्खातय्सं क्यना थकूगु लय् वनेगु थः थःगु कर्तव्य व निष्ठा खः । धाइ नापं मनुखं गजःगु मतिइ तइ अजःगु हे गति जुइ हँ । बांमलागु ज्या याना भिना वः धापिं थ्वं समाजय् दहे मदु धाःसां ज्यू । भीसं थुयेके माःगु सामाजिक व्यवहारय् गति दइगु ज्या यायेमाः ।

बांलागु निष्ठा व आस्थां हे समाजयात दूरदर्शी लँ क्येना तःगु अनुकरण याये फुपिं मिजँ, मिसा न्ह्याह्मनँ समाज व देया सेवा यायेगुलिइ सक्षम जुइ । गुह्मस्याँ सर्गः थें तःधंगु मनंतुनां व्यवहार याइ, वया भविष्य अवश्य नं बाहे लाइ ।

भी नेवाःजनमानसय् परम्परां निसें धर्मदर्शन व मौलिक प्रविधिइ थःगु क्षमतां ब्यक्तं लुँ वहःया तिसातय्गु ताजिया दुने अर्थ पूर्ण आशिका व दार्शनिक भाव दुपिना च्वंगु अपो तथ्य खनेदु । न्ह्यागु ज्या खँय् नं श्रम व साधना याना वइगु फल व नैसर्गिक अधिकार सिबय् अपो प्रतिफल कायेगु मनासिव पक्का हे मखु । पुर्खा वःगु नैसर्गिक अधिकार व्यक्तिं उपभोग याये दै । उकिं सन्तोष हे परम सुख खः धाइ । आयागु समाजय् आजुपिन्सं उत्तरोत्तर प्रगति सुस्वास्थ्य व दीर्घायु जुइ भाःपिया परम्परा निसें संस्कारय् छ्येला वंगु लुँया जंकुचाः, वहःयागु दुदंगु कल्लि मस्तय् न्ह्याके माः धैगु हे अनुसन्धानया विषय जुइ धुकल ।

भ्यातूगु लुँया मारबलि चाचा क्यातुगु उमेरया मस्तय् न्हाय्पनय् तिइका तल कि क्वययागु न्हाय्पं सिथय् थतुलाः वनिमखु धाइ ।

अथेहे न्यासे वने मसःतल्ले मस्तय् तुति निष्पायनं दुदंगु वहःया कल्लि न्ह्याका तइगुलिं शारिरीक सुसंगठनय् तिबः दैगुलिं निदँ तक न्ह्याके बीइगु हे वेश ताया ।

चवय न्ह्यच्चवयागु लुँ चकंछि चकंत्याति ग्यंसु दंगु मौलिक कलात्मक सुराहिचा तिसां नगर रिखें भद्र पुरुषतय्सं नं गौरव याना न्ह्याइपुक म्हय् घाना तिया जूगु न्यना । परिपक्व ज्याथ-जिथितय्गु धापू कथं उकिइ चौ तया स्वनिगःया प्रतिष्ठित मिजं-मिस्तय्सं सुराहिचा तिसां तिया वैच्चंगु सः न्यना वैच्चना । थय्क स्वयबले चिकिचा धंगु हे सामूहिक तिसा जुगुलिं परम्पराया पृष्ठभूमियात कदर याना वैच्चनेफुगु नं भीगु विशेषता खः ।

थौं भीगु परम्परां निसैं मिसा मिजंतय्स संस्कारया ज्या जुइबले लुं वहःया तिसाया ताजित प्यंगू खुगू दशकया दुने सम्पदाया रूपय् थाय् काये धुंकूगु तायो तुकि, सुराहिचा तिसानं स्वयेत अभाव जुजुं वल ।

उकिं सकल संस्कृतिइ आस्था व लगन तैपिं भाजु मयजुपिन्सं पुर्खा छचेला थकुगु मौलिक तिसाया विशेषता मुंका समाजय् सामूहिक कुतः नं न्ह्यब्वयेनु । स्यूपिन्स मस्यूपिन्त तिसाया दर्शनया विषय कनेगु व धायेगु हे भीगु संस्कृतिया मूल्य मान्यता च्वन्हचाकेगु खः ।

भीगु मौलिक तिसाया ताजित मध्यय् संस्कारगत कलापूर्ण परम्पराया लुं वहःया तिसां थःगुहे अर्थपूर्ण दर्शन, लक्षण व स्वास्थ्य वर्द्धक ज्या याः। उकीयात भी पुर्खापिन्सं भूमिका तोता वंगु कथ्य आदर्श कायम यायेगु सामूहिक प्रयासय् निर्भर ज्वी । परम्पराया कलात्मक तिसा फतले म्हासे मयायेगु नं सामूहिक प्रयत्न यायेनु ।

परम्पराया तिसा भीगु सांस्कृतिक आस्था व मालिबलेया गर्ज तालाकेगु नसा नं खः, ग्वहालिया पासा नं खः धायेगु हे उपयुक्त जुइताया ।



गोगुल

नेवाःसमाजय् न्हायपनय् मिजंतय्सं तिइगु रुद्राक्ष गोलय् लुं भुना चौ तया शैव, शाक्त, वैष्णव व बौद्धतय्सं भिंगु धार्मिक पर्वय् छयला वया च्वंगु तिसाया नां खः “गोगुल” ।

स्वनिगः दुने मध्यकालय् जन मानसयात शारीरिक ल्वय् जुल कि वैद्य कविराजं उपचार याकेगु चलन दु । थथे हे सुयां छें मस्त, उमेर बाजः पुले धुंकूपिं ल्वंगियात विषमज्वर, वात, कफ, पित्त, पिनास, हृदयघाट ल्वय् जूपिं मध्यय् छें च्वना ता तक वास याये धुनेवं स्वास्थ्य लाभ जुल कि न्हयाम्ह खुशी ज्वी ।

ता तक ल्वय् जुया बिरामीया स्वास्थ्य लाभ पूरा मात्राय् जुल कि उसा मदुम्ह रोगीं वैद्य कविराजयात खुशी विभोर जुया लुंयागु गोगुल तिसां तिइका हइ । थ्व छगू रोगीव स्वास्थ्यविद् वैद्य कविराजया दथी सुमधुर स्वापूया प्रतीक खः धायेछिं । नापं समाजय् ततःजिगु उपकारया सेवाय् तल्लिन जुया जुइपिन्त कदर याइगु बांलागु चलन खः ।

नेवाःसमुदाय सुयां धर्म चित्त उत्पत्ति जुया थः च्वना वयागु त्वाःबहाः नापं कलात्मक लोहंयागु चिभाःदयेका स्थापना यायेगु लगतय् हे वंलापूजा न्यायेका नगरया नियम दुने लाःगु चिभाः परिक्रमा यायेमाः । थ्व विशेष समारोहया अवसरय् आयोजकं गुरु पुरोहितयात सम्मान याना न्हायपनय् लुंया गोगुल तिसां तिइका कपालय् बहःया बटाचिं चिइकेगु चलन दु ।

नेवाःसमुदायलय् समूहया भलाइ व बहुजन हिताय ज्याखँय् सम्पन्न धार्मिगातय्सं थःगु तालं धार्मिक बहाः, बहाःया चैत्य पूजा वना न्हूगु

चैत्ययात नं परम्पराय् दुथ्याकेगु लागी वंला विशेष पूजा यायेमाःगु यक्व
पुलांगु परम्परा जुइमाः ।

थजागु पवित्रगु धर्म कीर्ति वृद्धि यायेगु ज्या यायेगु लँ कचेना वंःपिं
पूर्खापिन्त सामूहिक सुभाय् देछायेगु सामयिक औचित्य ताया ।

भिंगु ज्याखँ यायेगु पक्षय् समाजयात लँपु वयनेगु नं प्रेरणदायि
पलाः जुइ ताया । मानव कल्याणया लँय वनेगु व बहुजनयात शान्ति ब्रिये
फैगु अन्य ज्यायात भीसं तिबः बीमाः ।

नेपाःदे विश्वया मानचित्रय् गाक्कं चीकूगु दे जूसां सांस्कृतिक
उत्तरोत्तर वृद्धि व स्थायीत्वय् योगदानयाःपिं पुरोहितयात गोगुल लुँया
तिसां तिइका कदर याइगु बांलागु ज्या खः ।

अनं समाजय् आपालं तातक्क विरामी जुया च्वंपिं विरामीतय्त
वासःयाना ल्वय् लायेका बियादीपिं वैद्य कविराजयात ल्वय् लायेका ब्यूगु
वापतय् लुँयागु कलात्मक गोगुल तिसां तिइका वय्कःपिन्त इज्जत साथ
कदर याइगु चलन न्यना । अन्तिम मल्ल शासन निसैं नेवाःसमाजय्
आयुर्वेदया धिसिलागु नतिजा वइगु वासःबिया उपचार याइगु न्यना
च्वना । वैद्य कविराजं ब्यूगु निर्देशन कथं रोगिं ऋहुतु म्हाला पथ परेजय्
च्वना वासः सेवन यातकि विरामीयाहे कल्याण ज्वीगु खः ।



लुँ स्वां

नेवाःसमाजय् परम्परा कथं छचनय् तिङ्गु शिरवन्दी बुलिन, न्यापु सिखः, सिन्चा, कोलंफा, भट्ट नतुचा थें लुँ स्वां नं छगू कलात्मक व मौलिक तिसा खः । स्वनिगः दुने नेवाः मिस्तय्सं तिङ्गु १२" इन्ची वृत्ताकारगु थ्व तिसाया चक्काय् कलात्मक भंगः छज्वः तया हिंसिचा दय्क बहुमुल्य पत्थर पन्ना, पुष्पराज, माणिक व भिम्पु थुना छायेपिया तःगु खनेदु । गुलिं 'लुँ स्वां' जा अज्ज सिमाय् भंगःया स्वँथें चवंक प्राकृतिक बुत्ता दँलय् पिकया भंगःतयाः भव्य लुँयागु तःजिगु स्वां दयेका तःजिगु ज्याखँ इहिपा, कयतापूजा, मोहनी व स्थानीय जात्राय थुंखे उखे वनेगु इलय् नं नलिपिं भौमिस्तय् तिङ्गु चलन दु । च्वय न्ह्यचव्वयागु तिसाया ताजि दुने सांस्कृतिक व प्राकृतिक छाप दुसुना च्वंगु खनेदु ।

नेपाःया क्षेत्री, ब्राम्हण, गुरुंग, लिम्बु, थकालि जातिया मिस्तय्सं नं लुँयागु अन्दाजी १४" इन्चीया वृत्ताकारगु कलात्मक स्वाँया दथ्वी भिम्पु थुना छयनय् छुङ्गु चलन दु । च्वय न्ह्यःथनागु जातिङ्गु नं व तिसा तःजिगु ल्याखं शुभ इहिपा, मेला, पर्व व स्थानीय जात्राय 'लुँ स्वां' छेलाच्वंगु दु ।

नेवाः समुदायया मिस्तय्सं प्रारम्भिक मल्लकाल अर्थात् बाह्रौ, तेह्रौ शताब्दी ई. निसैं हे लुँ स्वां तिसा तीगु याना वैच्वंगु खनेदु । नेवाःसमुदाय बाहेक मेपिं समुदायया मिस्तय्सं छंयया ल्यूने वा छयों फुसय् गुलिसिनं सपलय् नं कलापूर्णगु स्वां तिसा बिबाह, मेला, स्थानीय जात्राय प्रतिष्ठा प्रदर्शन यायेगु हिसाव 'लुँस्वां' तिङ्गु व्यापक चलन खनेदु । थ्व च्वय न्ह्यचव्वयागु तिसाय् नं गावकं नेपाःदेयागु मौलिकता खनेदु ।

कलात्मक लुँस्वां तिसायागु प्रतिष्ठा मध्यकालनिसैं आतक्क नं नेवाः समुदायया मिस्तय् समाजय् दयाच्वंगु खनेदु ।

गुगु नं लुँ व वहःया सांस्कृतिक, प्राकृतिक छाप दूगु न्ह्याथें जाःगु तिसाया ताजि नं मिस्तयूत यइगु स्वभाविक हे खः ।

भीगु समुदाय व मेपिं विभिन्न जाति उपजातिपिंत थ्व लुँस्वां तिसां गाक्क आकर्षण याना वया च्वंगु खँय् निगू मत ज्वी मखु ।

थ्व देया चेतन दुपिं मिस्तयूस् कलात्मक 'लुँस्वां' तिसाया ताजि छगू सामूहिक नेपाःया सम्पदाय् थाय् कायेके बिइगु नं मानव समाजया ल्हातिइ दु ।



माकःसि

स्वभिग दुनेया आदिवासित मध्यय् ज्यापु जन जाति भीःनेवा समुदायलयभरासर लागु खयँ सुयाँ निगू मत जुइ मखु ताया । प्रवुद्ध नृतत्व विदतय्गु धापू कथं ज्यापु पुलापिं नेवाःजाति मध्यय् छगू खः ।

प्राचीन नेवाःसमुदायया जनजाति दुने ज्यापु व ज्यापुनीत नेपाल समाजय् प्राचीनयुगनिसें न्ह्याबले ज्यां मलापिं धैगु भीसं बांलाक ध्वाथुउ । थुपिं आदिकालनिसें बुँज्याय् गावकं मिहेनत व अथक परिश्रम याना दिनचर्या हना वया च्वपिंख गुगु जातियात भीगु मध्यकालीन अभिलेखय् भावो धका सम्बोधन याना वया च्वंगु सकसिनँ स्यूगुहे खँ खः । सदा सर्वदा अवल, द्वयम, सीम व चार बुई बडो परिश्रमं ज्या याना ईव्यो मदय्क वा, छो, आलु, कःनि, तरकारी पिना थःथःगु मिहेनतया कमाई नयाः स्थानीय नखः चखः मेला जात्रा मोहनी व स्वन्ति परम्परा कथं संस्कार याना, भवय् गुथि गानाय् शरिक जुया वैच्वंगु भी अपोसिनं स्यूगु खँ धायेमाः । इमि नापं दँयदँसं वैगु दिगु पूजाय् दाजु-किजा फुकि सकलें व्हना नये माःगु चलन दु ।

ज्यापु समाजय् न्ह्यामहसिया नं शैशव अर्थात ह्याउँ मचा बुया ई त्यलकि काय् बा म्हचाय्या कर्म खंकेगु ज्या मचा जंक्व, कयतापूजा, बाहातया, इहिपा यायेगु शुभ पर्वय् लुँया माकःसि, वहःया तःपूगु सःखि सिखः क्वखाया, सपलय् वहःया कातां तियाः विधिवत थःगु संस्कारया ज्या याना वया च्वंगु तस्सकं स्वये हे न्ह्याइपुसे च्वनेमाः धैगु जिगु धारणा व्यक्त याना वयागु दु ।

विशेष खँ यल शहरय् न्हापा न्हापा गुलि मिस्तय्सं सिजःया माकःसिई लुँ सियाः बा मुकं लुँया माकःसि तिइगु चलन दु ।

ध्वहे मुख्यगु न्हायपनय सुइगु माकःसि तिसाया ल्यूने स्वनिगः दुने
छगू प्रशिद्धगु पुलांगु भीगु समाजया थकालि हनेबहःपिसं न्हयशंगु व
पिल्होगु ख्याःयाइगु तथ्यपूर्ण धापू थन न्हचव्वयेगु उपयुक्त जुइ ताया ।

“यमि भ्वासि ताःचा प्वांय् घासि
यलय् भ्वासि सिजलय् लुं सि
खवपय् भ्वासि छें कःसि”

चवय न्हयथनागु खँत्वा सच्छि सत्याः दँ न्हचोनिसे आतक्क नं
बुढा-बुढीतय्गु धापू खः । उकिं थन व न्हचव्वया चवना । आ भी ज्यापु
समाजय् जीवनस्तर बुल्हु थहाँ वंगु फलस्वरूप न्हापा थें सिजलय् लुं
सिया माकःसि दयेका सुइगु चलन न्हियान्हिथं कम जुजूं वःगु तथ्य
आपासिनं स्यूगु खः ।

जिं चवय न्हचथनागु माकःसि तिसा सुं पाठकतय स्वमास्ती वःगा
भीगु राष्ट्रिय संग्रहालयस बना सोभाय् फु ।

ध्व पुलांगु माकःसि तिसा जिं स्वयेबले नादंगु फल भुईकटहर वा
फंसिया प्रतिविम्ब याना न्हापा न्हापाथापिन्सं बांलागु छ्वांतं तिसा दगेत्ता
माकःसि न्हायपनय सुइगु शुरु यागुला धै थें अनुमान याना ।

भी समाजय् धात्थें धायेमाल धाःसा स्वःनिग दुनेया गेंया हाडि
गां छगू नकं पुलांगु बस्ति खः । दँय् दँसं हाडिगामय् जुइगु छगू पुलांगु
तिसा मालिगु ऐतिहासिक जात्राय् अनयापिं ज्यापुतय्सं व जात्रा आयोजना
याना विधिवत पूजा याना विसर्जन याना वैच्वंगु दु ।

मेगु यें पचली भैरव व भद्रकाली चो प्याखनय् नं स्थानीय
ज्यापुत युग युगं निसे संलग्न जुया वैच्वंगु भीसं ल्वमंके थाकुइ । जिगु
व्यक्तिगत धारणा कथं ज्यापु जन जाति गुलि पुलांगु जाति खः धैगु तथ्य
दुवाला स्वयेगु खःसा पचली व मचलीया जात्रा पर्वया पुलांगु अभिलेखत

अध्ययन मनन व अन्वेषण यांना स्वये फत धाःसा भीत अपो खँ
ध्वाथुइके अःपुइ ताया ।

यलय् जुइगु लोक प्रसिद्ध बुंगःद्योया जात्राय् नं स्थानीय ज्यापुत हे
योवा, घःवा, पौवा, काःपुइपिं हानं मेगु छगू रोचक दसि प्रत्येक सल्हू
गुथी त्वाः त्वाःया ज्यापु समूहया बुंद्योयाथाय् जात्रा पर्वय तुतः ब्वना,
भजन यांना; पुलांगु थितिकथं दापा थाना द्योल्हाये धुन कि आरती बिया
विसर्जन यांना वैच्वंगु दु । खयत जा ज्यापुत थें तुं स्यस्योत, शाक्य,
बज्राचार्य, शौर्य, शैव व वैष्णव सम्प्रदायतय्सं थः थःगु कथं इलय बिलय्
परम्पराय् ब्वति कया तन मन धन समर्पण यांना बुङ्गद्योयात भक्ति व
श्रद्धां अति हे मानय् यांना वैच्वंगु खः । द्योत मध्यय् बुंगःद्यो व
चाकबाद्योया पर्व गुलि पुलां नेवाःजन जातित नं उलि हे पुलांपिं आदि
बासित खः धैगु अप्पो मेगु छुं प्रमाण प्रस्तुत याये मालिथें जिं मताया ।
समाजय् थःथःगु जनजातितय् दार्शनिक, आर्थिक, सांस्कृतिक व पुर्खा
निसैंया छाप व परम्परायात म्वाका जीवनयापन यायेगु, याकेगु भीगु
प्राचीन परम्परा नं खः ।

यलया पुलांगु ज्यापुतय्गु बस्ति खपिंछ्छें त्याङ्गा भैरद्योया छगू
विधिवत स्मारक दु । थ्व प्राचीन चपाःया नाप छगू जहुंलय् लिच्छवि
शिलापत्र याने अभिलेख किया तःगु ब्वने बह जू । व जहुंया सेवा संरक्षण
हेरविचार यायेत आयस्ता तया गुथि स्थापना यांना दातां थःगु निर्मल
कृति तया वंगु तथ्य प्रकाशय् वये धुंकूगु नं खः ।

आ थयकः खपिंछ्छे भैरद्योया पुलांगु विधि व रिति थितिकथं
स्थानीय ज्यापुतय्सं प्राचीन गुथि गाना पर्व पूजा नं यांना वया च्वंगुलिं
व जनजातिया ऐतिहासिक पृष्ठभूमिया संकेत स्वतः क्यना च्वंगु दु ।
थःजागु हे सांस्कृतिक गतिविधित दुवाला स्वयेफत धाःसा भीत मेमेगु
रोचक सेल्लागु थःगु पनया महिमा व गरिमा लुया वैगु जिं यक्व
सम्भावना दयेमा; धैगु अनुमान यांना च्वना ।

स्वनिगः दुने खवप तौमढी त्वाःया भैरद्योया चुकय् लोहंया छगू बहुमुल्य अभिलेख किया तःगु ने.सं. १२५ दँय् द्योया नामय् गुथि सना जय चतुपाक धैम्ह महान दातां थःगु मां-भापां अमर कृति तया थकूगु तस्सकं हे सराहना यायेबहगु तथ्य भाःपिया । सम्भवतः व गुथि स्थानीय भैरद्योया पर्व यायेत तया वंगु खत धाःसा अझ बांलागु पलाः धका भीसं मूल्यांकन यायेमाःगु आवश्यक पक्का हे खः ।

न्हापा न्हापा व ऐतिहासिक भैरद्योया च्छें चपाःबास्तुया रूपय् दयेका तःगु व देवस्थलय भजन पूजा पर्व गुथि गानाय् अनिवार्य सरिक जुया ब्वति कायेमापिं अन्य मध्ये स्थानीय ज्यापुतय्गु नं जिम्मेवारी दु धाःगु जिं हुइना भुइना न्यना तयागु दु ।

थ्वहे स्मारक ई.सन १७१८ पाखे भूपन्तीद्र मल्लं भव्य मन्दिरया रूपय् दयेका ब्यूगु खः ।



टिक

‘टिक’ धैगु नेवाःमिस्तय्सं छातिइ तिइगु छगू वृत्ताकारगु तिसा खः ।

नेवाःसमुदायलय् प्राचीनकालनिसे लुँया पाताय् स्वाँ, गरुड बा अन्य चितिकक च्वंगु बुट्टा तथा भिन्निकुति व्हना तःलय् मखमल तथा दुरुष्ट लायफचा थें खनेदूगु तिसाया नाँखः टिक । ‘टिकय्’ कलात्मक तिसाया चक्का छचाखेलं वांगु पु भल्लर थें तथा बांलाका तइ । थ्व तिसा नेवाःसमाजय् मिसामस्त इहि याइबले, बाह्रा पितकाइबले व अले शुभ-इहिपा (शुभ बिबहा) या अवसरे न्हापा बांलाक छचला वया च्वंगु मौलिक कलां सम्पन्नगु तिसा खः । थ्व तिसाय् अन्दाजी १२ निसें १४ सेन्टीमीटर ति दुनेया वृत्ताकारया नाप दयेमाः ।

मध्यकाल पाखे थुजागु भव्य लुँया तिसा सम्पन्न परिवारं बाहेक मेपिन्त दयेकेत उलि अःपु मजू ।

समाजय् गृहस्थी चले याना ल्वयेका ज्वी साब हे थाकु धाइ । छायाधाःसा हरेक छेंया परिवारय् मिसा मस्तय् तःजिगु भव्य, स्थानीय मेला जात्रा स्वःवनेबले बांलागु तिसां तिया वनेगु मन याइ । छेंय् दुपिनि खुरुक टिकं तिया वनी । थःगु तिसा मदुपिन्सं न्यया ज्या चले यायिगु चलन दु ।

संयोगवस छुँनेलुँया कलात्मक तःजिगु तिसात तायो, शिरबन्दी, न्यापुसिखः व टिक तिसा सय कडा ५/८ न्याखा निसें च्याखा छुँया सम्पन्न जःनं जक दयेका तइ । सत्यादँ न्ह्योया नेवाः समाजय् छम्हसिनं मेम्हसित माःगु ज्याखँय् ग्वहालि याना जीवन हनेगु सामाजिक रिति थें जुया च्वंगु खनेदु ।

लिपा जुजुं पहाड तराइ व भित्री मधेश पाखेया नेवाः मिस्तयसं नं लुँयागु 'टिक' तिसा प्रति आकर्षित जुया दयेका तिङ्गु प्रारम्भ याःगु खने दु । थ्व तिसा पहाडि प्रदेश व भित्री मधेशया नेवाः व मेमेगु जाति उपजातिया मिस्तयसं सामूहिक रूपय् 'टिक' तिङ्गु बानी वृद्धि जुया वःगु खनेदु ।

नेवाःसमुदाय नं गुलिनं मध्यकाल पाखे कल्पना याना श्रृजना याःगु तिलहरि, टिक, चुल्या, न्यापुसिखः व शिरवन्दीयागु थःगु किसिमयागु लक्षण वा दर्शन दुपिना च्वंगु दु । थजःगु हे कारणं भीगु मौलिक लुँयागु तिसाया ताजित नं बुलुहुं बुलुहुं सामूहिक नेपाली राष्ट्रिय तिसाया स्तरय् लाः वःसा ठिक हे ज्वी ताया ।

पारखीतयसं कलात्मक लुँ बहःया तिसा सु गुम्ह जाति, उपजाति-यागु खः धैगु सियेकेत उलि थाकु नं जुइ मखुला धैथें च्वं ।



बिजकनि

‘बिजाकनि’ धैगु नेवाः तिसाया ताजित मध्यय् पुलांगु छताजि तिसाया नां खः । थ्व तिसाया खँ भाषा रत्न भाजु सत्यमोहन जोशी जुया “बचा धंगु नेवा खँग्व धुकू” सफूतिइ थथे च्वयातःगु दु ।

विचकनि

विचाकनि

विजकनि

}

(नां) : न्ह्यापनय् तीगु छताजि तिसा ।

थुकिं सीदत -‘विजकनि’ तिसाया मेगु नाँ ‘विचकनि’ व ‘विचाकनि’ खः अले थ्व तिसा न्हायपनय् तिइगु खः । वास्तवय थुलि जक थ्व तिसाया गरिमा स्पष्ट मजुउ । उके थ्व तिसाया बिषय माले ज्या न्ह्याका । नेपाल सं. १९९० रिखे छक्कः पुरातत्त्व बिभागय् कार्यरत रा.प.द्वितीय श्रेणीया अधिकृत मय्जु शोभा श्रेष्ठ लिसे खँ जुल । थ्वयकःया थःछें पाल्पाय् खः । थुबले जि नं वहे बिभागय् रा.प. तृतीय अधिकृत पदय् सेवा याना च्वनागु खः । मय्जु शोभाजी ‘विजकनि’ या बारे कनादीगु खँ थथे खः ।

‘न्हापा जिमि माँया न्हायपनय् जायेकः लुँया तिसा तिया तइगु । छन्हु जिं वयकःया मां न तियातःगु तिसाया बारे न्यने कने याना वले वयकः नं फुक तिसाया सिबे तःजीगु तिसाया नांः खः ‘विजाकनि’ धया कना दिल ।

थनं लिपा ‘राजमति’ संकिपाः प्रदर्शन जुल । थ्व सँ किपाय् नँ न्हायपनय् ‘विजकनि’ तिसां तिइका तःगु खना । थ्व कवि भाजु दुर्गालाल श्रेष्ठ जुया कुतः धाइ । थुकिं नेवाः संस्कृतिया ऐतिहासिक महत्वया खँ बाँलाक प्रचार जूगु जुल । थथे नेवाः जातिया प्रतिष्ठा च्वन्ह्याकेगु खँ जूगुलिं कवि भाजु दुर्गालाल श्रेष्ठ यात यक्व यक्व सुभाय् दु ।

थ्व सँ किपाः स्वयावले छपु पुलांगु लोक म्ये लुमसे वल । थ्व ‘राजमति’ नां या लोक म्ये खः । थ्व तस्सकं लोकं ह्वागु म्ये नं ख ।

थ्व म्येय् ‘विजकनि’ तिसाया खँ उल्लेख याना तःगु दु । व थथे खः ।

राजमति कुमति जिके वःसा पिरति

हया बाबा राजमति चा

राजमति मबिल धाःसा काशी वने तेल बुबा

हया ब्यु राजमति चा ॥

थुकिं 'विजकनि' तिसा यात सामाजिक मान्यता गुलि दु धैगु खँ
बाँलाक स्पष्ट जुइ । अले थ्व तिसा 'तायो' व 'पायो' नांया तिसा सिबे तःजि
धैगु खँ नं बाँलाक उल्लेखयाना तःगु जुल । तर थुकी नं थ्व 'विजकनि' तिसा
गन तीगु खः धैगु खँ स्पष्ट मजुउ । अथे नं थ्व म्ये 'विजकनि' तिसाया
गरिमायात म्वाका तःगु दु ।

साहित्यकार भाजु छत्र बहादुर कायस्थजुं मुना पिथना दीगु 'सिन्हाज्या
म्ये' सफुतिइ छपु म्येय् 'विजकनि' तिसाया खँ दु । व म्येया नां 'भनन
बाजन थातका' सिन्हा ज्या वने न्हा' खः । थ्व म्येय् 'विजकनि' तिसायात
'विचकिनि' नां उल्लेख याना तःगु दु व थथे खः ।

भनन बाजन थातका सिन्हा ज्या वने न्हां ॥धु॥

विचकिनि चुल्यान कोखास्य तायल नं

अवपु भिनपु तुकि चा नं ॥

थ्व म्येय् 'विजकनि' चुल्या धका स्पष्ट उल्लेख याना तःगु जुल । उकें
थ्व 'विजकनि' तिसा छगु अनुसन्धानया विषय जूगु दु ।



लुँ, वहः व अन्य धातुया तिसात दयेकीगु नेवाः परम्परागत ज्याः

परापूर्वनिसें स्वनिगः दुने व पिनेया नेवाःजनजातिया सामाजिक संस्कारय् लुँ वहःया तिसात व परम्पराया दथुइ ला व लुसिया थय् सम्बन्ध दूगु भी सकलसिनं स्यूगु हे खँ खः । भीगु सभ्यताया नाप नापं लिपा बलुहुं थ्वःदेया पूर्व व पश्चिम दिशा पाखें नं थनया लुँकमि भाजुपिं पिहाँ बना ज्यायाःवनेगु चलन छ्यला हःगु अःपुक अनुमान यायेफु । खयत जा आपालं आपा लुँकःमि कलाकारत भी हाकुगु दुने हें च्वनीगु चलन दु ।

धातुयें धायेमाल धाःसा परम्परा निसें लुँकःमितय्सं लुँ व वहः या बांबांलागु मौलिक तिसाया ताजि दयेकेत ज्याया हलज्वलं नं धमाधम मुंकेगु यायां वन । गुगु नं धातु पाखें बनेजूगु ज्यावःतय्गु ज्याया पृष्ठभूमि दयेकेत थःथःपिन्त माःगु ज्यावः व कुशल कलाकारतयसं थःगु हे तुतिं च्या आत्मनिर्भर जुया वैच्वंगु प्रशंसनीय तथ्य खः धायेमाः । न्ह्यागु ज्या खँत समय व परिस्थिति अनुसार लुँकःमितय्सं शिपमूलक ज्याय् पलाः न्ह्याकूगु खँ पूर्वजपिन्सं क्यूना वंगु लैय् विचलित जुइ म्वाक ज्या खँ चलय् याना वया च्वंगु खँय् निगू मत जुइमखु ताया ।

भीगु सामाजिक परम्परा कथं लुँकःमि (तिसा दयेकीपिं सकल कलाकार) तय् तिसा दयेकेत थःगु हें छिंगु, कथंहंगु ज्यावःत नं उतिकं हे आवश्यक ज्वलं त खः । थय्क बिचाः व अनुमान यायेबले मजदूर, कलाकार व कृषक ज्यापुतय्त मागु गुलिनं नं वस्तुया ज्यावः खः ईपिं फुक्कं शुद्ध कौतय्सं दयेका बिया वै च्वंगु तसकंहे प्रशंसनीय खँ धाये बह जू । लुँकःमि व सुनारतय्गु तिसा दयेकेया लागी मय्दकं मगागु ज्यावःत क्वय्या सूचिइ प्रस्तुत यायेगु उपयोगी ताया । ईब्यो कथं भीगु समाजय् तिसाया ताजित उपभोग याइपिनिगु व छोपिन्त पर्व पर्वय् माःगु चलन

अनुसारया तिसात निरन्तर दयेका वै च्वंगु सकल चेतनशील जनमानसं
सिया च्वंगु खः । अले वहे लुँ वहःया कलात्मक नेवाः जन जातिया
अत्यधिक थःगु परंपरागत तिसा निर्माण याका व याइपिंसं लगनतया
ज्यायाना च्वंगु हे जातीय संस्कृति म्वाका तयेगु तिवः खः ।

- १) नँ यागु थी थीया तःग्वःगुः, मभौला व चिग्वःगुं गनु
- २) “ “ तगोगु, मभौलागु नंमुग ।
- ३) “ “ “ तपुगु, चिपुगु व मभौलागु पेन्चिसत ।
- ४) “ “ “ तपुगु, मभौला व चिपुगु वःचा ।
- ५) “ “ “ तपुगु, मभौला व चिपूगु चिम्ता ।
- ६) “ “ “ “ “ “ “ “ नपु ।
- ७) लीयागु “ चिपा, मभौला व तपागु काता तालु पात ।
- ८) “ “ “ “ “ “ “ “ लुँ पाः ।
- ९) पशु जीव जन्तुया छेंगु नं दयेकिगु भौ ।
- १०) फायागु सँयांगु फास्थकुँ ।
- ११) पँ बा लीयागु थूचा ।
- १२) धातु लुँ, वहः ली, सिजः कालेगु बूगु चाया भोंचात ।
- १३) सोगा ।
- १४) गेरु ।
- १५) हथ ।
- १६) चि ।
- १७) तिसाया बुत्ता ध्वायेगु कयलँया थासा ।
- १८) धातु लनेगु, वनस्पति खयंम्हपु ।
- १९) बखुँ पा ।
- २०) भौ व भौकथि ।
- २१) हच्येग्वः ।
- २२) तार लीया बूस ।
- २३) लुँ जाँचे यायेगु शालिग्राम थें काली गण्डकीया लोहँ ।
- २४) भौ ।
- २५) लः पाः ।
- २६) लुँ वहः काला प्वकिगु लुँपा ।

- २७) तिसा बुइगु (हकिप) लसां ।
 २८) चाया भुतु ।
 २९) हपँया
 ३०) येचिं लुँ वहःया - तार सालेगु. प्वाःदुगु. ज्यावः ।
 ३१) नपु पलँ लुँचुल्याया नया ज्यावः ।
 ३२) कयँ प्वाकः प्यकुँलागु अत्यधिक गाः दुगु ।
 ३३) कयँ प्वाकः ताहाकगु ।
 ३४) ये चिं सिलिं लुइकेगु ज्यावः ।


भीगु समाजय् परम्परा निसें लुँकःमितय्त अन्य धातु लुँ, वहः, व सिजःया बांबांलागु थःगु हे तालं तिसात दयकेत माःगु ज्यावःत नं मदय्कं मगाःगु ज्यावःया ज्वलं त खः । धाये कि कलाविद् लुँकःमि, सुनारतय्गु लागी गेनु, मुगं नं अनेगु नं धातुयात दाया माःगु थासाय् ज्या यायेत अतिभनं ज्या बिया वैच्वंगु दु ।

अथेहे चाया भुतुलि हचंग्वाः तया जन्तुया छयंगु नं भुना तःगु भौ,पँयागु थूचा नं माक्व ज्या बिया वया च्वंगु भीसं न छुं भचा स्यूगु खँ खः । आ अथे हे लुँ, वहः व सिजः न्ह्यागु धातुयागु तिसा ज्वलं दयेकीबले मि तयेगु लिकायेगु ज्याय् नया चिम्ता मानों ल्हातिं याइगु ज्या बिया वैच्वंगु खँ सर्वविदित तथ्य खः । थुगु हे तालं गुगुनं धातु मिं छुया चिम्ता कताका लिकया अपा अथवा ल्होंयागु लः पालय् क्वागु वस्तु थुना छ्वाउँकिइगु ज्या याना वया च्वंगु भी मध्यय् आपासिनं स्यूगु हे खँ खः ।

थज्योगु लुँ, वहःया दच्छिं न्हिया न्हियं ज्या जुइगु ज्यासःया धू प्यला, खुलाय् छकः परिमाण अनुसार मू कोछिंना धूसःतय्सं काइगु चलन खः । धूसः शाक्य खलःयाहे छगू मौलिक प्रविधिया ज्या याइपिन्त धाइगु खः ।



लुँया ज्या याइपिं कलाकारतय्सं न्हापा न्ह्याक्व हे लुँ सुपथ मृत्यं
न्याये दःसां सिजलय् लुँ सियाः ज्यापुनीतय् तिसां तिइगु दसि कथं आ हे
नं स्वये दनि ।

नाप लुँया मौलिक प्रविधि कथं अपाया धू, चि तया सौपाय् पुत
वंका वैद्य कविराजं सुवर्ण भस्म स्वास्थ्य वर्द्धक वासः चिकुलां ग्राहक-
तय्त नयेगु सल्लाह विइगु चलन न्यने दु ।




भगीगु तिसा ज्वलंया



छगू भलक




तायो




तुकि




न्हाति




तिलहरी




तायो तुकि




पुनायचा




बाई



वहः सिखः माः




सादा चाचा



लुँया चाः



शिरबन्दी





ढुंग्री




हिना अंगू





सिन्हः




प्याखं अंगू




तुति बकि




माकःसि




जन्नु




टिक



लुँ चुल्या



सिंख्याः कल्लि



जंकु कल्लि